

Tuhun Nyoo Cha Tyaa San Mateo

Ñáyivi vachi ra Jesucristo tata

(Lc. 3.23-38)

1 Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

²Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra.

³Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram. ⁴Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón. ⁵Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaí. ⁶Ta sehe ra Isaí cuví chi rey David. Ta sehe rey David chihin ñaha cha cuví ñasihi ra Urías cuví chi ra Salomón.

⁷Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza. ⁸Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías. ⁹Sehe ra Uzías cuví chi ra Jotam, sutu ra Acáz. Ta sehe ra Acáz cuví chi ra Ezequías. ¹⁰Sehe ra Ezequías cuví chi ra Manasés, sutu

ra Amón. Sehe ra Amón cuví chi ra Josías. ¹¹Sehe ra Josías cuví chi ra Jeconías ta yañi ra. Cacacü ra quivi catiñ ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹²Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel. ¹³Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor. ¹⁴Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud. ¹⁵Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob. ¹⁶Ta ra Jacob cuví sutu ra José yíi cu María. Ican ña cuví sihi ra Jesús ra cuví Cristo, o cuñí chi catyí, ra cha saquichi Nyoo vatyí cuví ra rey cuenda yo.

¹⁷Ra Abraham chicoo uchi cumi tahan tata ra nyacua nya cacü ra David. Ta ra David chicoo uchi cumi tahan tata ra nyacua nya quivi tiñ ñu Babilonia chi ñu Israel. Ta nyacua nya quivi cuan chicoo uchi cumi ca tahan tata ñu nyacua nya quivi cacü ra Cristo.

Nu cacü ra Jesucristo

(Lc. 2.1-7)

¹⁸Tyehe caa cacü ra Jesucristo: Cha yaha cundaa tyiño cha

cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chicohon sehe ña, soco cha cuenda maa Tatyí Ii Nyoo. ¹⁹Ta ra José ra cua cuvi yíi ña, cuví ra noo ra vaha. Ta ña cuñí ra cuhva ra ticahan nuu chi ña, yucuan chaha tyaa ra cuhva cha sandoo xehe ra chi ña. ²⁰Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehe ra ñumahna ta catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuvi ña ñasihun, vatyí sehe ña cha cua cacu, cuenda Tatyí Ii Nyoo cuví. ²¹Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyí cusacacu ra chi ñáyivi chihin cuatyí ñu.

²²Tandíhi ihya cuví tacuhva nachino cava tuhun cha cahān Sutu Mañi yo chihin yuhu ra cacuví profeta ra ta cha naha, ra cachahá cuenda tuhun cahán ra.

²³Ta catyí ra tyehe caa:
Ñaha tyivaa cha ta coo ca rayii chi, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴Cuhva cha nducachí iñi ra José, sacuví ra tari cuhva catyí ángel cuan chi ra. Ta quehen ra chi cu María vatyí cuvi ña ñasihí ra.

²⁵Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

**Nu cuahan coyo ra chiñi tuñi
cua nyehe ra nu cacu ra Jesús**

2 Cacū ra Jesús noo ñuu cha nañí Belén. Ta ñuu cuan nyaá chi nu cuví Judea. Ta rey Judea cuan nañí ra Herodes. Tyicuan ta chaḡ coyo suhva ra nya ñuu Jerusalén. Quichí coyo ra ityi nu caña ñanyii. Ta ra cachiñi tuñi xaan cacuví ra. ²Ta candacā tuhun ra chi ñáyivi tyehe caa:

—¿Nya nyaá ra cuvi rey cuenda ñu Israel? Vatyí ityi nu caña ñanyii nyehe ndi tiñoō cha chaha cuenda tyi cacū ra ityi ihya. Ta vachi ndi vachi sacahnu ndi chi ra —cacatyí ra.

³Ta quiví cha chitoḡ rey Herodes tuhun cuan cutyoño cuñí ra. Ta tyicuan caa tucu tandíhi ñáyivi ñuu Jerusalén cuan. ⁴Tyicuan ta canā ra Herodes chi tandíhi ra cacuví nuu chi tata sutu ta ra casacuahá ley vehe ñuhu. Ta ndacā tuhun ra chi ra, nya maa maa tahán chi cacu ra Cristo. ⁵Ta canacahān ra cuan ta cacatyí ra tyehe caa:

—Ñuu Belén ityi Judea, yucuan tahán chi cacu ra vatyí tyehe caa catyaa ra profeta Nyoo nu tutu ta cha naha:

⁶Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyí Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷Tyicuan ta cana xehe ra Herodes chi ra chiñi tuñi cuan, ta ndaca tuhun ra chi ra ñáá cuhva ta ñáá quivi caña tiño cuan. ⁸Tyicuan ta tachí ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quichi catyi ndo chii, tacuhva vatyí cuhun tucu yuhu cusacahni chi cue — catyí ra Herodes chi ra.

⁹Cha yaha cachiñi ra chiñi tuñi cuan cha catyí ra Herodes, caquehen ra ityi ta cuahan coyo ra. Ta tiño cha canyehe ra ityi nu caña ñanyii cuan, cuahan ti ityi nuu ra. Ta chicuñi ti maa maa siqui nu catuví cha lee cuan. ¹⁰Ta cuhva cha canyehe ra chiñi tuñi cuan tyi chicuñi tiño cuan, sii xaan cacuñi ra. ¹¹Ta caquihvi ra chichi vehe nu catuví cha lee cuan. Ta cananyehe ra chi cue chihin cu María sihi cue. Ta chicuñi chiti ra vatyí sacahnu ra chi cue. Tyicuan ta canuñá ra yuhu caja cha canyisó ra. Ta catava ra regalo cha cuví xuhun cuaan, ta cutu vixi chahán, ta ndutya vixi chahán cha nañi mirra. Ta cachaha ra chi cue. ¹²Yaha cuan ta catahan ra ñumahna ta cutuñi iñi ra vatyí ña tahán chi canayaha ra ityi nu nyaá ra Herodes, yucuan chaha siin ca ityi cuanuhu coyo ra.

Nu chinqo xehe ra José ta cu María chihin cha lee nya Egipto

¹³Cha yaha cuahan coyo ra chiñi tuñi cuan, tyicuan ta noo ángel Sutú Mañi yo tuví nuu ra José chichi ñumahna. Ta catyí ra chi ra:

—Ndícuita, quehen chi ra lee ihya, ta chi sihi ra, ta cuhun ndo

nya Egipto. Ta yucuan cunyaa ndo nyacua nya sacote chi ndo. Vatyí ra Herodes cunanducu ra chi cha lee ihya vatyí cahñi ra chi cue.

¹⁴Tyicuan ta ndícuita ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto. ¹⁵Ta yucuan chinyaa ñu nyacua nya cha chihí ra Herodes. Tyehe caa cuví tacuhva na chino cava tuhun cahán Nyoo cha tyaa ra profeta ta cha naha. Tyehe caa catyí ra: “Nya ñuu Egipto cané chi Sehi”, catyí ra.

Nu tachí ra Herodes na cahñi ra chi ra cuatyaa

¹⁶Cha tuví iñi ra Herodes vatyí ra cachiñi tuñi cuan sandavi ñaha ra chi ra, nduxaan vavaha ra. Ta tachí ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandihí, ra cuatyaa cha ni cacu nyacua nya cha uvi cuiya. Tyicuan caa sacuví ra vatyí nandichí xiñi ra vatyí tyicuan tahan cuiya ra Jesús tari cuhva catyí ra chiñi tuñi cuan chi ra. ¹⁷Tyicuan caa chinqo cava tuhun cahán Nyoo cha tyaa ra Jeremías profeta Nyoo ta cha naha, ta catyí ra tyehe caa:

¹⁸Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuví ñáyivi tata cu Raquel, ñáyivi Israel, chacú chaa ñu cha cuenda sehe ñu. Soco ña cuñi ñu cha naquehen ndahvi ñu chi ñu cha cuenda cha cachihí sehe ñu, catyí chi nuu tutu Nyoo.

¹⁹Soco cha yaha cha chihí ra Herodes, tyicuan ta tuví tucu noo

ángel cha tachí Sutu Mañi yo nuu ra José nu quixí ra ñuu Egipto. Ta catyí ra chi ra:

²⁰—Ndícuíta ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyí cha chihí ra nducú cahñi chi cue.

²¹Tyicuan ta ndicuita ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel. ²²Soco quivi chito ra José vatyí ra Arquelao cuví ra rey tyiño nuu sutu ra, ra Herodes, nya Judea, nayuhvi ra ta ña cuñí ra cuhun ra yucuan. Ta vatyí sacoto Nyoo chi ra chichi ñumahna, yucuan chaha cuanuhu ñu nya Galilea. ²³Cha chaá ñu yucuan, cuahan ñu nya ñuu Nazaret, cua coo ñu. Ta yucuan chiyo ñu. Tyehe caa cuví tacuhva chino cava tuhun cha cahán Nyoo, cha catyaá ra profeta ta cha naha. Vatyí catyí ra tyi ra Jesús ra ñuu Nazaret cucunañi ra.

Ra Juan ra sacondutyá chi ñáyivi cahán ra tuhun Nyoo chihin ñu

(Mt. 1.1-8; Lc. 3.1-9, 15-17; Jn. 1.19-28)

3 Quivi cuan ra Juan ra sacondutyá chi ñáyivi cuahan ra noo chiqui ndii ityi Judea. Ta quichahá cahan ra tuhun Nyoo chihin ñu. ²Ta catyí ra:

—Ndu uvi iñi ndo cuatyí ndo vatyí cha yatyin nyaá Nyoo ra cua cunyaca ñaha añima yo.

³Ican tuhun ra Juan ihya cuví cha tyaá ra Isafías ra cuví profeta Nyoo ta cha naha. Tyehe caa tyaá ra:

Chiñí yo cha caná chaa noo ra noo nu chiqui ndii ta catyí ra:

“Tari sanduvahá ndo noo ityi, tyicuan caa sanduvaha ndo

añima ndo, vatyí cua quichi Sutu Mañi yo.

Nuña ndo noo ityi ndoo chi ra naquihvi ra añima ndo.”

⁴Ta ra Juan ñihnó ra sahma chino chihin ixi camellu. Ta sincho ra, ñii cuví. Ta maa maa ri pinchi chachí ra ta tyañuñu cuhu chihí ra.

⁵Ñáyivi ñuu Jerusalén ta tandihi ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichi tyasoho ñu tuhun cahán ra. ⁶Ta cha yaha nahma ñu cuatyí ñu, ra Juan sacondutyá ra chi ñu yuvi cahnu Jordán cuan.

⁷Soco ra Juan nyehe ra vatyí cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichi coyo ra vatyí condutyá ra. Ta catyí ra chi ra:

—iNyoho, tari noo tata coo xaan cuví ndo! ¿Yóo cha sacoto chi ndo vatyí chihin cha condutyá ri ndo ta ma tachi tuñi ca Nyoo chi ndo? Ña ndicha. ⁸Coo ndo noo cha quetuví vaha tyi ndicha cha ndu uvi iñi ndo cuatyí ndo. ⁹Ta ma cuyaa ndo catyí ndo vatyí tata ra Abraham vachi ndo. Vatyí nyacua nya chihin yuu ihya ta cuví savaha Nyoo ñáyivi tata ra Abraham. ¹⁰Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyivi chi tun. Ta cahmi ñu chi tun. Tyicuan caa tucu nyoho, cuhun ndo nu cayú ñuhu. ¹¹Cha ndicha vatyí yuhu sacondutyé chi ñáyivi chihin ndutyá, tari noo seña vatyí cha ndu uvi iñi ñu cuatyí ñu. Soco cha yaha sacondutyá yuhu chihin

ndutya, vachi inga ra cusacondutya chi ñáyivi chihin Tatyí Ii Nyoo ta chihin ñuhū ihñi. Iyó ca tunyee iñi chi maa ra ta ñima ca yuhu. Ta ni cha cuise ndichan ra ta ña nañe, vatyí cahnu xaan ca ra cuví ra. ¹²Tari noo ra cha cua naquehen vaha trigo ta natyihi vaha ra chichi yaca ta mihin cahmi ra, tyicuan caa cuví maa Sutu Mañi yo chihin yo. Tatu chinó iñi yo chi ra cunaquehen vaha ra chi yo. Ta cunyicu yo chihin ra. Soco tatu ña chinó iñi yo chi ra cutyihi ra chi yo anyaya nu cayu ñuhū cha ma ndahva ca maa —catyí ra Juan.

Nu condutya ra Jesús

(Mr. 1.9-11; Lc. 3.21-22)

¹³Tyicuan ta quitā ra Jesús Galilea ta chaā ra yuvi cahnu Jordán nu ñohó ra Juan, vatyí cuñí ra cha sacondutya ra Juan chi ra. ¹⁴Cha xihna ri ña cuñi ra Juan sacondutya ra chi ra, ta quichaha catyí ra chi ra Jesús tyehe caa: —Yoho cuñún cha sacondutye chuun, soco ña tahán chi cha sacondutya yuhu chuun. Maun tahán chi sacondutyon chii —catyí ra.

¹⁵Soco ra Jesús catyí ra chi ra: —Cha vityin, na cuvi chi cuhva catyí yuhu chuun. Vatyí cuñí chi cha sacuvi yo tandihi cha cuñí Nyoo —catyí ra chi ra Juan. Tyicuan ta ndoo ra Juan vaha.

¹⁶Cha yaha ri condutya ra Jesús ta quitā ra chichi ndutya. Ta nuña ri andivi, ta ra Jesús nyehe ra yoso caa vachi noó Tatyí Ii Nyoo, tari noo paloma, ta chaā chi siqui ra.

¹⁷Tyicuan ta tyacu noo ndusu ityi andivi, ta catyí chi tyehe caa: —Ican ra ihya cuví Sehi, ra cuñí xain chi. Ta sii xaan cuñí chihin ra —catyí ndusu cuan.

Nu nducú nyehe cuihna chi ra Jesús

(Mr. 1.12-13; Lc. 4.1-13)

4 Tyicuan ta Tatyí Ii Nyoo chinyacā chi ra Jesús noo chiqui ndii, tacuhva nducu nyehe cuihna chi ra.

²Ña chachi ra uvi xico quivi ta uvi xico ñuu. Ta yaha cuan ta chaā soco chi ra. ³Tyicuan ta tuhva cuihna chi ra, vatyí cuñí ra nducu nyehe ra chi ra. Ta catyí ra chi ra: —Tatu ndicha cha Sehe Nyoo cuví chuun, sananduvi pan yuu ihya —catyí cuihna chi ra Jesús.

⁴Soco ra Jesús nacahan ra ta catyí ra:

—Tuhun Nyoo catyí chi tyehe caa: “Ñima chihin cha cachi ri ñáyivi ta conyito ñu. Conyito tucu añima ñu chihin tuhun cahán Nyoo” —catyí ra Jesús chi cuihna cuan.

⁵Tyicuan ta chinyacā cuihna cuan chi ra Jesús nya ñuu Jerusalén. Ta sandaā cuan chi ra xiñi vehe ñuhu cahnu cuan. ⁶Ta catyí cuan chi ra: —Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chi nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin chahun chihin yuu” —catyí cuihna cuan chi ra.

⁷Ta nacahan ra Jesús ta catyí ra:

—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

⁸Tyicuan ta chinyaca tucu cuihna cuan chi ra noo yucu sucun. Ta sañaha cuan tandihi cha cahnu cuví nu nyacá ñaha rey ta ra cuví tyiño chi ñáyivi iyó siqui ñuhu ñáyivi. ⁹Ta catyí cuihna cuan chi ra tyehe caa:

—Yuhu cuhve tandihi maa ihya chuun, tatu yoho ta cuiñi chitun nui ta sacahnun chii —catyí cuan chi ra.

¹⁰Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna. Vatyí tuhun cahán Nyoo nyaá chi nu tutu ta catyí chi tyehe caa: “Noo ri chi maa Nyoo sacahnu yo. Ta iin ri chi maa ra quichaha yo.”

¹¹Tyicuan ta cuahan cuihna cuan, ta ndoo ra Jesús, ta chaá coyo ángel ta tyinyee ra chi ra.

Nu quichaha saha tyiño ra Jesús ñuu cha nyicú ityi Galilea

(Mr. 1.14-15; Lc. 4.14-15)

¹²Quivi cha chito ra Jesús vatyí ra Juan ñohó ra vehe caa, cuahan ra nya Galilea. ¹³Soco ña ndoo ra ñuu Nazaret, nu chahnu ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí.

¹⁴Tyehe caa cuví tacuhva chino cava tuhun cha tyaa ra Isaías nu tutu Nyoo ta cha naha. Catyí chi tyehe caa:

¹⁵Ñuhú ra Zabulón ta ñuhú ra Neftalí cha nyaá yuhu miñi

inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶Chinyicu ñima ñu nu ñaa iñi vatyí chinyaca ñaha ra ña vaha chi ñu chihin tuhun chihi, soco sandundichín ñuhu Sutu Mañi yo ñima ñu nu nyicú ñu, catyí ra Isaías.

¹⁷Nyacia nya quivi cuan, ta quichaha cahan ra Jesús tuhun Nyoo chihin ñáyivi, ta catyí ra chi ñu:

—Ndu uvi iñi ndo cuatyí ndo vatyí yatyin ri nyaá Nyoo ra cua cunyaca ñaha ñima ndo —catyí ra Jesús chi ñáyivi.

Nu cana ra Jesús chi cumi tahan ra catiín tiyaca

(Mr. 1.16-20; Lc. 5.1-11)

¹⁸Ra Jesús chicá noo ra yuhu miñi cha nañi Tyañuhu Galilea cuan. Ta nanyehé ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catiín tiyaca cacuví ra. Ta cacañi ra yuhva ra nu ndutyá. ¹⁹Tyicuan ta quichaha catyí ra Jesús chi ninduvi ra tyehe caa:

—Cunyicon ndo chii. Ta yuhu cusacuvi vatyí tari ñihí ndo tiyaca, tyicuan caa cuñihi ndo anima ñáyivi (ta cutava ndo chi ñu nu quiñi caa na quihvi ñu cuenda Nyoo) —catyí ra Jesús chi ra.

²⁰Caa cuhva ri cuan casandoo ra yuhva ra ta cuahan coyo ra chihin ra Jesús.

²¹Chiin ri ca chicá ra Jesús ityi nuu ca ta nanyehé ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi

ra. Canyicú ra chichi noo canoa chihin sutu ra canaquicú ra yuhva ra. Ta cana ra Jesús chi ra. ²²Ta caa cuhva ri cuan casandoꝝ ra canoa cuan ta chi sutu ra, ta cuahan coyo ra chihin ra.

Nu sañahá ra Jesús chi cuaha ñáyivi

(Lc. 6.17-19)

²³Cuahan ra Jesús chicá noo ra tandihi ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo añima yo. Ta sanduvaha ra chi ñu cuhví chihin tandihi ri nuu cuehe cha iyó chi ñu. ²⁴Cachitó tandihi ñáyivi ñuu cha nyicú Siria tuhun ra Jesús. Ta quichi nyaca ñu tandihi ñu cuhví chi ra: tandihi ñu siin siin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihí tañi chi ñu. Ta yihí ñu ña cuví nacanda ñu. Ta ra Jesús sanduvaha ra chi tandihi ñu. ²⁵Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndí uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihi.

Nu cahán ra Jesús nuu ñáyivi nu chiqui

(Lc. 6.20-23)

5 Cuhva cha nyehe ra Jesús tyi cuaha xaan ñáyivi, ndaa ra noo nuu yucu. Ta chicunyaꝝ ra yucuan. Tyicuan ta ñu nyicón chi ra chicunyicú ñu nicachico nu nyaá ra. ²Tyicuan ta quichaha sañaha ra Jesús chi ñu tyehe caa:

³—Tandihi ri ñu cha chitó vatyí chiñuhú Nyoo chi ñu, sií xaan

cucuvi chi ñu, vatyí tahán chi vatyí cunyaca ñaha Nyoo añima ñu.

⁴Ta tandihi ri ñu nducuihya iñi vityin cha catyí cuatyí ñu, sií xaan cucuvi chi ñu. Vatyí cusanaa Nyoo cha cuihya iñi ñu.

⁵Tandihi ri ñu cha ña cahnu sahá chi, sií xaan cucuvi chi ñu, vatyí cuquehen cuenda ñu ñuhu ñáyivi cha catyí Nyoo tyi cuhva ra chi ñu.

⁶Ta tandihi ri ñu cuñí xaan sacuvi cuhva catyí Nyoo, sií xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

⁷Ta tandihi ri ñu cha iyó tucahnu iñi chi, sií xaan cucuvi chi ñu, vatyí Nyoo, cucoo ticahnu iñi chi ra chihin ñu.

⁸Ta tandihi maa ñu ndundiñi añima saha Nyoo, sií xaan cucuvi chi ñu, vatyí ñu cuan, cunyehe ñu chi Nyoo.

⁹Ta ñu nducú cuhva cha coo taxi ri ñáyivi chihin Nyoo sií xaan cucuvi chi ñu, vatyí Nyoo, cucatyí ra tyi sehe ra cuví chi ñu.

¹⁰Ta tandihi ñu cha tasi cuñí nyehe ñáyivi chi ñu cha catyí cha sacuví ñu tari cuhva catyí Nyoo, sií xaan cuvi chi ñu, vatyí nyacá ñaha Nyoo añima ñu.

¹¹Na cusii cuñi ndo tatu cahán ña vaha ñáyivi siqui ndo. Ta sanyehé ñu tindoho chi ndo. Ta tava ñu cuaha cuendu siqui ndo cha catyí yuhu. ¹²Na cusii cuñi ndo vatyí tatu tyehe caa sacuví ñu chihin ndo, sií xaan cucuvi chi ndo, vatyí cahnu xaan ta tyaquí xaan cha cutahan chi chi ndo, nachaa ndo andivi. Vatyí suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

Tatu sandihí yo cha chinó iñi yo chi Nyoo cuví yo tari ñii cha ndihí cha uhva

(Mr. 9.50; Lc. 14.34-35)

¹³Nyoho cha chinó iñi ndo chii, tari ñii vaha cuví ndo. Soco tatu ñii, ta ndihí cha uhva, ma sacu uhva ca chi cha cachi yo. Ña vaha ca ñii cuan. Tyicuan ta sacuita yo. Ta cuañi ñáyivi siqui chi.

Tatu vaha quichahá yo tuhun cahán Nyoo, cuví yo tari ñuhu cha sandundichín nu cuahan ñáyivi nu ñaa iñi

¹⁴Nyoho cuví ndo tari ñuhu cha sandundichín nu cuahan ñáyivi. Noo ñuu cha nyaá xiñi noo yucu, ma cuví quihí xehe. Tyicuan caa tahán chi cuví ndo. ¹⁵Ta yori yo cha tyaa yo noo ñuhu tima, ta tixehe yo chichi noo caja. Soco tyiso yo noo nu sucun vatyí sandichin chí chichi vehe tatu cua quihvi ñáyivi, soco ndichin. ¹⁶Ta tyicuan caa tahán chí sandundichin tucu nyoho chihin ñuhu Nyoo cha iyó añima ndo nu cuahan ñáyivi. Tyicuan ta nanyehe ñu cha vaha cha nyacuví ndo, ta sacahnu ñu chí Sutu yo Nyoo ra nyaá andívi.

Sañahá ra Jesús vatyí ñiñi xaan sacuvi yo ta sañaha yo tandihí tuhun cha tachí Nyoo chí yo

¹⁷Ma cuñi ndo vatyí yuhu vachi sanai ley cha tachí Nyoo chí ra Moisés vatyí tyaa ra. Ta ni ri ña vachi sanai tuhun cha tyaa ra cacuvi profeta cuenda Nyoo ta cha naha. Yuhu ña vachi vatyí sanai yucuan. Soco vachi quichahi tandihí cha

catyí tuhun cuan, ta sañahí ñáa cha cuñi chí catyí. ¹⁸Cha ndicha catyí chí ndo vatyí cha ni ri ca cha iyó ca andívi chihin ñuhu ñáyivi ma naa ni chiin cha tyaa ra Moisés ta ra cacuvi profeta Nyoo ta cha naha, nyacua nya yaha cuví tandihí tari cuhva nyaá cha catyaa ra. ¹⁹Yucuan chaha, tatu ña quichahá ñáyivi tuhun cha tachí Nyoo chí ñu, vasi noo tuhun luhlu ri cuví, ta tatu chasi ñu nu quichaha inga ñáyivi, luhlu xaan cucuvi ñu nu nyacá ñaha Nyoo. Soco ñu cha quichahá tandihí, ta sañahá tucu ñu chí inga ñáyivi. Ican ñu cuan cahnu xaan cucuvi ñu nu nyacá ñaha Nyoo. ²⁰Vatyí cuñi chí cha quichahá vaha ca ndo chí Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuví quihvi ndo nu nyacá ñaha Nyoo.

Nu sañahá ra Jesús chí yo vatyí ma cuxaan yo chí ñáyivi

²¹Nyoho cha cuaha chaha chiñi ndo tuhun cha catyí Nyoo chí ñu chiyo ta cha naha. Catyí ra: “Ma cahñi ndo chí ñáyivi, vatyí tatu cahñi ndo ñáyivi, tahán chí cutuñi chí ndo.” ²²Soco yuhu, catyí chí ndo, vatyí vasi cha cuxaan ri ndo chí noo ñáyivi, o vasi cha cahán uhvi ri ndo chí ñáyivi, o vasi cha cahán nya ri ndo chí ñáyivi, tahán chí cutuñi chí ndo. Ta siin ri saha cuenda ndo chí ndo coto cuhun ndo anyaya chihin cuatyí cuan.

²³Ta yucuan chaha quivi cuahun vehe ñuhu, ta nyisón cha cucuhvon chí Nyoo, ta tatu cha nanyaun cha cua cuhvon ta nichon iñun vatyí ña vaha iyó noo yañun chuhun.

²⁴Sandoo cha cua cuhvon chi Nyoo yucuan. Ta cuhun vatyí na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chi Nyoo.

Sañahá ra Jesús vatyí cacan yo ticahnu iñi cuatyí yo coto cuhun yo anyaya

(Lc. 12.57-59)

²⁵Tatu yóo ra chicán cuatyí chahun, ta cuahan ra chuhun nya nuu ra cuví tyiño, nandacan ticahnu iñi chi ra ityi cuahun, coto cuhva cuenda ra chuun chi ra cuví tyiño. Ta ra cuví tyiño cua cuhva cuenda ra chuun chi policía. Ta policía cuan cutyihi ra chuun vehe caa. ²⁶Soco catyí chuun vatyí ma cuví quiton vehe caa cuan nyacua nya tyiyahvun tandíhi cha tahán chi tyiyahvun.

Sañahá ra Jesús vatyí ni cha ndichi xiñi yo cha coo nonga ñusihi, o nonga rayii chi yo, ta ña vaha

²⁷Nyoho chíñi ndo tuhun vatyí catyí Nyoo ta cha naha vatyí nyoho cha iyó ñasihi ndo, ma coo inga ñusihi chi ndo. ²⁸Soco yuhu catyí chi ndo, vatyí nya nyoho cha nyehé ndo chi noo ñusihi ta quihvi iñi ndo chi ñu, catyí chi ndo vatyí chihin yucuan ri ta cha chicoo cuatyí ndo.

²⁹⁻³⁰Vatyí tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhu chichi anyaya. O tatu ndahun sanacavá chuun nu cuatyí, vaha taxin ca

cahnya ta sacuiton cañi. Vatyí vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhu chichi anyaya.

Nu sañahá ra Jesús siqui ra sandoo ñasihi

(Mt. 19.9; Mr. 10.11-12; Lc. 16.18)

³¹Ta suri catyí tucu Nyoo chi ñáyivi chiyo ta cha naha vatyí yóo ra sandoo ñasihi, cuñi chi cuhva ra noo tutu cuenda cha sandoo ra chi ña. ³²Soco catyí yuhu chi ndo, ñahri ityi iyó chi noo ra cha sandoo ra chi ñasihi ra tatu ña natuvi ña chihin inga rayii. Vatyí tatu sandoo ra chi ña, ta ñima cha catyí cuatyí cuan, chicoo cuatyí ra nuu Nyoo. Ta siin ri saccoo ra cuatyí ña vatyí tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

Ma catyí yo “chito vaha maa Nyoo” tacuhva chino iñi ñáyivi vatyí ndicha cha cahán yo

³³Ta chíñi tucu ndo, vatyí catyí tucu Nyoo chi ñu chiyo ta cha naha tyehe caa: “Tatu tyanaha ndo Nyoo tyi cusacuvi ndo noo cha cusacuvi ndo, tahan chi cha sacuvi ndo.”

³⁴Soco yuhu catyí chi ndo vatyí ma tyanaha ndo Nyoo tacuhva chino iñi ñáyivi vatyí ndicha cha cahán ndo. Ta ma tyanaha ndo ni tuhun andivi, vatyí yucuan nu nyaá maa Nyoo cuví. ³⁵Ta ni ri tuhun ñuhu ñáyivi ihya ma tyanaha ndo, vatyí yucuan cuví nu chañí Nyoo. Ta ni ri tuhun ñuu Jerusalén, ta ma tyanaha ndo, vatyí yucuan cuví ñuu Nyoo ra cuví Rey cha cahnu

ca. ³⁶Ta ni ri tuhun xiñi ndo, ta ma tyanaha ndo, vatyí ma cuvi sanduciuichin ndo ni noo ixi xiñi ndo. Ta ni ma cuvi sandutoon tucu ndo. ³⁷“Ican” catyí ndo, tatu ican. Soco tatu ñima, “ñima”, catyí ndo. Ta ma tyanaha ndo Nyoo vatyí ra ña vaha tyiyuhú chi ndo cuví cuan.

Nu sañahá ra Jesús vatyí tatu sacuví ñáyivi cha ña vaha chihin yo, na sacuvi yo cha vaha chihin ñu
(Lc. 6.29-30)

³⁸Ta chiñi tucu ndo cha catyí tuhun cha tyaa ra Moisés ta cha naha: “Vatyí tatu noo ñáyivi cañi ñu nuu ndo, ta tahvi noo noho ndo, o tivi noo chiti nuu ndo, o nya chi ndo sañicuehe ñu, tahán chi vatyí sañicuehe tucu ñáyivi chi maa ñu, tari cuhva cha sañicuehe ñu chi ndo.” ³⁹Soco yuhu catyí chi ndo, vatyí ma nasacuvi ndo cha ña vaha cha nyacuví ñu tasi iñi chi ndo. Vatyí tatu yóo cha cañi iin chiyo xitin ndo, ma nduxaan ndo chi ñu. Soco cuhva tucu ndo inga chiyo xitin ndo na cañi ñu. ⁴⁰O tatu chicán ñu cuatyí chaha ndo, ta cuñí ñu tinyaa ñu noo camisa ndo, ma cuxaan ndo chi ñu. Soco cuhva ndihi ndo chaqueta ndo chi ñu. ⁴¹O tatu yóo cha catyí chi ndo na cuiso ndo cha chii ñu noo kilómetro, cuiso ndo uvi kilómetro. ⁴²Tatu yóo ñu chicán tumañi iñi chi ndo, cuhva ndo chi ñu. Ma catyí ndo cha ma saha ndo tumañi iñi cuan.

Na cuñi yo chi ñu xaan iñi chi yo
(Lc. 6.27-28, 32-36)

⁴³Ta chiñi tucu ndo tuhun cha catyí ñu chiyo ta cha naha vatyí

cuiñi ndo chi ra tahan ndo. Ta chi ra xaan iñi chi ndo quíhi tisihi iñi ndo chi ra. ⁴⁴Soco yuhu catyí chi ndo, cuiñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahan chi ndo, ta chi ñu ña cuñí nyehe chi ndo. Ta cacan tahvi ndo chaha ñu quiñi nyacuvi chihin ndo ta sanyehé tindoho chi ndo. ⁴⁵Ta tyicuan caa sacuvi ndo tacuhva coto ñáyivi vatyí cuví ndo sehe Sutu yo ra nyaá andivi. Vatyí maa ra sacaá ra ñanyii, ta sacoon ra savi siqui tyiño sahá ñáyivi vaha ta ñáyivi ña vaha ñandihí. ⁴⁶Tatu nyoho ta cuñí ndo chi ñáyivi cha vaha iyó chihin ndo ta ña cuñí nyehe ndo chi ñáyivi xaan iñi chi ndo, ñahri cha vaha cuñihi ndo. Vatyí suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca iyó ra cuan cuñí maa ndo. ⁴⁷O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyí suri tyicuan caa sacuví tucu ñáyivi ña ñohó nuu Nyoo. ⁴⁸Tari Sutu yo cha nyaá andivi maa maa ri cha vaha sacuví ra, tyicuan caa nyoho maa maa ri cha vaha sacuvi ndo.

Nu sañahá ra Jesús yoso caa sacuvi yo tumañi iñi

6 'Saha ndo cuenda ta ma cuyaa ndo ñáá tumañi iñi sacuvi ndo chi ñáyivi. Vatyí tatu cuyaa ndo nuu ñáyivi, ñahri cuñihi ndo nuu Sutu yo ra nyaá andivi. ²Cuhva cha sahá ndo tumañi iñi, ma sacoto ndo chi inga ñáyivi vatyí sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahvi ta chichi vehe ñuhu.

Sahá ra tumañi iñi tacuhva na catyi ñáyivi vatyí vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo. ³Soco nya quívi sahá ndo tumañi iñi chi ñu ndahvi, ma sacoto ndo ni chi ra tahan cahnu ndo. ⁴Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

Nu sañahá ra Jesús yoso caa cahan yo chihin Sutu yo Nyoo

(Lc. 11.2-4)

⁵Ta cuhva cha chicán tahvi ndo chi Nyoo, ma cacan tahvi ndo tari cuhva sacuví ñu savahá chii. Vatyí ñu cuan tahán iñi ñu cacan tahvi ñu chi Nyoo nu tuvi ñáyivi, tacuhva catyi ñáyivi vatyí vaha xaan ñáyivi cuví ñu, vaha xaan chinó iñi ñu chi Nyoo. Soco catyí chi ndo cha ndicha vatyí ñahri ca cuñihi ñu nuu Nyoo. Vatyí ñima cha ndicha sacuví ñu. ⁶Soco nyoho ñáá quívi cacan tahvi ndo chi Nyoo, ma cacan tahvi ndo tacuhva nyehe ri ñáyivi chi ndo. Soco quíhvi ndo chichi vehe ndo ta ñacasí ndo yuvehe ta cacan tahvi ndo chihin tandíhi añima ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyí nuu maa ra chicán tahvi ndo, ta ñima nuu ñáyivi. Ta cuaha ca cha vaha cucuhva ra chi ndo.

⁷Cuhva cha cahán ndo chihin Nyoo ñima susuri tuhun cha ñima ri tuhun cahan ndo. Vatyí tyicuan caa sacuví ñu cha ñahri tuhun Nyoo caá añima. Cuñí maa ñu vatyí tyicuan caa ta cuñi Nyoo cha

cahán ñu. Vatyí cuaha xaan chaha cahán ñu susuri maa tuhun cuan.

⁸Ma sacuvi ndo tyicuan caa. Vatyí Nyoo cha chitó ra ñáá cha chiñuhú chi ndo, cha ni ri ca cha cumañi ca cacan ndo chi ra. ⁹Yucuan chaha nyoho, tatu cua cacan tahvi ndo chi Nyoo, tyehe caa catyi ndo:

Sutu Mañi yuhu, yoho cha nyaún andívi. Sacahnú xaan ndi chuun.

¹⁰Na quichi quívi cha nyaca ñahun ihya siqui ñuhu ñáyivi, tari nyacá ñahun andívi.

Na sacuvi ñáyivi ihya siqui ñuhu ñáyivi tandíhi cuhva cuñí maun, tari cuhva cuví gloria.

¹¹Cuhva cha cachi ndi tacuhva cha yaha ndi noo noo quívi.

¹²Saha tucahnu iñi chi ndi ñáá ndíhi cha ña vaha nyacuví ndi, tari maa ndi sahá ndi ticahnu iñi chi ñu satasí iñi chi ndi.

¹³Ma cuhvon cha nducu nyehe ra ña vaha chi ndi, tacuhva ma sacuvi ndi cuatyí nuun. Soco maun cuví ra sacacú chi ndi ndaha ra ña vaha.

Vatyí maun cuví ra nyacá ñaha tandíhi. Ta maun cuaha xaan ca tunyee iñi iyó chuun. Ta tahán chi vatyí sacahnu tandíhi ñáyivi chuun tyicuan ri maa. Ta na cuvi chi tyicuan caa.

Tyicuan caa cuhva tahán chi cacan tahvi ndo chi Nyoo.

¹⁴Vatyí tatu nyoho ta sahá ndo ticahnu iñi chi ñu nyacuví cha ña vaha chihin ndo, tyicuan caa ta Sutu yo ra nyaá andívi, cusaha ra

ticahnu iñi chi maa ndo. ¹⁵Vatyí tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu Sutú yo, ma saha ra ticahnu iñi cuatyí maa ndo — catyí ra Jesús.

Ñáá quivi ña chachí yo ta nanducú yo chi Nyoo, ma sacoto yo chi inga ñáyivi

¹⁶Ta catyí tucu ra Jesús chi ñu chicá noo chihin ra:

—Quivi cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyí cuñí ñu cha coto ñáyivi vatyí ña chachí ñu ta nanducú ñu chi Nyoo. Soco catyí chi ndo vatyí yucuan ri ñihi ñu. Ñahri ca cuñihi ñu nuu Nyoo. ¹⁷Soco tatu nya quivi ña chachí ndo ta nanducú ndo chi Nyoo, ñacatya ndo nuu ndo. Ta ñacuaca ndo cuca xiñi ndo, ¹⁸tacuhva vatyí ma tuvi iñi ñáyivi vatyí ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chi ndo chihin nuu ñáyivi.

Nu sañahá ra Jesús vatyí ma sacaya yo cha iyó siqui ñuhu ñáyivi

(Lc. 12.33-34)

¹⁹Ma sacaya ndo cha tyayii ihya ñáyivi. Vatyí coto tiví cha tyayii cuan. O cuví tucu quihvi ra suhu, ta suhu ra tandihi cha tyayii ndo. ²⁰Vaha taxin ca sacaya ndo cha vaha chi ndo nu nyaá Nyoo gloria. Vatyí nuu Nyoo ña ndihi cha vaha cuan. Vatyí ni ri ra suhu, ni quití, yori cha sativi iyó yucuan. ²¹Ta

catyí chi ndo vatyí nu nyaá cha tyayii ndo, yucuan cuví nu nyaá xiñi ndo. Ta yucuan cunyaa añima ndo.

Tari sandichín chiti nuu yo chi yo tacuhva nyehe yo nu cuahan yo, tyicuan caa tucu sandundichín tuhun Nyoo añima yo

(Lc. 11.34-36)

²²Chiti nuu ndo noo cha sandundichin ityi cuahan ndo cuví. Ta tyicuan caa tucu añima ndo, tatu iyó cha ndichin Nyoo, vaha ñáyivi cuví ndo. ²³Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan caa tucu tatu ñahri cha ndichin Nyoo nyaá añima ndo, tari noo ra cuaa cuví ndo. Ña cuví nyehe ndo ityi vaha cha cuahan nu nyaá Nyoo.

Sañahá ra Jesús vatyí ma cuvi quichaha yo chi Nyoo tatu cuñí xaan ca yo cha tyayii

(Lc. 16.13)

²⁴Noo musu ma cuvi coo uvi chitoho ra. Vatyí musu cuan cuñí ca ra chi noo ra ta ñima ca chi inga ra. Ta quichahá ra chi noo ra, ta chi inga ra ma quichaha ra. Ta tyicuan caa tucu nyoho, ma cuvi cuñi ndo chi Nyoo, ta suri cuhva cuan cuñi ndo cha tyayii.

Sañahá ra Jesús vatyí ma caca xaan iñi yo ñáá ndihi cha chiñuhú chi yo

(Lc. 12.22-31)

²⁵Yucuan chaha catyí chi ndo vatyí ma caca xaan iñi ndo yoso caa ñihi ndo cha cachi ndo ta cha coho ndo. Ni ma caca iñi ndo ñáá

cha cuihno ndo. Vatyí yahví ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyí maa ra chahá ra ñayiví coo ndo. Ta ña yíi cuhva ra inga cha chiñuhú chi ndo ñandíhi. ²⁶Saha ndo cuenda chi saa. Ña savahá ti itu. Ta ña sahá tyiño ti. Ni ri ña naquehén vaha ti tyiño sahá ti chichi yaca. Soco Sutu yo Nyoo chahá ra cha cachi ti. ¿Atu ña yahví ca nyaá nyoho nuu Nyoo ta ñima ca saa cuan? ²⁷Ni ri maa chicá xaan xiñi ndo ma cuvi sandusucun ndo ni chiin ca chi ndo.

²⁸Ta tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun sahma ndo? Saha ndo cuenda yoso caa iyó tu ita nu chiqui. Vatyí ña taví tun. Ta ni ña conó tun isa. ²⁹Soco catyí chi ndo vatyí ni rey Salomón cha tyayíi xaan cuví ra, soco ña cuví cuihno ra cha tyaqui, tari cha sacuihnó Nyoo chi tu ita cuan. ³⁰Ta tu ita cuan tyaqui xaan ñihno tun suhva ri quivi ta yaha cuan ta cuna ityi tun ta cucayu tun chichi horno. Ta nyoho, vaha ca cusacuihno Nyoo chi ndo. Soco chiin xaan chinó iñi ndo chi ra. ³¹Yucuan chaha ma caca xaan xiñi ndo ta catyí ndo: “¿Ñáá cha cachi ndi, o ñáá cha coho ndi, o ñáá cha cuihno ndi?” ³²Vatyí ñáyiví cha ñahri tuhun Nyoo caá añima, chicá xaan xiñi ñu tuhun ihya. Soco nyoho ma caca iñi ndo tuhun cuan vatyí iyó noo Sutu ndo, ra nyaá andiví. Ta chitó ra ñáá ndíhi cha chiñuhu chi ndo. ³³Yucuan chaha, cunyaa xiñi ndo maa maa ri maa tuhun maa Nyoo. Ta nducu ndo cuhva cunyaca

ñaha ra añima ndo. Ta sacuvi ndo tari cuhva cuñí maa ra. Ta tyicuan caa ñihi ndo tandíhi cuii maa cha chiñuhú chi ndo. ³⁴Tandíhi quivi ta iyó tindoho chi ndo. Ma caca xiñi ndo tuhun tindoho cha vachi. Vatyí Nyoo nyaá ra chihin ndo.

Ma cahan yo cha caá inga ñáyiví

(Lc. 6.37-38, 41-42)

7 Ma cahan ndo cha caá inga ñáyiví. Tyicuan caa ta ma tiin Nyoo cuenda cha caá ndo. ²Vatyí tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo. ³¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chi maun? ⁴Tatu chiti nuu maun yihí noo vitu cahnu, ¿yoso caa cuví catyun chi ra yañun: “Nyaca, na tave mihin lee cha yihí chiti nuun?” ⁵Yoho cha savahún chuun, tava xihna vitu cahnu cha yihí chiti nuu maun, tyicuan ta cuvi nyehe vahun mihin lee cha cutavon chiti nuu ra yañun.

⁶Ma sañihi ndo cahan ndo tuhun Nyoo chihin ñu ña cuñí coto, vatyí coto cañi ñu chi ndo. Tari ina cha tiin vavaha chi ndo, tyicuan caa cuví ñu. Ta tari quini cha chaca chaha ti cha yahví nyaá, tyicuan caa cahán ña vaha ñu siqui tuhun Nyoo.

Ma cundihñi yo cacan yo chi Nyoo, tyicuan ta cuhva ra chi yo

(Lc. 11.9-13; 6.31)

⁷Çacan ndo cha chiñuhú chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachan ndo yuvehe, ta nuña.

⁸Vatyi tandihi ndo cha chicán ndo, ñihi ndo. Tatu nanducú ndo, nañihi ndo. Ta tatu sacachán ndo yuvehe, cunuña yuvehe.

⁹Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyin pan chi ndo. ¹⁰Ta ña tuhvá ndo chaha ndo noo coo chi sehe ndo tatu chicán ndotyin noo tiyaca chi ndo. ¹¹Nyoho cha quiñi iyó ndo soco chitó ndo yoso caa cuhva ndo cha vaha chi sehe ndo. Ta vihi ca Sutu yo, ra nyaá andivi. Cuaha ca cha vaha cuhva ra chi ndo tatu cacan ndo chi ra.

¹²Tari cuñi maa ndo cha cunyacuvi ñáyivi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyi tyicuan caa catyí tuhun cha tachí Nyoo, cha tyaa ra Moisés ta ra cacuvi profeta Nyoo ta cha naha.

Tihin yuvehe ta cuiñi ityi cha cuahan nu nyaá Nyoo

(Lc. 13.24)

¹³Ndūcu ndo cuhva quihvi ndo yuvehe tihin. Vatyi quehen yuvehe, ta quehen ityi cha cuahan nya nu cunaa ñáyivi anyaya. Ta cuaha xaan ñu cuahan ityi cuan. ¹⁴Soco tihin yuvehe ta cuiñi ityi cha cuahan ñáyivi cha ma naa ca maa nu cucoo ñáyivi vaha. Soco suhva ri ñáyivi nañihí ityi cuan.

Chihin cha sacuví ri ñáyivi, ta nicohón nuu yo chí ñu tatu ñu vaha o ñu ña vaha cuví ñu

(Lc. 6.43-44)

¹⁵Saha ndo cuenda chi ra cuendu. Vatyi cacatyí ra vatyi cuenda Nyoo

cahán ra. Soco ña ndicha. Vatyi vachi coyo ra tari noo mbee nu nyicú ndo. Sahá ra tyi ra vaha cacuví ra. Soco tari noo ñaña xaan cacuví ra. ¹⁶Nyoho cuví nicohón nuu ndo chi ra chihin cha nyacuví ra. Tari noo yutun ña vaha, tyicuan caa cacuví ra. Vatyi noo tuñiyaca ma cuhva tun mango, ta ni ri noo iñu nduhva ma cuví cuhva chi tichaha ndivi. ¹⁷Ta tyicuan caa tucu tandihi yutun vaha. Chahá tun chiti vaha. Ta tandihi yutun ña vaha, chahá tun chiti ña vaha. ¹⁸Ta yutun vaha, ma cuví cuhva tun chiti ña vaha. Ta ni ri yutun ña vaha ma cuví cuhva tun chiti vaha. ¹⁹Ta tandihi yutun cha ña chahá chiti vaha, cahnya yo chi tun. Ta cahmi yo chi tun. ²⁰Ta tyicuan caa, chihin cha nyacuví ñáyivi cuví nicohon nuu ndo chi ñu tatu ñu vaha cuví ñu, o ñu ña vaha cuví ñu.

Nu catyí ra Jesús vatyi ña tandihi ñáyivi quihvi ñu nu nyacá ñaha Nyoo

(Lc. 13.25-27)

²¹Ma tandihi ñu cha catyí chii: “Sutu Mañi yuhu, Sutu Mañi yuhu”, cuquihvi ñu nu nyacá ñaha Nyoo gloria. Ñu sacuví tandihi cha catyí maa Nyoo Suti, ican ñu cuan cuquihvi nu nyacá ñaha ra. ²²Quihvi cha cucutuñi chi ñáyivi, cuaha xaan ñu cucatyí ñu chii tyehe caa: “Sutu Mañi yuhu. Yuhu cahjn tuhun maun chihin ñáyivi. Ta chihin sivun tave tatyí ña vaha cha yihí añima ñáyivi. Ta cuaha xaan milagru savahí chihin sivun”, cucatyí ñu chii.

²³Tyicuan ta yuhu cucatyí chi ñu: “Ña ñohó nui chí nyoho. Canyaha

ndo nu nyaí. Vatyí nyoho sacuví
ndo maa maa ri cha ña vaha.”

**Nu sañahá ra Jesús yoso caa cucuvi
chi ñu quichahá ta ñu ña quichahá
tuhun cahán ra**

(Lc. 6.47-49; Mr. 1.22)

²⁴Ihya catyí chi ndo, yóo cha chiñí
tuhun cahín ta sacuví tari cuhva
catyí; cuví ra tari noo ra chiñí tuñi
cha savaha ra vehe ra siqui cava. ²⁵Ta
quichaha coon savi. Ta cama xaan
yuvi ndutya yaha. Ta ñihi xaan caa
tatyí. Soco ña cuví sanduva chi vehe
cuan. Vatyí ñihi nanyaá siqui cava
cuan. ²⁶Soco yóo cha chiñí tuhun
cahín, ta ña sacuví ra tari cuhva catyí;
cuví ra tari noo ra tondo, cha savaha
ra vehe ra nu ñiti. ²⁷Ta chaa savi. Ta
cama xaan yuvi ndutya yaha. Ta ñihi
xaan caa tatyí. Ta vehe cuan tañi
tyehe ri nduva —catyí ra Jesús chi ñu.

²⁸Cuhva cha ndihí cahan ra
Jesús chihin ñáyivi, iyo xaan cuñi
ñu tuhun cha sañahá ra. ²⁹Vatyí
sañahá ra tari noo ra cha nyacá
ñaha. Ta ña sañahá ra tari ra
sacuahá cuenda ley vehe ñuhu.

**Nu sanduvahá ra Jesús chi noo ra
cuhví cha tyahyú coño**

(Mr. 1.40-45; Lc. 5.12-16)

8 Cuhva cha noo ra Jesús yucu
cuan, cuaha ñáyivi nyicón
chi ra. ²Ta chaa noo ra cha tyahyú
coño, ta chicuñi chiti ra nuu ra, ta
catyí ra chi ra:

—Sutu Mañi yuhu, tatu yoho ta
cuñún, cuví sanduvahun chii —
catyí ra chi ra.

³Tyicuan ta sanaca ra Jesús
ndaha ra ta tijn ra chi ra, ta catyí
ra:

—Cuñí sanduvahi chuun. Ta na
nduvahun vityin ri —catyí ra.

Ta caa cuhva ri cuan ta nduvaha
nu tyahyu cuan. ⁴Tyicuan ta
quichaha catyí ra Jesús chi ra:

—Nyehe, yori chihin cahun tuhun.
Soco cuahan, ta sañahun chuun chi
tata sutu, ta cuhva cuendon ofrenda
cha catyí ra Moisés nu ley chahnu
vatyí tacuhva coto ñu vatyí cha
nduvahun.

**Nu sanduvahá ra Jesús chi musu noo
ra capitán**

(Lc. 7.1-10)

⁵Cuhva cha chaa ra Jesús
Capernaum, noo capitán, ra ñuu
Roma, chaa ra nu nyaá ra Jesús ta
chacu ndahvi ra nuu ra, ⁶ta catyí
ra:

—Sutu Mañi yuhu, musi catuví
ra nu cama. Cuhví ra. Ña cuví
nducuita ra vatyí ñihi xaan tahán
ra.

⁷Ta catyí ra Jesús chi ra:
—Cuhun mai ta cusanduvahi chi
ra —catyí ra chi ra.

⁸Nacahan capitán cuan ta catyí
ra:

—Sutu Mañi yuhu, ña nañé cha
cuhun vehi; soco tacuhva catyí
run, ta musi nduvaha ra. ⁹Vatyí
suri iyó ra nyacá ñaha chi mai. Ta
iyó sindaro nyacá ñaha tucu mai.
Ta tatu cha tave tyiño chi noo ra,
cuhun ra. Ta tatu cane chi inga ra,
quichi ra. Ta tatu cha tave tyiño chi
musi, sacuvi ra.

¹⁰Ta cha chiñi ra Jesús cha cahan
ra, iyo xaan cuñi ra. Ta catyí ra chi
ñu nyicón chi ra:

—Cha ndicha catyí chi ndo, vatyí
ñuu cha nyicú nichahnu Israel, ta

nañihi que ni noo ñáyivi cha chinó xaan iñi ñu tari chinó iñi ra ihya.

¹¹Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andívi. ¹²Ta ñu Israel cha tahán chi cuhun andívi, yihí ñu, ma cuhun ñu, vatyí cuhun ñu nu ñaa iñi ityi chata. Ta yucuan cucuacu chaa ñu ta cucahñi noho ñu —catyí ra Jesús chi ñu.

¹³Tyicuan ta quichaha catyí ra chi capitán cuan tyehe caa:

—Cuahan, ta na cuvi chi tari cuhva catyūn vatyí chinó xaan iñun chii —catyí ra.

Ta suri cuhva cuan nduvahā musu ra.

Nu sanduvahā ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴Ta cha yahā cuan, chaa ra Jesús vehe ra Pedro. Ta nanyehē ra chi maha tyiso ra Pedro, catuví ña nu chito chihin cahñi. ¹⁵Ta tñin ra ndaha ña, ta quitā cahñi cuan chi ña. Ta ndicuitā ña, ta quichaha tyiñuhu ña chi ra.

Nu sanduvahā ra Jesús cuaha ñu cuhví

(Mr. 1.32-34; Lc. 4.40-41)

¹⁶Ta cuhva cha cuaa cuan, quichi nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahān ra, tava ñehe ra chi tatyí ña vaha cuan, ta sanduvahā ra chi tandíhi ñu cuhví. ¹⁷Tyicuan caa cuví tacuhva vatyí na chino cava tari cuhva catyí ra

profeta Isaías, quivi catyí ra tyehe caa: “Maa ra quehēn ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chi yo tatu cuñí yo cunyicon yo chi ra Jesús?

(Lc. 9.57-62)

¹⁸Tyicuan ta nyehe ra Jesús vatyí nicachico nu nyaá ra nyicú ñáyivi. Ta catyí ra chi ñu vatyí cuyaha ra inga chiyo miñi. ¹⁹Tyicuan ta chaa noo ra sacuahā ley vehe ñuhu ta catyí ra chi ra:

—Maestro, cuñí cunyiquen chuun tandíhi ri ityi nu cuhun —catyí ra.

²⁰Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taca ti. Soco yuhu Rayii cha quichi nya gloria, ñahri vehi ta ni ri nu cava xiñi ta ñahri —catyí ra.

²¹Inga tucu ra chicá noo chihin ra catyí ra chi ra:

—Tata, cuhva na cuhun xihne cutyihi chi suti chichi ñuhú, tyicuan ta quichi ta cunyiquen chuun —catyí ra.

²²Ta catyí ra Jesús chi ra:

—Ñaha yoho vatyí cunyicon chii. Saña chi ñu ña ñohó nuu chi Nyoo, na tyihi maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan

(Mr. 4.35-41; Lc. 8.22-25)

²³Tyicuan ta quihví ra chichi canoa, ta ra cachicá noo chihin ra, cuahan coyo ra chihin ra. ²⁴Ta chaa noo tatyí ñihi xaan nu miñi cuan, ta nyacua chasí ndutya cuan canoa ra soco maa ra Jesús quixí ra. ²⁵Ta ra cachicá noo chihin ra sandoyo ra chi ra, ta cacatyí ra:

—iSutu Mañi yuhu, sacacu chi yo, vatyí cuñi cunaa yo!

²⁶Ta catyí ra Jesús chi ra:

—¿Ñáá tuhun cha yuhví xaan ndo? iNyoho chiin xaan chinó iñi ndo chii!

Tycuan ta nacanda ra ta sacutaxin ra tatyí nu miñi cuan, ta tandihi cutaxin. ²⁷Ta iyo xaan cacuñí ra cuan ta cacatyí ra:

—¿Yóó ra cuví ra ihya? Vatyí nyacua nya tatyí ta nyacua nya ndutya ta quichahá chi ra —catyí ra.

Nu nduvahá uvi ra ñuu Gadara ra cayihí tatyí ña vaha chi

(Mr. 5.1-20; Lc. 8.26-39)

²⁸Tycuan ta chaá coyo ra inga chiyo miñi cha nyaá ñuhú cha nañí Gadara. Ta chaá coyo uvi tahan ra yihí tatyí ña vaha chii. Ta nu ñaña caquitá coyo ra cuan. Xaan vavaha ra, ta yori maa cuví yaha ityi cuan. ²⁹Ta canachaá ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachi sanyehun tindoho chi ndi cha ni cumañi ca chaá quiví? —cacatyí ra cuan.

³⁰Ta yatyin ri cuan nyicú cuaha quini cachachí ti. ³¹Ta catyí tatyí ña vaha cuan chi ra Jesús:

—Tatu cuatava ñehun chi ndi, cuhva cha quihví ndi chichi quini cuan —cacatyí tatyí ña vaha cuan.

³²—Vaha. Quihví ndo —catyí ra Jesús.

Ta caquitá coyo tatyí ña vaha cuan, ta quihví coyo chichi tandihi quini canyicú cuan. Ta tandihi quini cuan cachino ti ta canacooyo ti noo xahva yuhu miñi cuan, ta chihí ti chihin ndutya cuan.

³³Tycuan ta ra casahá cumi chi ti cuan, cachinó vavaha ra cuahan coyo ra chichi ñuu, ta canacatyí ra tandihi cha cuví chi ra cayihí tatyí ña vaha cuan chi. ³⁴Ta tandihi ñáyivi ñuu, chahan ñu chinyehe ñu chi ra Jesús, ta chacu ndahvi ñu nuu ra na quita ra yucuan.

Nu sanduvahá ra Jesús chi noo ra cuhví cha ña cuví nacanda

(Mr. 2.1-12; Lc. 5.17-26)

9 Tycuan ta quihví ra Jesús chichi canoa ta yaha sava ra inga chiyo miñi, ta nachaa ra nya ñuu nu iyó ra. ²Nu nyaá ra yucuan chinyaca ñáyivi chi noo ra cuhví cha ña cuví nacanda catuví ra nu chito. Ta cha nyehe ra Jesús vatyí chinó xaan iñi ñu chi ra, quichaha catyí ra chi ra cuhví cuan:

—Sanii inun, suti vatyí cha chicoo ticahnu iñi cuatyun —catyí ra chi ra.

³Tycuan ta quichahá chica xiñi suhva ra sacuahá ley vehe ñuhu cha nyicú yucuan tyehe caa: “Ra ihya chicoo cuatyí ra nu Nyoo chihin tuhun cahán ra”, cachicá xiñi ra.

⁴Soco ra Jesús chitó ri ra ñáá cha cachicá xiñi ra, ta catyí ra chi ra:

—¿Ñáá tuhun cha ña vaha maa chicá xiñi ndo? ⁵Vatyí ¿nya cha yii ca catyí yo: atu yii ca catyí yo “Cuatyun cha yaha ndachi”, o yii ca catyí yo: “Ndícuíta ta caçon”?

⁶Vaha. Cuasañahi chi ndo vatyí yuhu Rayii cha quichi nya gloria, iyó ityi chii siqui ñuhu ñáyivi ihya vatyí sahi ticahnu iñi cuatyí —catyí ra Jesús.

Tycuan ta catyí ra chi ra cuhví cuan:

—Ndícuita, naquehen chiton ta cuanuhu nya vehun —catyí ra.

⁷Tyicuan ta ndícuita ra cuhví cuan ta cuanuhu ra nya vehe ra.

⁸Cuhva cha nyehē ñáyivi tuhun ihya, canayuhví ñu. Ta casacahnú ñu chi Nyoo vatyí chaha ra tunyee iñi cuan chi ñáyivi.

Nu caná ra Jesús chi ra Mateo

(Mr. 2.13-17; Lc. 5.27-32)

⁹Quitā ra Jesús yucuan, ta nanyehē ra chi noo ra cha nañí Mateo, nyaá ra quehen ra xuhun cha tyiyahví ñu Israel chi gobiernu ñuu Roma. Ta catyí ra chi ra:

—Coho chihin.

Tyicuan ta ndícuita ra Mateo ta tinyicōn ra chi ra.

¹⁰Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaā coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí.

Ta cachicunyicú tucu ra yucuan nu mesa iin ri chihin ra Jesús ta ra cachicá noo chihin ra. ¹¹Soco cha canyehē ra fariseo cha tyicuan caa, candaca tuhun ra chi ra cachicá noo chihin ra Jesús, ta cacatyí ra:

—¿Ñáá tuhun cha vatyí ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹²Chinī ra Jesús cha cahan ra, ta catyí ra chi ra:

—Ña chiñuhú doctor chi ñu iyó vaha, ñu ña cuhví, soco chi ñu cuhví chiñuhú ra. ¹³Cuahan ndo ta cutuhva ndo cha cuñí chi catyí nu tutu Nyoo, nu catyí ra tyehe caa: “Yuhu cuñí vatyí cundahvi cuñi ndo

chi ñáyivi, ta ñima ca cha cahñi ndo quiti ta cuhva cuenda ndo chii.” Ña vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyí cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar

(Mr. 2.18-20; Lc. 5.33-35)

¹⁴Tyicuan ta ra canyicón chi ra Juan, ra sacondutya chi ñáyivi, catuhva ra chi ra Jesús ta candaca tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chi ra Juan.

¹⁵Ta nacahan ra Jesús ta catyí ra: —¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quivi vatyí cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyí ña chachí tahan tuhun chahnu cha iyó ñu chihin tuhun chaa cha sañahá ra chi ñu

(Mr. 2.21-22; Lc. 5.36-39)

¹⁶Yori naquicú noo vestido chahnu chihin noo sahma chaa vatyí coto cundiyo nu naquicu ñu chihin cha chaa cuan, ta cahnya chi cha chahnu cuan, ta nu tahnya cuan nducahnu ca. ¹⁷Ta ni ña tyihí yo vinu chaa chichi ñii chahnu vatyí tatu sacuvi yo tyicuan caa,

tahnya ñii cuan, ta tari cunaa vinu, ta cunaa ñii cuan. Yucuan chaha cuñi chi tyihi yo vinu chaa chichi ñii chaa, ta tyicuan ta ninduvi ta cusaha cuenda chi chi tahan chi.

Sehe ra Jairo, ta ñaha cha tiin sahma ra Jesús

(Mr. 5.21-43; Lc. 8.40-56)

¹⁸Cha ni ri ca cha catyí ra Jesús tuhun ihya, chaḡ noo ra cuví nuu chi ñu Judea ta chicuiñi chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunandoto ña —catyí ra chi ra Jesús.

¹⁹Ndicuita ra Jesús ta cuahan ra iin ri chihin ra ta ra cachicá noo chihin ra ñandihí.

²⁰Tyicuan ta noo ñaha, cuhví ña chihin cha chati niñi ña. Ta cha uchi uvi cuiya cuhví ña. Ta tuhva ña chi ra Jesús ityi chata ra, ta tiin ña yuhu sahma ra, ²¹vatyí tyehe caa chicá xiñi ña: “Ma chihin cha tiin ri sahma ra ta nduvahi”, chicá xiñi ña.

²²Soco ra Jesús nanyocavaḡ ra nanyehe ra chi ña, ta catyí ra chi ña: —Nduniñi iñun sihi, cha nduvahun vatyí chinó iñun —catyí ra.

Ta caa cuhva ri cuan ta nduvaha ña.

²³Yahaḡ cuan ta chaḡ ra Jesús vehe ra cuví nuu cuan, ta nyeheḡ ra vatyí ra música canyatú tuhva ra cha cuhun coyo ra nu quihvi cue chichi ñuhú. Ta ñáyivi cha nyicú cuan chacú chaa ñu. ²⁴Ta catyí ra chi ñu:

—Quita ndo ihya. Ñaha tyivaa ihya, ña chihí ña, soco quixí ña —catyí ra.

Ta chacú cuehe ri ñáyivi nyehe ñu chi ra. ²⁵Soco ra Jesús tavaḡ ra chi ñu ityi chata vehe, tyicuan ta quihvi ra ta tiin ra ndaha ñaha tyivaa cuan, ta maa ña ndicuita ña. ²⁶Ta tandihí ityi cuan chityaḡ tuhun cha cuví yucuan.

Nu sanduvahaḡ ra Jesús chi uvi ra cuaa

²⁷Cuhva cha quitaḡ ra Jesús yucuan, uvi tahan ra cuaa canyicón chi ra suri caná chaa ra ta cacatyí ra:

—iCundahvi cuñi chi ndi, yoho ra vachi tata ra David! —cacatyí ra.

²⁸Ta cuhva cha quihviḡ ra Jesús chichi vehe, ra cuaa cuan, catuhvaḡ ra chi ra, ta maa ra Jesús quichaha ndacaḡ tuhun ra chi ra:

—¿Atu chinó iñi nyoho vatyí cuví sanduvahi chi ndo? —catyí ra.

Ta canacahan ra ta catyí ra: —Ay, chinó iñi ndi chuun, Sutu Mañi yuhu —cacatyí ra.

²⁹Tyicuan ta tiin ra Jesús chiti nuu ra ta catyí ra chi ra:

—Na cuví maa yoso cuhva chinó iñi ndo —catyí ra.

³⁰Ta canduvahaḡ chiti nuu ra. Ta catyí vaha ra Jesús chi ra tyehe caa: —Ndūcu ndo cuhva cha yori coto.

³¹Soco quitaḡ coyo cuiri ra ta quichaha canacatyíḡ ra cha sacuviḡ ra Jesús chihin ra chi ñáyivi tandihí ityi yucuan.

Nu sanduvahaḡ ra Jesús chi noo ra ñihí

³²Cha ni ri ca cha caquitaḡ coyo ra cucuaa cuan, suhva ñáyivi quichí nyaca ñu chi noo ra ñihí cha yihí noo tatyí ña vaha chi nu nyaá ra

Jesús. ³³Ta caa cuhva ri cha tava ñehe ra Jesús tatyí ña vaha cuan, quichaha cuví cahan ra cuan. Ta iyo xaan cuñí ñáyivi, ta catyí ñu:

—Ni noo chaha ta cuví ca cha tyehe caa Israel Ihya —catyí ñu.

³⁴Soco ra cacuvi fariseo, cacatyí ra:

—Ra ihya tava ñehe ra tatyí ña vaha chihin tunyee iñi chi cuihna ra cuví nuu —catyí ra.

Nu catyí ra Jesús vatyí ña cuaha maa ñu sahá tyiño cuenda Nyoo iyó

³⁵Ra Jesús chahan ra tandihi ñuu sañahá ra chi ñáyivi chichi vehe ñuhu tahan tahan ñuu. Cahán ra tuhun Nyoo yoso caa nyacá ñaha Nyoo añima ñáyivi. Ta sanduvahá ra tandihi nuu cuehe cha yihí ñu.

³⁶Ta cha nanyehé ra chi ñáyivi, cundahvi cuñí ra nyehé ra chi ñu, vatyí nyehé ñu tindoho ta cuihya cuñí ñu, tari mbee quiti cha yori sahá cumi chi. ³⁷Tyicuan ta catyí ra chi ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra.

³⁸Yucuan chaha, çacan ndo chi chitoho tyiño yucuan, na tachi ra chi ra saha tyiño na sataca ra tyiño cuan.

Nu cachí ra Jesús chi ndí uchi uvi ra caca tyiño ra

(Mr. 3.13-19; Lc. 6.12-16)

10 Tyicuan ta cana ra Jesús chi ndí uchi uvi ra chicá noo chihin ra ta chaha ra ityi chi ra vatyí tava ñehe ra chi tatyí ña vaha cha yihí añima ñáyivi, ta sanduvaha ra ndihi nuu cuehe ta cha uhvi ñandihí.

²Ican ihya cuví sivi ndí uchi uvi ra chicá tyiño ra: xihna ca, ra Simón, cha nañí tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chi ra; ³ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañí tucu Tadeo, ⁴ta ra Simón cha yihí cuenda ityi ra cacuñí cuhun cuatyí siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

Nu tachí ra Jesús chi ra cachicá noo chihin ra, na cucahan ra tuhun Nyoo

(Mr. 6.7-13; Lc. 9.1-6)

⁵Ta tyehe caa tachi ra Jesús chi uchi uvi tahan ra cuan, ta catyí ra:

—Ma cuhun ndo nu iyó ñu cha ñima ñu Israel cuví, ta ni ma quihvi ndo ñuu cha nyicú Samaria.

⁶Cuahan ndo, soco nu nyicú mbee cha cuanaa cha cuví ñu ñuu Israel.

⁷Cuahan ndo cuacahan ndo tuhun vatyí cha chaçá cha cunyaca ñaha Nyoo añima ñáyivi.

⁸Sanduvaha ndo chi ñu cuhví ñu tyahyú coño, ta ñu yihí inga cuehe chii.

Sañandoto ndo ndíyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee iñi ihya chihin cha ñahri yahvi, ta çotyíño ndo soco ma quehen ndo yahvi.

⁹Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha. ¹⁰Ma cuiso ndo ni yono cha cuenda cha caca ityi ndo. Noo ri camisa cha ñihnó ndo cuhun chihin ndo. Ta ma cuiso ndo inga

ityi ndichan, ni yutun ma tuvi ndo, vatyí ra sahá tyiño, iyó ityi chi ra cha coo yahvi ra.

¹¹Cuhva cha chaa ndo noo ñuu, ndūcu ndo noo ñáyivi cachi iyó, ta ndoo ndo vehe ñu nyacua nya quita ndo ñuu cuan. ¹²Cuhva cha cua quihvi ndo noo vehe, cūhva ndo nocumi chi ñáyivi iyó vehe cuan. Ta çatyí ndo chi ñu: Na coo cha taxi Nyoo añima ndo, çatyí ndo chi ñu. ¹³Ta tatu ñu ñuu cuan ta nacotó ñu tyi chiñuhú cha taxi ri cuan chi ñu, cundoo cuan chihin ñu. Soco tatu ña nacotó ñu vatyí chiñuhú cuan chi ñu, ma ndoo cuan chihin ñu. ¹⁴Ta tatu ña cuñí ñu quehen cuenda ñu chi ndo, ta ni ña cuñí ñu cuiñí ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo. ¹⁵Cha ndicha catyí chi ndo vatyí quivi cutuñi chi ñáyivi, ñihi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chi ñáá ndihi tindoho cunyehe ñu chicá tyiño Nyoo

¹⁶iNyehe ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma. ¹⁷Saha ndo cuenda chi ndo vatyí ñáyivi cucuhva cuenda ñu chi ndo chi ra cuví tyiño, ta chichi vehe ñuhu cucañi ñu chi ndo. ¹⁸Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhín nuu ra ta nuu ñu cha ñima ñu Israel cuví. ¹⁹Soco tatu nacuhva cuenda ñu chi ndo chi ra cuví tyiño,

ma caca xiñi ndo yoso caa cucahan ndo, vatyí tatu chaa cūhva cha cahan ndo, Nyoo cucuhva ra tuhun cha cucahan ndo. ²⁰Vatyí ñima maa ndo cucahan, soco maa Tatyí Ii Sutu yo Nyoo cusacahan chi ndo.

²¹Rayii cunaxico tuhun ra suri chi yañi ra tacuhva na cacahni ra chi ra. Ta yihí ra cunaxico tuhun ra chi sehe ra. Ta yihi ñáyivi cunanuhu ñu siqui sutu ñu ta sihi ñu, ta cusacuvi ñu, na cúvi ñu. ²²Tandihí ñáyivi, cucutasi cuñi nyehe ñu chi ndo cha catyi yuhu. Soco tatu ña ndu uvi iñi ndo chino iñi ndo chii, tyicuan ta cucacu añima ndo. ²³Tatu chica nyicon ñu chi ndo noo ñuu, cono ri ndo inga ñuu. Vatyí cha ndicha catyi chi ndo ni cha ta ndihí ca cahan ndo tuhun Nyoo tandihí ñuu nu nyicu ñáyivi Israel ta yuhu Rayii cha quichi nya gloria cuquichi inga chaha.

²⁴Ni noo ra cutuhvá, ña cahnu ca ra cuví ra ican saha ra sacuahá chi ra. Ta ni noo musu, ña cahnu ca cuví ra ican saha chitoho ra. ²⁵Ra cutuhva, cuñí chi ndoo ra vaha cha chaa ra cuvi ra tari ra sacuahá chi ra, ta musu tari chitoho ra. Tatu yuhu ra cuví chitoho vehe, catyí ñu chii vatyí Beelzebú, cuihna ra cuví nuu, cuví, suri tyicuan caa cucatyí tucu ñu chi ñáyivi cuende.

Yóo chi tahán chi cuyuhvi yo

(Lc. 12.2-7)

²⁶Yucuan chaha ma yuhvi ndo chi ñáyivi, vatyí ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñún tyi ma coto tandihí ñáyivi. ²⁷Tandihí cha catyí chi ndo nu ñaa iñi, çatyí

nyoho nu ndichin. Ta tandihí cha catyi chí ndo nu xehe, c̄ana chaa ndo nya xiñi vehe, na coto tandihí ñáyivi. ²⁸Ma yuhvi ndo chí ñu chahñi coño ñuhu yo, vatyi ma cuvi cahñi ñu añima yo. Soco yuhvi ndo chí ra cuví sanaa coño ñuhu yo ta añima yo chichi anyaya ñandihí.

²⁹¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo. ³⁰Vatyi nyacua nya ixi xiñi nyoho ta chitó Nyoo yoso tahan nyaá. ³¹Ma yuhvi ndo. Nyoho, yahvi ca nyaá ndo ta ñima ca ticuítí saa.

Ma yuhvi yo cahan yo tuhun ra Jesucristo nuu ñáyivi

(Lc. 12.8-9)

³²Tandihí ñu cha cahán vaha tuhun nuu ñáyivi, yuhu tucu cucahan vahi cuenda ñu nuu Suti ra nyaá andívi. ³³Soco ñu cahán nuu cahan tuhun, yuhu tucu ma cahin tuhun ñu nuu Suti ra nyaá andívi.

Cha cuenda ra Jesús cusiiñ ñáyivi

(Lc. 12.51-53; 14.26-27)

³⁴Ma cuñi ndo vatyi yuhu vachi cuhve cha taxi ri coo ndo siqui ñuhu ñayiví ihya. Ña vachi cuhve cha taxi ri, soco cha cañi tahan ñáyivi. ³⁵Vatyi sasiín chí ndo. Vatyi noo ra cuhun ra siqui sutu ra. Ta noo ña cuhun ña siqui sihi ña. Ta ñu cuví chono cucañi tahan ñu chihin tyiso ñu. ³⁶Ta tyicuan caa suri ñáyivi chí ndo cucuvi ñu ñu xaan iñi chí ndo.

³⁷Ñu cha cuñi ca chí sutu o chí sihi ican saha chí yuhu, ña tahán

chí cuví ñu ñu cuende. Ta ñu cuñi ca chí sehe, ican saha chí yuhu, ña tahán chí cuví ñu ñu cuende. ³⁸Ta ñu cha ña cuñi nyehe tindoho ta cunyicon ñu chii, ña tahán chí cuvi ñu ñu cuende. ³⁹Vatyi ñu ña cuñi nyehe tindoho cha cuenda yuhu, cunyehe ñu tindoho anyaya, soco ñu nyehé tindoho ta chahá ñayiví cha catyi yuhu, cucacu añima ñu.

Yahvi cha tahán chí chí yo

(Mr. 9.41)

⁴⁰Ñu quehén cuenda chí ndo, chí yuhu quehén cuenda ñu, ta ñu quehén cuenda chí yuhu, quehén cuenda ñu chí ra cha tachí chii. ⁴¹Ñu quehén cuenda noo ra profeta Nyoo cha cuenda vatyi cuenda Nyoo cahán ra, cuñihi ñu suri tahan yahvi cha cuñihi profeta cuan. Ta ñu quehén cuenda chí noo ra vaha cha cuenda tyi ra vaha cuví ra, suri tahán yahvi cha cuñihi ra vaha cuan cuñihi ñu. ⁴²Ta savahri ñu cha cuhva vasi noo vasu ndutya vichin coho ñu nyihi ihya cha cuenda cha nyicón ñu chii, cuñihi ñu cha cucuhva Nyoo chí ñu — catyí ra Jesús.

Ra cha tachí ra Juan nu nyaá ra Jesús

(Lc. 7.18-35)

11 Ndihi chaha ra Jesús tuhun chí uchi uvi ra chicá noo chihin ra, tyicuan ta quitá ra yucuan, vatyi cucahan ra tuhun Nyoo chihin ñáyivi cha iyó ñuu cha nyicú ityi cuan.

²Ta ra Juan nu ñohó ra vehe caa, ñihí ra tuhun cha sacuví ra Cristo. Tyicuan ta tachí ra chí uvi

ra nyicón chi ra, cundaca tuhun ra noo tuhun chi ra Jesús. Ta cachaa coyo ra nu nyaá ra ³ta cacatyí ra chi ra:

—¿Atu yoho cuvún ra Cristo cha tahán chi quichi sacacu chi ndi, o cuñí chi cha cuatu ndi chi inga ra? —cacatyí ra chi ra.

⁴Nacahan ra Jesús ta catyí ra:

—Cuhān ndo ta catyí ndo chi ra Juan cha nyehé ndo, ta cha chinií ndo. ⁵Nacatyí ndo chi ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuiñi ñu soho, ta ñu ndiyi nandoto ñu, ta chihin ñu ndahvi cahán ndi tuhun Nyoo yoso caa sacacu ra ñima ñu.

⁶Siñ xaan cuñí ñu ña chicá uvi iñi nyicón chii.

⁷Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyí ra:

—¿Ñáá cha chahān nyoho chinyehe ndo chiqui ndii cuan? ¿Atu chinyehē ndo noo ndoo cha naquisí tatyí? ¿Ñáá cha nyehē ndo?

⁸¿Atu nyehē ndo noo ra vaha ñihnó? Ñima. Nyoho chitó ndo vatyí ra ñihnó vaha, nyaá ra vehe rey. ⁹Tu tyicuan caa, ¿ñáá cha chahān ndo chi nyehe ndo? ¿Atu noo ra cuví profeta? Ican. Soco noo ra cha cahnu ca cuví ican saha noo profeta cuenda Nyoo. ¹⁰Vatyí ican ra Juan ihya, cuví cha cahán tuhun nu tutu Nyoo tyehe caa:

Yuhu cuví Nyoo ta tachí chi noo ra cahan tuhin ityi nuu nu cuhun.

Vatyí cucahan ra tuhun chihin ñáyivi nanasama ñu cuhva

iyó ñu ta cuatu tuhva ñu quivi quichun.

¹¹Cha ndicha catyí chi ndo, vatyí chichi cha tandihí ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyivi. Soco ra cha nyacá ñaha Nyoo ñima, vasi cuví ra noo ra luhlu ca, soco cahnu ca ra ta ñima ca ra Juan. ¹²Nyacua nya quivi cha chaā ra Juan ta nya vityin, cuaha ñu ndachan sahá chii nducú sativi ñu tuhun Nyoo, ña cuñí ñu cha cunyacá ñaha Nyoo ñima ñáyivi. ¹³Ra Moisés cahan ra tuhun yoso caa nyacá ñaha Nyoo ñima ñáyivi, ta tyicuan caa tucu tandihí ra profeta nyacua nya quivi quichi ra Juan. ¹⁴Ta tatu cuñí nyoho chino iñi ndo tuhun cahín, catyí chi ndo vatyí profeta Elías cha tahān chi quichi, ra Juan cuví ra. ¹⁵Yóó ñu cha cutuñi iñi, na tyasoho ñu tuhun cahín.

¹⁶¿Yóó chihin sandu inuu ri chi ñáyivi cha iyó tyembu ihya? Tari ra cuatyaa cuví ñu, vatyí chicunyaa ndotyin nuyahvi nyasiqui ndotyin, ta canachaa ndotyin chi ra tahan ndotyin, ta catyí ndotyin tyehe caa: ¹⁷“Tiví ndi flauta, soco ña chitā chaha ndo. Chitā ndi yaa cuihya soco ña chacū ndo.” Tyicuan caa tucu nyoho, ni noo cuhva ña tahán iñi ndo. ¹⁸Vatyí quichi ra Juan, cha ña chachi ra ta ña chihí ra, ta nyoho catyí ndo vatyí noo tatyí ña vaha yihí chi ra. ¹⁹Yahā cuan ta quichi tucu yuhu Rayii cha quichi nya gloria. Ta yuhu chachí ta chihí tandihí, ta catyí ndo tyi ra cuahyi ra tuhvá chihí cuví. Ta ña tahán iñi ndo cha cutahín chihin ra iyó

cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chi ñu naquehén tuhun cahin ta tuhun cahán ra Juan, ta maa ñu cusañaha chi ndo vatyí vaha cha chiñi tuñi Nyoo —catyí ra Jesús.

Uvi ñuu nu ña tyasohó ñáyivi tuhun Nyoo

(Lc. 10.13-15)

²⁰Tyicuan ta quichahá cahan ra Jesús chi ñu ñuu nu sacuví ra cuaha milagru, vatyí ñáyivi cuan ña canasamā maa ñu cuhva iyó ñu, ta catyí ra:

²¹—iNdahvi nyoho, ñu ñuu Corazin! iNdahvi nyoho ñu ñuu Betsaida! Vatyí nyehé ndo nyatu cahnu ta ña nasamā ndo cuhva iyó ndo. Soco ñáyivi ñuu Tiro ta ñuu Sidón cha sanaā Nyoo ta cha naha cha cuenda cuatyí ñu ñahri nyatu cahnu nyehē ñu. Soco tyehe ta nyehē ñu nyatu cahnu quívi cuan tari cha nyehé nyoho vityin, tañi tyehe ri ndihvi noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ²²Soco catyí chi ndo vatyí quívi cutuñi chi nyoho nuu Nyoo, cahnu ca cha uhvi cunyehe ndo ta ñima ca ñáyivi Tiro ta Sidón. ²³Ta nyoho ñu ñuu Capernaum, cuñí maa ndo tyi cundaa ndo nya andívi, soco cunoo ndo nya nu nyicú ñu ndívi. Vatyí tyehe ta cuví milagru ñuu Sodoma cuan, tahán cha cuví ñuu ndo, ñuu cuan coo ca nyacua nya vityin. ²⁴Soco catyí chi ndo vatyí quívi cutuñi chi nyoho,

yaha ca cunyehe ndo tindoho, ta ñima ca ñu ityi ñuu Sodoma cuan.

Cuhva ndo chi ndo chii, ta cuhve cha nyitatu ndo, catyí ra Jesucristo

(Lc. 10.21-22)

²⁵Tyembu cuan catyí ra Jesús chi Nyoo tyehe caa:

—Sutu Mañi yuhu, Nyoo, ra nyacá ñaha andívi ta ñuhu ñáyivi. Sacahní chuun vatyí sañahun tuhun maun chi ñu ñahri maa chitó. Ta tixehun tuhun maun chi ñu cha sahá tuhun tyi chitó xaan ta ñu chiñi tuñi ñandíhi. ²⁶Ndicha Sutu Mañi yuhu, vatyí tyicuan caa cuñí maun.

²⁷Tyicuan ta catyí tucu ra:

—Suti nacuhva cuenda ra tandíhi chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chi Suti, soco noo tuhun ri mai, cha cuví Sehe ra chii, ñohó nui chi ra. Ta ñáyivi cha cuñí mai cha cohon nuu chi ra, ican ñu cuan cua cohon nuu chi ra. ²⁸Tandíhi nyoho cha chitatu ndo cha sahá tyiño ndo, ta chihin carga cha nyisó ndo, quíchi ndo nu nyaí, ta yuhu cuhve cha nyitatu ndo. ²⁹Cuhva ndo cha cunyaca ñahi chi ndo ta cutuhva ndo cuhva iyó yuhu. Vatyí yuhu masu iñi ta cama iñi. Tyicuan caa ta ñihi ndo nu nyitatu añima ndo. ³⁰Ña yíi cha cuhva ndo chi ndo cha cunyaca ñahi. Ta carga cha chahí chi ndo, ñahma.

Nu tohón ra cachicá noo chihin ra Jesús yoco trigu quívi nyitatu ñáyivi

(Mr. 2.23-28; Lc. 6.1-5)

12 Noo quívi nyitatu ñáyivi, yaha ra Jesús mahñu nu iyó

cha tachí ñu. Ta chaꝞ soco chi ra cachicá noo chihin ra. Ta quichaha catohon ra yoco trigu cuan ta quichaha cachachi ra chiti yoco cuan. ²Cuhva cha cananyehe ra fariseo cha tyicuan caa, cacatyí ra chi ra Jesús:

—Nyehe, ra cachicá noo chuhun sacuví ra noo cha ña tahán chi sacuví yo quivi nyitatú yo —catyí ra chi ra.

³Soco maa ra Jesús catyí ra chi ra:

—¿Atu ta sacuaha ca nyoho cha sacuvi ra David chihin ra tahan ra quivi cha chisoco ra? ⁴Quihvi ra chichi vehe Nyoo. Ta quehen ra pan ii cha cha yahꝞ catuvi nuu Nyoo. Ta chachi ra ta ña tahán chi cachi ra, ni maa ra ni ra ndihi chihin ra, vatyí maa ri maa tata sutu tahán chi cachi pan cuan. ⁵¿O ta sacuaha ca ndo nu ley cha chahꝞ Nyoo chi ra Moisés nu catyí chi vatyí ra cacuví sutu, ña canyitatú ra quivi nyitatú yo, soco sahá tyiño ra chichi vehe ñuhu? Yucuan nyehé yo vatyí ñima cuatyí cuví cuan. ⁶Ta catyí chi ndo, vatyí ihya nyaá yuhu cha cuví noo ra cahnu ca ican saha vehe ñuhu. ⁷Nyoho, ta cutuñi ca iñi ndo nu catyí chi tyehe caa nu tuhun Nyoo: “Cha cuñi yuhu, cha cundahvi cuñi ndo nyehe ndo chi tahan ndo, ta ñima ca cha cahñi ndo quití ta cuhva cuenda ndo chii.” Tyehe ta cutuñi iñi ndo tuhun ihya, ma tyaa ndo cuatyí siqui ñáyivi cha ñahri sacuvi. ⁸Yuhu cuví Rayii cha quichí nya gloria. Ta iyó ityi chii vatyí catyí chi noo noo ndo ñáá cha sacuvi ndo quivi nyitatú yo —catyí ra Jesús.

Nu nduvahꝞ ra cha ityi ndaha

(Mr. 3.1-6; Lc. 6.6-11)

⁹Tyicuan ta quitꝞ ra Jesús yucuan, ta cuahan ra vehe ñuhu. ¹⁰Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyí siqui ra Jesús. Yucuan chaha candacꝞ tuhun ra chi ra ta catyí ra: —¿Atu cuví sanduvaha yo chi noo ñu cuhvi quivi nyitatú yo? —cacatyí ra chi ra Jesús.

¹¹Ta nacahan ra Jesús ta catyí ra: —¿Nya noo nyoho, tatu canacava noo mbee sana ndo chichi noo yavi quivi nyitatu yo, atu ma cahun ndo ta tava ndo chi ti? ¹²Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyí tahán chi sacuvi yo cha vaha quivi nyitatú yo —catyí ra.

¹³Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanacꝞ ra, nduvahꝞ ri ndaha ra tari inga chiyo cuan. ¹⁴Tyicuan ta caquitꝞ coyo ra fariseo cuandatuhun tahan ra yoso caa cacahñi ra chi ra Jesús.

Noo profeta, ra chahá cuenda tuhun cahán Nyoo, cahꝞn ra tuhun ra Jesús cha ni cumañi ca cacu ra

¹⁵Cha chitꝞ ra Jesús tuhun tyi canducú ra chi ra, quitꝞ ra yucuan ta cuaha ñáyivi chinyicoꝞ chi ra. Ta maa ra sanduvahꝞ ra chi tandihi ñu cuhvi. ¹⁶Ta catyí ra chi ñu tyi ma cahan ñu tuhun vatyí ican ra sanduvahꝞ chi ñu. ¹⁷Tyicuan caa cuví tacuhva nachino cava tuhun cha tyaa ra Isaías ra cuví profeta

Nyoo ta cha naha. Tyehe caa tyaa ra:

¹⁸ Ican ra ihya cuví ra sacuvi tyiño nui, ra cha nacachí vahi.

Cuñí xain chi ra, ta sii cuñí chihin ra.

Cusacuti chi ra chihin Tatyí li cha iyó chii.

Ta cusacoto ra chi ñáyivi cha ñima ñu Israel cuví yoso caa sacuvahi chi ñu nui.

¹⁹ Ta ma xaan cahan ra ta ni ma cana chaa ra, ta ni yori cuiñi ndusu ra ityi cahnu.

²⁰ Ta ni noo ndoo yacua, ta ma cahnu ndihi ra.

Ta ni ma ndahva ndihi ra mecha cha caña ñuhma.

Nyacua nya cha sanicoo vaha ra chi ñáyivi chihin ra ta cunyaca ñaha vaha ra ñima ñu.

²¹ Ta tandihi ñáyivi, ta chi ra cuquihi iñi ñu.

Nu catyí ñáyivi vatyí ra Jesús, tunyee iñi ra ña vaha iyó chi ra

(Mr. 3.20-30; Lc. 11.14-23; 12.10)

²² Tyicuan ta nu nyaá ra Jesús chinyacá ñu chi noo ra yihí tatyí ña vaha chi, cuaa ra ta ñihi ra. Ta ra Jesús sanduvahá ra chi ra. Ta cuví nacahan ra, ta cuví nanyehe ra. ²³ Iyo xaan cuñí tandihi ñáyivi, ta catyí ñu:

—¿Vasi ra vachi tata rey David cuví chi ra ihya? —catyí ñu.

²⁴ Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chi cuihna, tavá ra ihya tatyí ña vaha —catyí ra.

²⁵ Soco ra Jesús chitó ra cha cachicá xiñi ra, yucuan chaha catyí ra chi ra:

—Tatu noo gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha canyacá ñaha ra. O tatu noo ñuu o tandihi ñáyivi noo vehe cacusiin ñu chihin tahan ñu, cutivi nu nyicú ñu. ²⁶ Ta tyicuan caa tucu, tatu cuihna ta tava ra suri ra tahan maa ra, cuñí chi catyí vatyí ña iin ri cacuví ra, ta cundihi fuerza cha iyó chi ra. ²⁷ Ta nyoho catyí ndo vatyí yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóó cha chaha fuerza vatyí tavá ra tatyí ña vaha? Maa ra na sacoto ra chi ndo cha ndicha, vatyí nyoho tondo ri chicá xiñi ndo. ²⁸ Yucuan chaha catyí chi ndo, vatyí yuhu tave tatyí ña vaha chihin fuerza Tatyí li Nyoo. Ta cuñí chi catyí vatyí ndicha cuii Nyoo ra nyacá ñaha ñima ñáyivi cha chaá ra nu canyicú ndo.

²⁹ Chichi vehe noo ra ñihi xaan, tari cuihna, ma cuví quihvi noo ra ta quehen ra tandihi cha chii ra, soco tatu cuhni xihna ra chi ra tyicuan caa ta cuví tinyaa ra tandihi cha chii ra.

³⁰ Ñáyivi cha ña nyaá tumañi iñi chii, ñáyivi xaan iñi chii cuví ñu. Ta tatu ña tyinyeé ndo chii cha cahán ndo tuhun nuu ñáyivi, cuñí chi catyí vatyí ña chahá ndo cha coto ñáyivi tuhun cahín.

³¹ Yucuan chaha catyí chi ndo vatyí Nyoo sahá ra ticahnu iñi cuatyí ñáyivi, ta ñáá cha ña vaha cahán ñu ñandihí, soco cha cahan ña vaha ñu siqui Tatyí li Nyoo, yucuan ndicha, ma coo ticahnu iñi cha cuenda ñu. ³² Ta yóó ri ñu cha

cahán ña vaha siqui yuhu Rayii cha quichí nya gloria, coo ticahnu iñi chi ñu cha cuenda cuan. Soco ñu cahán ña vaha siqui Tatyí li Nyoo, ma coo maa ticahnu iñi chi ñu cha cuenda cuatyí cuan, niri ihya ñayivi, ta niri inga ñayivi ñandihí.

Chihin cha sacuvi ri ñáyivi ta nicohon nuu ri yo chi ñu tatu ñu vaha o ñu ña vaha cuví ñu

(Lc. 6.43-45)

³³Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nicohón nuu ri yo tatu yutun vaha cuví tun chihin chiti cha chahá tun. ³⁴iNyoho, ñu quiñi iyó, tari tata coo xaan cuví ndo! ¿Yoso caa cuví quitá tuhun vaha yuhu ndo, ta ñáyivi quiñi caa añima cuví ndo? Vatyí cha quitá chichi añima yo ican cuan cahán yo. ³⁵Noo ra vaha cahán ra tuhun vaha vatyí ñohó cha vaha añima ra. Ta ra quiñi iyó, maa maa ri tuhun quiñi caa cahán ra, vatyí cha quiñi caa ñohó añima ra. ³⁶Ta yuhu catyí chi ndo vatyí quivi cutuñi chi tandihí ñáyivi, cucuhva ñu cuenda tandihí tuhun cha ña saha ñu cuenda ta cahán ñu. ³⁷Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñi ñu nyehe ñu seña milagru

(Mr. 8.12; Lc. 11.29-32)

³⁸Tyicuan ta suhva ra fariseo ta ra sacuahá ley vehe ñuhu cacatyí ra chi ra Jesús tyehe caa:
—Maestro, cuñi ndi vatyí sacuvun noo seña milagru vatyí nyehe ndi.

³⁹Ta nacahan ra Jesús ta catyí ra:
—Ñu quiñi iyó ta ñu nyicón inga nyoo cuñi ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu. ⁴⁰Vatyí tari ñohó ra Jonás chichi tiyaca cahnu cuan uñi quivi ta uñi ñuu, tyicuan caa cucohon yuhu Rayii cha quichí nya gloria chichi ñuhú uñi quivi ta uñi ñuu. ⁴¹Ta quivi cucutuñi chi tandihí ñáyivi, cundicuita ñu chiyo ñuu Ninive ta cha naha ta cucatyí ñu na tachi tuñi Nyoo chi nyoho ñáyivi cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Nínive, canasama ñu cuhva iyó ñu quivi cahán ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás. ⁴²Vatyí tyicuan caa tucu ñaha cha cuvi reina ityi Sur, cundicuita ña quivi cucutuñi chi ñáyivi ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichí ña, quichí tyasoho ña tuhun cha chiñi tuñi ra Salomón. Ta ihya cahnu ca cuvi ra cha cahán chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha añima ñáyivi tatu naa iñi ñu chi Nyoo

(Lc. 11.24-26)

⁴³Tatu noo tatyí ña vaha quita chi añima noo rayii, chicá noo chi noo nu ityi, nanducú chi noo nu nyitatu chi, soco ña nañihi chi nu nyitatu chi. Tyicuan ta ndichi xiñi chi: ⁴⁴“Cunuhu tiqui nya vehi nu quite.” Yucuan ta nachaa chi añima ra nu quita chi. Ta nanyehe

chi vatyi ndii xaan, ta yori nyaá.

⁴⁵Tyicuan ta cuanaquehen chi ucha ca tahan tatyí ña vaha, cha yaha ca cuhva ican saha maa chi. Tyicuan ta quihvi tandíhi tatyí ña vaha cuan añima ra cuan. Yucuan chaha, quiñi ca cunicoo ra ta ñima ca cuhva chiyo maa ra. Ta tyicuan caa cucuvi chi ñáyivi quiñi iyó ihya —catyí ra Jesús.

Tari yañi ra Jesús ta tari sihi ra cuví chi ñáyivi sacuví cuhva catyí Nyoo

(Mr. 3.31-35; Lc. 8.19-21)

⁴⁶Ni cahán ca ra Jesús chihin ñáyivi, ta chaá sihi ra ta yañi ra, ta ndoo ñu chata vehe, ta cuñí ñu cahan ñu chihin ra. ⁴⁷Tyicuan ta sacoto noo ñáyivi nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñí ñu cahan ñu chuhun.

⁴⁸Tyicuan ta nacahan ra Jesús ta catyí ra chi ñu:

—¿Yóo cha cuví sihi ta yañi? —catyí ra.

⁴⁹Tyicuan ta sañahá ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi.

⁵⁰Vatyi tandíhi ñáyivi cha sacuvi cuhva cuñí Suti ra nyaá andívi, ican ñu cuan cuví yañi, ta cuhve, ta sihi —catyí ra Jesús.

Tari noo ra chicá noo tachí, tyicuan caa cuví ra cahán tuhun Nyoo chihin ñáyivi

(Mr. 4.1-9; Lc. 8.4-8)

13 Quivi cuan quita ra Jesús vehe ra ta chicunyaá ra yuhu miñi. ²Ta chaha cha cuaha ñáyivi nataca nu nyaá ra, quihvi ra

chichi noo canoa ta chicunyaá ra. Ta tandíhi ñáyivi ndoo ñu nyicú ñu nu ñiti cuan. ³Tyicuan ta cuaha ri cha quichaha sañahá ra chi ñu chihin noo cuhva ta catyí ra:

—Noo chaha quita noo ra, tachí ra chiti trigu. ⁴Ta nu cuahan ra quití ra chiti cuan, canacoyo suhva chiti cuan yuhu ityi. Ta quichí coyo saa ta cachachí ti. ⁵Ta suhva ca canacoyo ticu yuu, nu ña cuaha ñuhú yihí. Ta yucuan caña chiti cuan cha numi ri vatyi ña cuaha ñuhú yihí chaha. ⁶Soco cuhva cha caña ñanyii iin na ityi ri tun, vatyi ña cono yihí yoho tun. ⁷Suhva ca chiti canacoyo ticu iñu. Ta chahnu iñu cuan. Ta chasí chi nuu tun. Yucuan chaha ña chiyo chiti tun.

⁸Soco suhva ca canacoyo nu ñuhú vaha. Ta quiivi cachahnu tun, vaha xaan cachahá tun chiti, vatyi yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chahá tun. ⁹iTatu cutuñi iñi ndo, tyásoho ndo!

Nu sacoto ra Jesús ñáá tuhun cha chihin cuhva ri cahan ra ta ña cahán cachi ra

(Mr. 4.10-12; Lc. 8.9-10)

¹⁰Tyicuan ta tuhva ra cachicá noo chihin ra Jesús, ta candaca tuhun ra chi ra, ta catyí ra:

—¿Ñáá tuhun cha chihin cuhva ri cahún chihin ñáyivi, ta ña cahán cachun chihin ñu? —cacatyí ra.

¹¹Ta nacahan ra Jesús ta catyí ra: —Chi nyoho sacotó Nyoo tuhun xehe, yoso caa nyacá ñaha ra, soco chi maa ñu ña chahá ra cha coto ñu. ¹²Vatyi ñáyivi cutuñi iñi

tuhun cahín ta sacuví ñu, cuaha ca cucutuñi iñi ñu. Ta ñáyivi cha chiin ri cutuñi iñi, ta ña cuñi ñu sacuvi ñu, cutinyaa ndihi cha cutuñi iñi ñu. ¹³Yucuan chaha vatyi chihin cuhva ri cahín chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan. ¹⁴Ta tyicuan caa ta chinó cava tuhun cha cahán ra Isaías ra profeta Nyoo ta cha naha, ta catyí ra:

Cha ndicha vatyi nyoho cuiñi ndo tuhin, soco ma cutuñi iñi ndo.

Ta cunyehe ndo cha sacuví, ta ma cutuñi iñi ndo.

¹⁵Vatyi cha ndundava ñanima ñáyivi ihya, ta ña cachi vaha chiñi ñu.

Ta tahán nuu ñu,

Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin ñanima ñu.

Ta ni ma nanducu ñu chii, tacuhva sanduvahi chi ñu.

¹⁶Soco sii xaan cuví chi nyoho, vatyi nyehé ndo chihin chiti nuu ndo, ta chiñi ndo chihin soho ndo. ¹⁷Cha ndicha catyí chi ndo, vatyi cuaha ra cacuvi profeta Nyoo ta cuaha ñáyivi vaha, cacuñi ñu nyehe ñu cha nyehé nyoho cha sacuví, soco ña nyehe ñu. Cuñi ñu cuiñi ñu tandihi tuhun cha chiñi nyoho vityin, soco ña chiñi ñu.

Nu catyí ra Jesús ñáa cha cuñi chi catyí cuhva cha cahán ra

(Mr. 4.13-20; Lc. 8.11-15)

¹⁸Tyasoho ndo ñáa cha cuñi chi catyí noo cuhva cha catyí chi ndo

tuhun ra cha tachí chiti trigu cuan:

¹⁹Ñáyivi cha chiñi tuhun yoso caa cuñi Nyoo cunyaca ñaha ra ñanima ñu, ta ña cutuñi iñi ñu, tari nu canacoyo chiti yuhu ityi, tyicuan caa cuví ñu. Vatyi quichi cuihna ta tava ra tuhun Nyoo cha caa ñanima ñu. ²⁰Ta tari nu canacoyo chiti ticu yuu cuan, tyicuan caa cuví tucu ñáyivi cha chiñi tuhun Nyoo, ta sii xaan cuví chi ñu naquehen cuenda ñu noo ri cuhva. ²¹Vatyi nu caña chiti ticu yuu cuan, chiin ri ñuhú yihí chaha. Yucuan chaha caña soco ña cuví tyihi yoho chi. Ta tyicuan caa ñu cuan. Suhva ri quivi chinó iñi ñu. Soco quivi cha quichaha nyehe ñu tindoho, ta satasi iñi ñáyivi chi ñu cha cuenda tuhun Nyoo ta sandihi ri ñu tuhun cha chinó iñi ñu. ²²Ta tari nu canacoyo chiti chichi iñu cuan, tyicuan caa cuví tucu inga ñu cha chiñi tuhun Nyoo. Chiñi ñu, soco ña cuñi ñu sacuvi ñu tari cuhva chiñi ñu. Vatyi nyaá xaan ca xiñi ñu tuhun tindoho ñayivi ican saha tuhun Nyoo. Ta nyiyo ca iñi ñu cha tyayii. Ta tandihi tuhun cuan sayanga chi chi ñu, ta ña chahá nanducu vaha ñu chi Nyoo. ²³Soco tari nu canacava chiti nu ñuhu vaha, tyicuan caa cuví ñu chiñi tuhun Nyoo, ta cutuñi iñi ñu, ta sacuvi ñu tandihi tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

²⁴Ta chaha tucu ra Jesús inga cuhva ihya chi ñu; ta catyí ra:

—Cha nyacá ñaha Nyoo añima ñáyivi cuví chi tari noo ra cha tachí chiti trigu nu noo ñuhú. ²⁵Soco cuhva cha caquixí tandihi ra casahá tyiño cuan, quihvi noo ra xaan iñi chi ra, ta tachí ra chiti cuhu ña vaha, ta cuahan ra. ²⁶Ta quivi caña chiti trigu cuan, ta caña yoco chi, ta yucuan na tuvi tucu cuhu ña vaha cuan. ²⁷Tyicuan ta ra cacuví musu, cachahan ra chicatyí ra chi chitoho ra: “Tata, tatu maa maa ri maa chiti trigu tachun, ¿nya quita cuhu ña vaha cuan?” cacatyí ra. ²⁸Ta nacahan ra cuan ta catyí ra: “Iyó noo ra xaan iñi chi yo tachí.” Tyicuan ta musu cuan, catyí ra chi chitoho ra: “¿Atu cuñín cha cuhun ndi ta tohon ndi cuhu ña vaha cuan?” ²⁹Soco chitoho ra catyí ra: “Ma tohon ndo, coto cuhva cha tohon ndo cuhu ña vaha cuan, ta coyo ndihi trigu cuan. ³⁰Saña ndo, na cuahnu maa chi iin ri chihin trigo cuan, tyicuan ta quivi cunicoñehi tyiño sahí, cutachi chi ra casaha tyiño cutohon xihna ca ra cuhu ña vaha cuan ta cuhni ra cuenda sucun, vatyí cahmi ra. Ta yaha cuan ta canaquehen vaha ra cha vaha cuan chichi yaque.”

Nu catyí ra Jesús vatyí tari chiti mostaza cuví cha nyacá ñaha Nyoo añima yo

(Mr. 4.30-32; Lc. 13.18-19)

³¹Tyicuan ta catyí tucu ra Jesús inga cuhva ihya chi ñu:

—Cha nyacá ñaha Nyoo añima ñáyivi cuví chi tari noo chiti yutun cha nañí mostaza cha tachí noo ra nu ñuhú ra. ³²Vatyí ican chiti cuan cuví cha luhlu ca ican saha tandihi

ca chiti. Soco quivi chahnu tun cuví tun noo yutun cahnu vavaha. Ta quichí coyo saa, ta casavahá ti taca ti nuu tun —catyí ra Jesús.

Nu catyí ra Jesús vatyí tari yuchan iya cuví cha nyacá ñaha Nyoo añima ñáyivi

(Lc. 13.20-21)

³³Ta catyí tucu ra Jesús inga cuhva ihya:

—Cha nyacá ñaha Nyoo añima ñáyivi cuví chi tari yuchan iya cha nasaca noo ñaha chihin uñi cuhva yutyí pan. Vatyí tari ndaa tandihi pan cuan chihin yuchan iya cuan, tyicuan caa cuahan nducuaaha ca ñu nyacá ñaha Nyoo añima —catyí ra.

Yoso caa chotyíño ra Jesús noo cuhva cha cahán ra

(Mr. 4.33-34)

³⁴Tandihí tuhun ihya cahan ra Jesús chihin ñáyivi chihin cuhva ri. Ta tandihí tuhun cha catyí ra chi ñu soco maa maa ri chihin noo cuhva ri. ³⁵Tyehe caa sacuvi ra tacuhva chino cava tuhun cha cahán ra profeta ta cha naha ta tyaa ra tyehe caa:

Chihin cuhva ri cucahin chihin ñáyivi.

Cucatyí chi ñu tuhun cha ñohó xehe nyata savaha Nyoo ñuhu ñáyivi.

Nu catyí ra Jesús ñáa cha cuñí chi catyí tuhun cuhu ña vaha cha caña mahnu chiti trigu cuan

³⁶Tyicuan ta sacunuhu ra Jesús chi ñáyivi, ta ndihvi ra chichi vehe. Ta catuhva ra cachicá noo chihin ra chi ra, ta catyí ra chi ra:

—Nacatyí chi ndi ñáá cha cuñí chi catyí tuhun cha caña cuhu ña vaha cuan nu ñuhu cuan.

³⁷Tyicuan ta quichaha catyí ra Jesús chi ra:

—Ra cha tachí chítí trigu cuan ican cuví yuhu Rayíi cha quichí nya gloria. ³⁸Ta ñuhú cuan, ican cuví añima ñáyivi iyó siqui ñuhu ñáyivi. Ta chítí trigu cuan ican cuñí chi catyí ñáyivi cha nyicón chi Nyoo, ta chítí cuhu ña vaha cuan cuñí chi catyí ñáyivi cha nyacuví cuhva cuñí ra ña vaha.

³⁹Ra cha tachí cuhu ña vaha cuan, ican cuví cuihna ra xaan iñi chi Nyoo. Ta quívi cunacoñehe ra tyiño saha ra, ican cuví quívi cucunaa ñuhu ñáyivi. Ta ra cha cunacoñehe chítí cuan, ican cuví ra cacuví ángel. ⁴⁰Tari nasatacā ra cuhu ña vaha cuan vatyí cayu chí, tyicuan caa cucuvi quívi naa ñáyivi. ⁴¹Yuhu Rayíi cha quichi nya gloria cutachi chí ángel cunasataca ra chí ñu sacoo cuatyí inga ñu, ta ñu cha sacuví cha ña vaha. ⁴²Ta cutyihí ra chí ñu chichi horno nu cayú ñuhu. Ta cucuacu ñu ta cusacahñi ñu noho ñu. ⁴³Ta ñu cha sacuví cuhva cuñí Nyoo cutuvi ñu nuu Nyoo Sutu yo. Ta tari cha ndichin ñanyii, tyicuan caa cucuvi ñu. Tatu cutuñí iñi ndo, tyasoho ndo tuhun cahín.

Noo xuhun cuaan cha ñohó xehe

⁴⁴Cha nyacá ñaha Nyoo añima ñáyivi cuví chí tari noo xuhun cuaan ñohó xehe chichi ñuhú. Ta noo ra nañihí xuhun cuaan cuan, soco natyihí xehe tucu ra inga chaha ta siñ xaan cuñí ra cuanuhu ra ta xico ra tandíhi cha iyó chí ra,

ta satā ra ñuhu nu ñohó xehe xuhun cuaan cuan.

**Noo cuhva cha cahan ra
Jesús cuenda noo perla
cha yahvi xaan nyaá**

⁴⁵Ta cha nyacá ñaha Nyoo añima ñáyivi, cuví tucu chí tari noo ra satá ta naxicó perla finu. ⁴⁶Ta cuhva cha ñihí ra noo cha yahví vavaha nyaá, ta xico ra ndii maa cha cumí ra, ta satā ra perla vaha cuan.

**Nu sañahá ra Jesús noo
cuhva cuenda tarraya**

⁴⁷Ta suri cuví tucu cha nyacá ñaha Nyoo añima ñáyivi tari tarraya cha cañí ra nu tyañuhu, ta ñihí ra ndíhi nuu tiyaca chihin. ⁴⁸Ta cuhva cha chitū tarraya cuan chihin tiyaca, catavā ra ityí nu ñíti, ta yucuan canacachí ra chí tí, canaquehen vaha ra chí quítí vaha chichi noo tica, ta sacuitā ra chí quítí ña vaha cuan. ⁴⁹Ta tyicuan caa cucuvi quívi naa ñáyivi, cuquichi coyo ángel, quichi tava siñ ra chí ñu vaha ta ñu ña vaha. ⁵⁰Ta cutyihí ra chí ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

**Nu sañahá chí vatyí vaha tuhun
chahnu ta tuhun chaa Nyoo**

⁵¹Tyicuan ta ra Jesús ndacā tuhun ra chí ra cachicá noo chihin ra, ta catyí ra:

—¿Atu cutuñí iñi ndo tandíhi tuhun ihya?

Ta nacahān ra ta cacatyí ra:

—Ay, Sutu Mañi yuhu. Cutuñí iñi ndi.

⁵²Tyicuan ta catyí ra Jesús chi ra:
—Tatu noo ra sacuahá cuenda ley
vehe ñuhu, ta cutuhva ra tuhun yoso
caa nyacá naha Nyoo añima ñáyivi,
cumí ra cha vaha tuhun chahnu Nyoo,
ta cumí tucu ra tuhun chaa cha sañahí.
Ta cuví ra tari noo ra cuví nuu, ra chító
ta sañahá ra tuhun chahnu ta tuhun
chaa cha sañahí —catyí ra Jesús.

**Nu ñohó ra Jesús Nazaret ñuu nu
chahnu ra**

(Mr. 6.1-6; Lc. 4.16-30)

⁵³Ndihí cahan ra Jesús cuhva
ihya ta cuahan ra. ⁵⁴Ta nachaa ra
ñuu ra. Ta yucuan quichaha sañaha
ra chichi vehe ñuhu ñuu cuan. Ta
iyo cuñí ñáyivi ta catyí ñu:

—¿Nya maa maa cutuhva ra ihya cha
chiñi tuñi xaan ra? ¿Ta yoso caa cuví
sacuvi ra milagru? ⁵⁵Vatyí sehe ra satyá
vitu cuan cuví chi ra. Ta cu María cuví
sihi ra. Ta yañi ra cuví chi ra Jacobo, ta
ra José, ta ra Simón ta ra Judas. ⁵⁶Ta
cuhva ra ñandihí, iyó ñu ityi nu iyó yo.
Tu tyicuan caa, ¿nya maa maa cutuhva
ra tandihí tuhun ihya? —catyí ñu.

⁵⁷Ta yucuan chaha ña cuñí ñu
quichaha ñu chi ra. Soco ra Jesús
catyí ra chi ñu:

—Tandihí ñáyivi tandihí ri ityi sahá
ñu ñáyivi chi ra profeta. Soco ña
quichahá ñu chi ra tatu ra ñuu ñu, o ra
vehe ñu cuví chi ra —catyí ra.

⁵⁸Ta ña cuaha milagru sacuvi ra
yucuan cha cuenda vatyí ña chinó
iñi ñu chi ra.

**Nu catyí chi yoso caa chihí ra Juan
ra sacondutya**

(Mr. 6.14-29; Lc. 9.7-9)

14 Quiví cuan ra Herodes, ra
cuví gobiernu nicahnu nu

cuví Galilea, ñihí ra tuhun ra Jesús.

²Ta catyí ra chi ra nyicú chihin ra:

—Ican ra cuan cuví ra Juan ra
sacondutya chi ñáyivi, ra cha chihí
ta vityin nandoto ra. Yucuan chaha
iyó tunyee iñi chi ra cha sacuví ra
milagru.

³⁻⁴Tyicuan caa catyí ra vatyí suri
maa ra tyihí tyiño ta catiñ ra chi
ra Juan. Ta chahñi ra chi ra chihin
cadena, ta tyihí ra chi ra vehe caa.
Tyicuan caa sacuvi ra tyi xaan cuñí
ra tyi catyí ra Juan tyi ña vaha cha
nyaá ra chihin cu Herodías cha
cuví ña ñasihi yañi ra ra Felipe.

⁵Ta yucuan chaha, ra Herodes,
cuñi ra cahñi ra chi ra Juan, soco
yuhvi ra chi ñáyivi, vatyí tandihí
ñu chinó iñi ñu tyi ra Juan cuenda
Nyoo cahán ra. ⁶Soco noo quiví
cha vico ra Herodes, ta quichahá
chita chaha sehe cu Herodías nu
nyicú ñu vico cuan. Ta tahañ xaan
iñi ra Herodes. ⁷Ta tyaa ra cuhva
vatyi cuhva ra ñáá ri cha cacan
ñaha tyivaa cuan, ta ma nacahnu ra
tuhun cahan ra. ⁸Tyicuan ta tyiyuhú
sihi ña chi ña, na catyí ña chi ra
Herodes tyehe caa:

—Cuhva xiñi ra Juan ra
sacondutya ñáyivi chii nu noo coho
—catyí ña.

⁹Cha chiñi rey Herodes tuhun
cahñ ña, nducuihya cuñi ra. Soco
cha cuenda cha tyaa ra cuhva vatyí
cuhva ra ñáá ri cha cacan ña nuu
ñu canyicú vico cuan ta ma cuví
nacadnu ra, yucuan chaha tachí
ra nacuhva ra xiñi ra Juan chi ña.
¹⁰Ta tachí ra tyiño na cutahnya
sucun ra Juan nu ñohó ra vehe caa.
¹¹Tyicuan ta caquichí nyaca ra xiñi
ra, yihí noo nu coho. Ta cachaha ra

chi ñaha tyivaa cuan. Ta maa ña nacuhvā cuenda ña chi sihi ña.

¹²Tyicuan ta chaq coyo ra canyicoñ chi ra Juan ta canaquehen ra coño ñuhu ra, ta catyihī ra chichi ñuhu. Ta yaha cuan ta chahan coyo ra chisacoto ra chi ra Jesús.

Nu chahá ra Jesús cha cachi ohon mil rayii

(Mr. 6.30-44; Lc. 9.10-17; Jn. 6.1-14)

¹³Cha chito ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chito ri ñáyivi, ta quita coyo ñu ñuu ñu, ta cuahan coyo ñu chata ra ityi nu ñuhú. ¹⁴Cha quita ra Jesús chichi canoa cuan, nanyehē ra cuaha xaan ñáyivi. Ta cundahvi xaan cuñi ra nyehé ra chi ñu. Ta sanduvahā ra chi ñu cuhvi cha chaq chihin ñu. ¹⁵Ta vatyī cha cua cuaq, ra cachicá noo chihin ra Jesús chaa coyo ra, ta catyí ra chi ra:

—Cha iñi xaan, ta yori ñáyivi iyó yatyin ri ihya. Yucuan cuenda nātachi chi ñáyivi ihya na cunuhu coyo ñu nya ñuu cusata ñu cha cachi ñu —cacatyí ra chi ra Jesús.

¹⁶Ta ra Jesús catyí ra:

—Ña tahán chi cuhun ñu. Cuhva maa ndo cha cachi ñu.

¹⁷Ta nacahan ra ta cacatyí ra:

—Noo tuhun ohon tahan siin pan ta uvi tahan siin tiyaca cumí ndi.

¹⁸Ta catyí ra Jesús:

—Nyāca ndo chii.

¹⁹Tyicuan ta tachī ra tyiño na cunyicu ñáyivi nu cuhu cuan. Yaha cuan ta quehen ra ohon tahan pan cuan, ta ni nduvi tiyaca cuan. Ta nanyehē ndaa ra andivi, ta nacuhvā ra tyahvi nyoo chi Nyoo ta tahvi

ra pan cuan. Ta chahā ra chi ra cachicá noo chihin ra, na casacha ra chi ñáyivi cuan. ²⁰Ta tandihī ñu cachachī ñu ta ndaha iñi ñu. Yaha cuan ta canasatacā ra yiquin cha ndoo. Ta quita uchi uvi tahan tica. ²¹Ta cha tandihī ñu cachachī cuan, quita ta cha ohon mil cha maa ri maa rayii. Ta ña quihvi cuenda ñusihi ni ra cuatya.

Nu chicá ra Jesús nu ndutya

(Mr. 6.45-52; Jn. 6.16-21)

²²Ta cha yaha tuhun cuan ta catyí ra Jesús chi ra cachicá noo chihin ra, na quihvi coyo ra chichi canoa, vatyī cayaha sava ra miñi cuan ta cuhun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chi ñáyivi na cuhun coyo ñu. ²³Cha yahā cha natachī ra chi ñu cuan, ta ndaa ra yucu cuan cua cacān tahvi noo tuhun ri maa ra chi Nyoo. Ta yucuan ñohó ra ta cuaa ndihī. ²⁴Ta cha ni ri ca cha chicán tahvi ra cha cuahan vavaha canoa cuan nya mahñu miñi. Ta ndutya miñi cuan cañi chi chi canoa cuan cha cuenda vatyī ñihi xaan caá tatyī nu cuahan coyo ra. ²⁵Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya. ²⁶Ta cuhva cha cananyehē ra chi ra, chicá ra nu ndutya cuan, canayuhvi xaan ra. Ta cacana chaa vavaha ra, ta catyí ra: —iNoo cha sayuhvi cuví!

²⁷Soco nacahan ra Jesús chihin ra, ta catyí ra:

—iSanii ndo iñi ndo, yuhu cuví, ma yuhvi ndo! —catyí ra.

²⁸Tyicuan ta nacahan ra Pedro ta catyí ra:

—Sutu Mañi yuhu, tatu icon cuvún, catyí na quichi yuhu nu ndutya chiña nyacia nya nu vachun.

²⁹Ta ra Jesús catyí ra chi ra:

—Ñaha.

Tyicuan ta noo ra Pedro nu canoa cuan, ta quichaha chica ra nu ndutya vatyí cuhun ra nu vachi ra Jesús.

³⁰Soco cuhva cha tuvī iñi ra tyi ñihi xaan fuerza tatyí cuan, nayuhvi ra ta quichaha nducu nyee ra, ta quichaha cana chaa ra ta catyí ra:

—iSacacu chii, Sutu Mañi yuhu!

³¹Ta caa cuhva ri cuan, ta tiñ ra Jesús ndaha ra, ta catyí ra chi ra:

—iChiin xaan chinó iñun chii!

¿Ñáá tuhun cha nacaca uvi iñun? —catyí ra Jesús chi ra.

³²Ta cuhva cha ndaa coyo ra nu canoa cuan, cutaxin ri tatyí cuan. ³³Tyicuan ta ra cañohó chichi canoa cuan cachicuiñi chiti ra nuu ra Jesús, ta cacatyí ra chi ra:

—Ndicha ndicha cuii vatyí Sehe Nyoo cuví chuun —cacatyí ra.

Nu sanduvaha ra Jesús chi ñu cuhví ñuu cha nyicú nicacahnu Genesaret

(Mr. 6.53-56)

³⁴Cha cayaha sava ra miñi cuan, cacha coyo ra nu cuví Genesaret.

³⁵Ta cuhva cha canicoñon nuu ñáyivi iyó yucuan chi ra Jesús, sacoto ñu chi tandihi ñáyivi ityi cuan. Ta quichi nyaca ñu tandihi ñu cuhví nu nyaá ra. ³⁶Ta chacú ndahvi ñu nuu ra, na cuhva ra tiñ ñu vasi chiin sahma ra. Ta tandihi ñu tiñ sahma ra, nduvaha ñu.

Nu sañahá chi ñáá cha sativí chi ñáyivi

(Mr. 7.1-23)

15 Tyicuan ta suhva ra cacuví fariseo ta ra casacuahe ley

vehe ñuhu quita coyo ra Jerusalén. Ta chaa coyo ra nu nyaá ra Jesús ta candaca tuhun ra chi ra, ta catyí ra:

²—¿Ñáá tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyí ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

³Soco ndaca tuhun ra Jesús chi ra, ta catyí ra:

—¿Ñáá tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo? ⁴Vatyí Nyoo catyí ra: “Saha ndo ñáyivi chi sutu ndo ta chi sihi ndo. Ta tandihi ñu cha cahán ña vaha chi sutu o chi sihi, na cúvi ñu”, catyí Nyoo. ⁵Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyehe caa: “Ma cuví tyinyei chuun vatyí tandihi cha iyó chii cha yaha chaha cuende chi Nyoo.” ⁶Ta tatu cha catyí ndo tyicuan caa, ña cuñi ca chi cha tyinyee ca ndo chi sutu ndo o chi sihi ndo, catyí ndo. Ta tyicuan caa sacuachiyó xiin ndo tuhun cha catyí Nyoo tyi sacuvi ndo, vatyí cuñi ndo sacuvi maa ndo cuhva costumbre maa ndo. ⁷iNyoho cha sahá ndo tyi vaha ndo! Ndicha vaha tuhun cha tya ra Isaías, ra profeta Nyoo ta cha naha nu catyí Nyoo tuhun ndo tyehe caa:

⁸Ñáyivi ihya, chihin yuhu ri ñu catyí ñu tyi cuñi ñu chii.

Soco ñima chihin tandihi añima ñu, tyi siin nu nyaá xiñi ñu.

⁹Ta ñahri maa tuhun cha sacahnú ñu chii.

Vatyí cha sañahá ñu maa maa ri cuhva sañahá ñáyivi ri cuví,

tyehe caa tyaa ra Isaías tuhun ndo, catyí ra Jesús.

¹⁰Tyicuan ta cana ra chi ñáyivi ta catyí ra chi ñu:

—Tyasoho ndo, ta cutuñi iñi ndo tuhun cahín. ¹¹Vatyí cha quihví yuhu ñáyivi, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹²Tyicuan ta catuhva ra cachicá noo chihin ra Jesús ta candaca tuhun ra chi ra, ta catyí ra:

—¿Atu chitón vatyí ra fariseo quiñi xaan cuñí ra cha cachiñi ra tuhun cahún?

¹³Soco maa ra Jesús nacahan ra:

—Tandihí yutun cha ña tachí Suti, ra nyaá andívi, cucoyo tun nya yoho tun. ¹⁴Saña ndo chi ra vatyí ra cuaa cacuví ra, ta casañahá ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cucanacoyo ra chichi noo yavi.

¹⁵Tyicuan ta quichaha catyí ra Pedro chi ra Jesús:

—Ñacatyí chi ndi ñáá cha cuñí chi catyí cuhva cha cahun cuan.

¹⁶Tyicuan ta ra Jesús catyí ra chi ra:

—¿Atu ni nyoho ta ña cutuñi iñi ndo? ¹⁷¿Atu ña cutuñi iñi ndo vatyí cha quihví ityi yuhu yo, chichi yo cuahan? Yahá cuan ta quita tucu. ¹⁸Soco tuhun cha quitá yuhu yo, chichi añima yo quitá, ta ican cuan cuví cha sativí chi ñáyivi nuu Nyoo. ¹⁹Vatyí nya chichi añima ñu quitá cha quiñi caá chicá xiñi ñu. Ta cuñun, cha chahñi ñu chi ñáyivi, cha quichi cuvi iñi ñu coo ñu chihin inga ñu cha ñima ñasihi ñu cuví. Ta tandihí ca cha quiñi

caa cha sacuvi ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu. ²⁰Ican cuan cuví cha sativí chi ñáyivi. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu nachino iñi noo ñaha inga ñuu chi ra Jesús

(Mr. 7.24-30)

²¹Quitá ra Jesús ñuu cuan ta cuahan ra ityi ñuu Tiro ta ñuu Sidón. ²²Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyí sehi yihí noo tatyí ña vaha chi ña, ta nyehé xaan ña tindoho —catyí ña.

²³Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Çatyí chi ña na cunuhu ña vatyí caná chaa xaan ña vachi ña chata yo.

²⁴Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

²⁵Soco ñaha cuan tuhva ña ta chicuñi chiti ña nuu ra ta catyí ña chi ra:

—Sutu Mañi yuhu, ityinyee chii!

²⁶Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

²⁷Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha canacoyo nu mesa chitoho ti — catyí ña.

²⁸Tyicuan ta catyí ra Jesús chi ña: —Sihi iñana cha chinó xaan iñun chii! Cua sacuvi tari cuhva cuñún.

Ta caa cuhva ri cuan ta nduvaha sehe ña.

Nu sanduvaha ra Jesús cuaha ñu cuhví

²⁹Quita ra Jesús yucuan ta yaha ra yuhu miñi Galilea, ta ndaa ra noo yucu ta chicunyaá ra yucuan.

³⁰Ta cuaha ñáyivi chaá coyo nu nyaá ra ta quichi nyaca ñu cuaha ñu cuhví: ñu coxo, ñu cuaa, ñu luu, ñu ñihi. Ta cuaha ca ñu cuhví quichi nyaca ñu nu nyaá ra. Ta chacun ñu chi ñu nuu ra, ta maa ra sanduvaha ra chi ñu. ³¹Ta iyo cuñí ñáyivi nyehé ñu yoso caa nacahan ñu ñihi ta yoso caa nduvaha ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayii

(Mr. 8.1-10)

³²Tyicuan ta cana ra Jesús chi ra cachicá noo chihin ra, ta catyí ra chi ra:

—Ndahvi xaan cuñí nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñí natachi chi ñu nya vehe ñu vatyí

ta cachi ca ñu, coto coñaa ñu ityi cunuhu ñu —catyí ra Jesús.

³³Tyicuan ta ra cachicá noo chihin ra cacatyí ra chi ra:

—Soco ñnya cuquehen yo cha cachi ñáyivi cuaha ihya, nu yori maa ñáyivi iyó ihya?

³⁴Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

³⁵Tyicuan ta tachí ra na cunyicu

ñáyivi cuan nu ñuhú. ³⁶Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi Nyoo. Tyicuan ta tahvi ra ta chaha ra chi ra cachicá noo chihin ra, ta maa ra cachicá noo chihin ra canasacha ra chi ñáyivi.

³⁷Tandíhi ñu chachi ñu, ta chitu chichi ñu. Ta yaha cuan casacutu ra ucha tica chihin yiquin cha ndoo cuan. ³⁸Cumi mil rayii cachachí, ta ña quihvi cuenda ñusihí ni ri ra cuatyaa. ³⁹Yaha cuan ta sacunuhu ra chi ñáyivi, ta quihvi ra nu canoa, ta cuahan ra ityi nu cuví Magdala.

Ra fariseo ta ra saduceo cachicán ra chi ra Jesús na sacuvi ra noo milagru

(Mr. 8.11-13; Lc. 12.54-56)

16 Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñí ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo. ²Soco nacahan ra Jesús ta catyí ra chi ra:

—Cha cha iñi cuhva cha cuaa quee ñanyii, tuhvá ndo catyí ndo: “Vaha xaan cucuvi quivi tyaan, vatyí tyaqui xaan cuaha andívi.”
³Ta cha ñaha ri catyí ndo: “Vityin ña tyaqui maa cucuvi quivi vatyí cuaha ta iñi ñaa xaan andívi”, catyí ndo. Nyoho vaha xaan chitó ndo ÷yoso caa nacotó ndo tuhun vico andívi soco ña cuví nacoto ndo yoso caa cuahan tuhun cha sañahá Nyoo chi ndo vityin? ⁴Ñáyivi iyó vityin, quiñi iyó ñu ta ña chinó iñi ñu chi Nyoo. Cuñi ñu nyehe ñu noo cha iyó. Soco ma cuhve nyehe ñu vatyí cha yahá sañahá Nyoo cha iyó cha sacuvi ra chihin ra Jonás —catyí ra Jesús chi ra, ta sandoq ra chi ra, ta cuahan ra.

Tuhun cahán ra fariseo cuví chi tari yuchan iya
(Mr. 8.14-21)

⁵Cuhva cha cayahá ra cachicá noo chihin ra Jesús inga chiyo miñi cuan, canaa iñi ra cacuiso ra pan.

⁶Tycuan ta catyí ra Jesús chi ra: —Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

⁷Tycuan ta quichahá candatuhun ra chihin ra tahan ra ta catyí ra: —Cha cuenda vatyí ñahri pan nyisó yo vachi, yucuan chaha catyí ra tycuan caa chi yo —catyí ra.

⁸Ta tuví iñi ra Jesús tuhun candatuhún ra, ta catyí ra chi ra: —Nyoho, chiin xaan chinó iñi ndo chii. ¿Ñáá tuhun cha catyí ndo vatyí ñahri pan nyisó ndo? ⁹¿Atu ta cutuñi ca iñi ndo? ¿Atu ña nicohón iñi ndo quivi sacachi chi ndi ohon mil rayii chihin ohon tahan ri pan?

Ta ÷yoso tahan tica sacutu ndo chihin yiquin cuan? ¹⁰¿Atu ña nicohón iñi ndo quivi sacachi chi cumi mil ca ra chihin ucha tahan pan? Ta ÷yoso tahan tica sacutu ndo chihin yiquin cuan? ¹¹¿Yoso caa cha ña tuví iñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

¹²Tycuan ta cacutuñi iñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuví Cristo ra cha quitá nu nyaá Nyoo

(Mr. 8.27-30; Lc. 9.18-21)

¹³Cuhva cha chaá ra Jesús ityi ñuu Cesarea Filipino, ndaca tuhun ra chi ra cachicá noo chihin ra ta catyí ra:

—¿Ñáá catyí ñáyivi? ¿Yóó ra cuvi Rayii cha quichi nya gloria? —catyí ra.

¹⁴Ta canacahan ra ta catyí ra: —Yihí ñu catyí ñu tyi ra Juan ra sacondutya chi ñáyivi cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

¹⁵Tycuan ta catyí ra chi ra: —Ta cha cuenda chi nyoho, ¿Yóó ra cuví yuhu?

¹⁶Tycuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

¹⁷Ta nacahan ra Jesús ta catyí ra:

—Sii xaan cuví chi yoho, Simón sehe ra Jonás, vatyí ni noo rayíi ña sañaha ra chuun tuhun ihya, soco maa Suti ra nyaá andívi sañaha chuun. ¹⁸Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuvi chasaha tuhun chihi chi chi. ¹⁹Yuhu cuhve ndaha ticu andívi nu nyacá ñaha Nyoo chuun. Ta cha cuhñun ihya siqui ñuhu ñayívi, cha nuhñi saha maa Nyoo nya andívi. Ta tandíhi cha ndachun ihya siqui ñuhu ñayívi, cha ndachi maa Nyoo nya andívi.

²⁰Tyicuan ta catyí ra Jesús chi ra cachicá noo chihin ra tyi yori chihin cacahan ra tuhun vatyí ican ra cuví Cristo cha quitá nu nyaá Nyoo.

Nu sacotó ra Jesús tyi cucúvi ra

(Mr. 8.31—9.1; Lc. 9.22-27)

²¹Nya ndaha quívi cuan quichaha catyí ra Jesús chi ra cachicá noo chihin ra, vatyí cuñí chi cha cuhun ra ñuu Jerusalén. Ta ra cacuví mandoñi, ta ra cacuví nuu chi tata sutu, ta ra sacuaha ley vehe ñuhu, cucasanyehe xaan ra tindoho chi ra. Ta catyí tucu ra vatyí cucahñi ra chi ra soco nu cu uñi quívi ta cunandoto ra. ²²Tyicuan ta quehen ra Pedro chi ra ta quitá siin ra chihin ra ta quichaha catyí ra chi ra Jesús vatyí ña vaha cha cahán ra ta catyí ra:

—Ña cuñí Nyoo ta cuvi chuun tyehe caa, Sutu Mañi yuhu.

²³Soco nanyocava ra Jesús, ta quichaha catyí ra chi ra Pedro:

—iCanyaha chuun nui, cuihna! Vatyí cha cahún tyiña caa nducú

sanacavon chii. Vatyí ña chicá xiñun cuhva chicá xiñi Nyoo. Soco cuhva chicá xiñi ñáyívi chicá xiñun —catyí ra.

²⁴Tyicuan ta ra Jesús catyí ra chi ra cachicá noo chihin ra:

—Tatu nya nyoho cuñí ndo cunyicon ndo chii, cuñí chi sanaa ndo iñi ndo tuhun maa ndo. Ta mandu uvi iñi ndo cha nyicón ndo chii, vasi nyehe ndo tindoho cha cuende vatyí yucuan cuví cruzi cha tahán chi cuiso ndo. ²⁵Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñayívi ndo cha cuende, cucacu añima ndo. ²⁶Vatyí ñáá ri tuhun cha saha ganaa ndo tandíhi cha tyayíi cha iyó siqui ñuhu ñayívi tatu cunaa añima ndo. Vatyí ñahri chihin cutyiyahvi ndo ta cacu añima ndo. ²⁷Vatyí yuhu Rayíi cha quichí nya gloria, cuquichi tiqui soco chihin cha cahnu cuví Suti, ta cuquichi coyo ángel chihin. Tyicuan ta cutyiyahvi chi noo noo ndo yoso cuhva sacuví ndo. ²⁸Cha ndicha catyí chi ndo, vatyí yíhi nyoho cha nyicú ndo ihya cha ma cúvi ñaha ndo nyacua nya nyehe ndo chi yuhu Rayíi cha quichí nya gloria, cunyehe ndo yoso caa vachi cunyaca ñahi chi ndo —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra

(Mr. 9.2-13; Lc. 9.28-36)

17 Iñu quívi cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo

yucu sucun xaan chihin ra. ²Ta yucuan nasamā cuhva caa ra Jesús nuu ra ndihī chihin ra. Ta xiño vavaha nanduvī nuu ra tari ñanyii. Ta sahma ra cuichin xaan nanduvī tari maa ñuhū cuichin. ³Tyicuan ta cananyehe ra chi ra Moisés ta ra Elías, candatuhún ra chihin ra. ⁴Ta quichaha catyí ra Pedro chi ra Jesús:

—Sutu Mañi yuhu, vaha xaan cha nyicú ndi ihya. Tatu cuñún na savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

⁵Cha ni ri ca cha cahán ra Pedro, quichī ri noo vico cha xiño vavaha siqui ra. Ta sahvi cuan chi ra. Ta chichi vico cuan quitā noo ndusu cha catyí chi tyehē caa:

—Ican ra ihya cuvī Sehi, ta cuñí xain chi ra. Ta sii xaan cuñí chihin ra. Tyasoho ndo tuhun cahán ra —catyí ndusu cuan.

⁶Cha cachiñī ra cachicá noo chihin ra Jesús tuhun cuan, cachicavā ra nya ñuhu, ta cayuhvī xaan ra. ⁷Tyicuan ta tuhvā ra Jesús nu cayucú ra, ta tiñ ra chi ra, ta catyí ra:

—Ndīcuita ndo. Ma yuhvi ndo.

⁸Ta cuhva cha cananyehe ra, noo tuhun ri ca ra Jesús nanyaá, ta uvi ca ra cuan, yori ca ra.

⁹Ta cuhva cha vachi noo coyo ra yucu cuan, catyí ra Jesús chi ra:

—Yori chihin çahan ndo tuhun cha nyehē ndo ihya. Çahan ndo tuhun soco nya yaha cúvi ta nandoto yuhu Rayii cha quichī nya gloria —catyí ra.

¹⁰Tyicuan ta candacā tuhun ra cachicá noo chihin ra chi ra, —¿Ñáá tuhun cha catyí ra casacuahá ley vehe ñuhu vatyí xihna ca ra Elías tahán chi quichi?

¹¹Ta nacahan ra Jesús ta catyí ra: —Cha ndicha vatyí xihna ca ra Elías quichi ta cusanduvaha ra tandihī. ¹²Soco yuhu catyí chi ndo vatyí cha yahā quichī ra Elías, soco ña nicohon nuu ñáyivi chi ra, ta casacuvī ñu chihin ra tandihī cuhva cuñi maa ñu. Ta tyicuan caa tucu yuhu Rayii cha quichī nya gloria, cusanyehe ñu tindoho chii —catyí ra.

¹³Tyicuan ta cacutuñi iñi ra vatyí tuhun ra Juan ra sacondutya cahán ra Jesús.

Nu sanduvahā ra Jesús chi noo ra tyivaa cha yihí noo tatyí ña vaha chi

(Mr. 9.14-29; Lc. 9.37-43)

¹⁴Cuhva cha cachaç coyo ra nu nyicú ñáyivi, tuhva noo ra ta chicuñi chiti ra nuu ra Jesús, ta catyí ra chi ra:

¹⁵—Tata, çundahvi cuñi nyehun chi sehi, vatyí yihí noo cuehe chihī tañi chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduvā ra nu ñuhu ta cayū ra, ta nduvā ra nu ndutya ñandihī. ¹⁶Ta quichī nyaque chi ra chi ra cachicá noo chuhun, soco ña cuvī sanduvahā ra chi ra —catyí ra.

¹⁷Ta nacahan ra Jesús ta catyí ra: —iNyoho, ñu ña chinó iñi cuvī ndo! iTa nicaa ni quiñi iyó ndo! ¿Yoso tahan ca quivi cunyi chihin ndo ta cunyei tisihi ndo nyacua nya cutuhva ndo ta chino iñi ndo

chii? Nyaca ndo chi ra tyivaa chiña tyehe —catyí ra.

¹⁸Tyicuan ta tava ñehe ra Jesús chi tatyí ña vaha cuan, ta quita cuan chi ra tyivaa cuan. Ta caa cuhva ri cuan ta nduvaha ra.

¹⁹Cha yahā cuan ta ndaca tuhun siin ra chicá noo chihin ra Jesús chi ra ta catyí ra:

—¿Ñáá tuhun cha ña cuví tava nyuhu chi tatyí ña vaha cuan?

²⁰Ta ra Jesús nacahan ra ta catyí ra:

—Cha cuenda cha chiin xaan chinó iñi ndo chii. Cha ndicha catyí chi ndo vatyí tyehe ta chinó iñi ndo chii, tari cuhva cha cahnu noo chiti mostaza, cuví catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuvi sacuvi ndo tatu ndicha cha chinó iñi ndo chii. ²¹Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra

(Mr. 9.30-32; Lc. 9.43-45)

²²Cha ni ri ca cha iin ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayii cha quichi nya gloria, cucuhva cuenda ñu chii chichi ndaha ra xaan iñi chii. Ta cucahñi ra chii. ²³Soco nu cu uñi quivi ta cunandote —catyí ra.

Ta canducuihya xaan iñi ra cachicá noo chihin ra cha cachiñi ra tuhun cuan.

Nu catyiyahví ra cuenda vehe ñuhu cahnu

²⁴Cuhva cha cha ra Jesús ta ra cachicá noo chihin ra ñuu

Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candaca tuhun ra chi ra:

—¿Atu ña tyiyahví ra sacuha chi nyoho xuhun cha tahán chi cuenda vehe ñuhu cahnu? —cacatyí ra chi ra Pedro.

²⁵Ta nacahan ra Pedro ta catyí ra: —Tyiyahví ra.

Cuhva cha quihvi ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyí tucu yoho vityin Simón? Ra cuví tyiño siqui ñuhu ñayivi ihya, ¿yóó chi caquehen ra yahvi? ¿Atu chi ñu ñuu maa ra o chi ñu inga ñuu?

²⁶Nacahan ra Pedro ta catyí ra: —Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tyiyahvi ñu. ²⁷Soco tacuhva vatyí ma cuhva yo tisihi chi ni noo ra, cuahan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuende ta cha cuenda maun. Quēhun ta cutiyahvun —catyí ra Jesús chi ra Pedro.

Nu sañahá ra Jesús yóó ra cha cahnu ca cucuvi nu nyacá ñaha Nyoo

(Mr. 9.33-37; Lc. 9.46-48)

18 Quivi cuan catuhva ra cachicá noo chihin ra Jesús chi ra, ta candaca tuhun ra chi ra:

—¿Nya ndi cahnu ca cuví nu nyacá ñaha Nyoo?

²Tyicuan ta ra Jesús cana ra chi noo ra cuehe luhlu, ta chinanya ra chi cue mahñu ra. ³Ta catyí ra:

—Cha ndicha catyí chi ndo, vatyí tatu nyoho ta ma nasama ndo cuhva iyó ndo, ta tatu ma cuví ndo tari ra cuatyaa, ma cuví quihví ndo nu nyacá ñaha Nyoo. Vatyí ra cuatyaa chahá ndotyín cunyaca ñaha sutu ndotyín chi ndotyín, ta tyicuan caa cuhva ndo chi ndo cunyaca ñaha Nyoo chi ndo. ⁴Ta tyicuan caa ra cahnu ca cuví nuu Nyoo, ican cuví ñu ña cahnu sahá chi, ta cuví ñu tari ra cuehe luhlu ihya. ⁵Ta ñáyivi cha natiín cuenda chihin sívi chi noo ra ña cahnu sahá chi, tari ra cuehe luhlu ihya, chi yuhu natiín cuenda ñu.

Nu sañahá ra Jesús chi yo yoso caa saha cuenda yo chi yo coto sacuví yo cha ña vaha

(Mt. 5.29-30; Mr. 9.42-48; Lc. 17.1-2)

⁶Tatu yóó ñu sanacavá nu cuatyí chi noo ra nachinó iñi chii ta cuví ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu. ⁷iÑana cha ña vaha cha cuenda ñáyivi iyó siqui ñuhu ñayivi, vatyí iyó tuhun cha sacoo ñu cuatyí tahan ñu! Ta tyicuan ri coo tuhun cuan, soco indahvi ñu ndahvi cha sanacava nu cuatyí chi inga ñu!

⁸Yucuan chaha tatu ndahun o tatu chahun sanacava chuun nu cuatyí, vaha taxin ca çahnya ta saçuiton cañi. Vatyí vaha ca quihvun nu coun chihin Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhu cha ma ndahva ca maa. ⁹Ta tatu noo chiti nuun sanacavá chuun nu cuatyí, vaha taxin ca çava

ta saçuiton cañi. Vatyí vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhu chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo

(Lc. 15.3-7)

¹⁰Ma tava xiin ndo chi ni noo ra cha cuví tari noo ra luhlu, vatyí catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andivi. ¹¹Vatyí yuhu Rayii cha quichi nya gloria, vachi sacaqui chi ñáyivi cha cuanaa chihin cuatyí ñu.

¹²¿Yoso caa catyí nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra. ¹³Ta tatu nañihi ra chi ti, cha ndicha vatyí cusii ca cuñí ra chihin quití cuan, ta ñima ca chihin cumi xico chahun cumi ca quití cha ña chinaa cuan. ¹⁴Ta tyicuan caa tucu, Sutu ndo ra nyaá andivi ña cuñí ra cha cunaa ni noo ñu cuví tari noo ra luhlu.

Yoso caa tahán chi saha yo ticahnu iñi chi tahan yo

(Lc. 17.3)

¹⁵Tatu ra yañun ta sacuví ra cha ña vaha chuhun, çahan chihin noo tuhun ri maa ra ta çatyun chi ra tyi ña vaha cuhva sacuví ra. Ta tatu quichaha ra tuhun cahún, cha saha ganaun chi ra cuví cuan. ¹⁶Soco

tatu ña quichahá ra chuun, tyicuan ta cañon chi uvi o uñi ra, tacuhva tandihí cha cahun cucuvi ra testigu. ¹⁷Tatu ña quichahá ra ni chi ra cha chahān coyo chuhun cuan, tyicuan ta cañan chihin ra chihin nuu ñáyivi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinó iñi chi Nyoo cuví ra, o tari ra catavá xuhun cuenda gobiernu ñuu Roma.

¹⁸Cha ndicha catyí chi ndo, vatyi tandihí cha cuhñi ndo ihya siqui ñuhu ñayivi, ta cha nuhñi saha maa Nyoo nya andivi. Ta tandihí cha ndachi ndo ihya siqui ñuhu ñayivi, cha ndachi maa Nyoo nya andivi.

¹⁹Ta suri catyí tiquí chi ndo, vatyi tatu uvi nyoho ihya siqui ñuhu ñayivi, ndu iin ri ndo ta cacan tahvi ndo cuenda ñáá noo cha cuñí ndo cacan ndo, Suti, ra nyaá andivi cuhva ra chi ndo. ²⁰Vatyi nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

²¹Tyicuan ta chahān ra Pedro chindacā tuhun ra chi ra Jesús ta catyí ra:

—Sutu Mañi yuhu, tatu ra tahin ta sacuvi ra ñáá noo cha ña vaha chihin, ¿yoso tahan chaha tahán chi sahi ticahnu iñi chi ra? ¿Atu ucha tahan chaha?

²²Ta nacahān ra Jesús ta catyí ra:

—Catyí chuun vatyi ñima ucha tahan ri chaha, soco tandihí ri chaha.

Nu cahán ra Jesús noo cuhva cuenda noo ra cha ña cuñi saha ticahnu iñi

²³Yucuan chaha cha nyacá ñaha Nyoo añima ñáyivi cuví chi tari

noo rey cha nacana chi tandihí musu vatyi cuanyehe ra yoso yosó yica ñu chi ra. ²⁴Ta cuhva cha quichahā natava ra cuenda, ta quichí nyaca ñu chi noo musu cha cuaha millón pesu yosó yica chi ra. ²⁵Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra iin cuenda ri chihin ñasihi ra, ta chihin sehe ra ta tandihí cha iyó chi ra tacuhva vatyi chihin xuhun cuan cunatyiyahvi ra cha yosó yica ra chii.” ²⁶Tyicuan ta musu cuan chicuiñi chiti ra nuu chitoho ra, ta chacu ndahvi ra nuu ra, ta catyí ra: “Tata, cuatu noo chiin chii, ta tyiyahvi mai tandihí chuun”, catyí ra. ²⁷Ta cundahvi cuñi chitoho ra chi ra, ta saha ra ticahnu iñi chi ra, ta sanaa ra tandihí cha yoso yica ra, ta saña ra chi ra. ²⁸Soco cuhva cha quitā musu cuan, nañihj ra chi noo ra tahan ra cha cuví musu tari maa ra. Ta ra cuan yosó yica ra chiin ri chi ra. Ta tiñ ra chi ra cuan, ta quichahā quitu ra sucun ra, ta catyí ra chi ra: “Tyiyahvi cha yosó yicon chii.” ²⁹Tyicuan ta chicuiñi chiti ra cuan nuu ra, ta chacu ndahvi ra nuu ra ta catyí ra: “Cuatu noo chiin chii, ta tyiyahvi mai tandihí chuun”, catyí ra. ³⁰Soco maa ra ña cuñi ra, ta chahān ra ta tyihí ra chi ra vehe caa nyacua nya cha tyiyahvi ra cha yosó yica ra chi ra. ³¹Cha canyehe inga ca musu cha sacuvi ra, uhvi xaan cacuví chi ra, ta chahān coyo ra chinacatyí ra chi chitoho ra cha sacuvi ra cuan. ³²Tyicuan ta chitoho ra cuan tachí ra tyiño na quichi ra ta catyí ra chi ra: “Musu ña vaha cuvún. Yuhu sahi ticahnu

iñi tandihi cha yosó yicon chii, vatyí chacu ndahvun nui. ³³Tyicuan caa tucu cuñí chi cundahvi cuñun chi ra tahun cuan tari cundahvi cuñi nyehi chuun”, catyí ra chi ra. ³⁴Ta cuxaḥn xaan chitoho ra, ta tachi ra tyiño na tachi tuñi ñu chi ra, nyacua nya cha tyiyahvi ra tandihi cha yosó yica ra.

³⁵Ta nu ndihi caḥan ra Jesús, ta catyí ra tyehe caa:

—Tyicuan caa tucu cusacuvi Suti, ra nyaá andivi, chihin ndo tatu ma saha ndo ticahnu iñi chihin cha tandihi añima ndo chi tahan ndo.

Nu sañahá ra Jesús tyi ña vaha sandoo ñáyivi chi ñasihi ñu o yii ñu
(*Mr. 10.1-12; Lc. 16.18*)

19 Cha yaha cha catyí ra Jesús tuhun ihya, ta quita ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii. ²Cuaha ñáyivi chinyicoḥ chi ra, ta yucuan sanduvaha ra chi ñu cuhvi.

³Tyicuan ta suhva ra fariseo catuhva ra chi ra Jesús, vatyí cacuñí ra nducu ra cuhva tyaa ra cuatyí siqui ra. Ta candaca tuhun ra chi ra ta catyí ra:

—¿Atu vaha cha sandoo rayii chi ñasihi ra cha cuenda ñáá ri tisihi luhlu chaha ña chi ra?

⁴Ta nacahaḥn ra ta catyí ra:

—¿Atu ta sacuha ca nyoho nu tutu Nyoo nu catyí chi vatyí ra cha savaha chi ndo nya quivi xihna ri, savaha ra rayii ta ñaha sihi? ⁵Ta catyí tucu chi tyehe caa: “Tahán chi sandoo rayii chi sutu ra ta chi sihi ra, ta ndu iin ri ra chihin ñasihi ra. Ta chichi cha ninduvi ñu, cucuvi

ñu tari cha noo ri ñáyivi.” ⁶Yucuan chaha, ñima ca uvi tahan cuví ñu, soco cha nanduví ñu noo ri ñáyivi. Yucuan chaha, cha sandu iin ri Nyoo ña tahán chi cha sasiin ñáyivi —catyí ra.

⁷Tyicuan ta candaca tuhun ra chi ra Jesús ta cacatyí ra:

—¿Ñáá tuhun cha tyaa ra Moisés vatyí cuví cahnya noo rayii tutu chihin ñasihi ra ta sandoo ra chi ña?

⁸Ta ra Jesús catyí ra chi ra:

—Cha cuenda cha ndavá añima ndo, yucuan chaha, chaha ra Moisés cha sandoo ra ñasihi ra. Soco quivi xihna ri ñima tyicuan caa cuví. ⁹Yuhu catyí chi ndo tyehe caa: Ra cha sandoo ñasihi, ta ñima cha cuenda cha natuvi ña chihin inga ra, ta tandaha ra chihin inga ñu, chicoḥ cuatyí ra nuu Nyoo. Ta ra cha tandaha chihin noo ñaha sihi cha sandoo yii chi, suri chicoḥ tucu cuatyí ra cuan —catyí ra.

¹⁰Tyicuan ta ra cachicá noo chihin ra, cacatyí ra chi ra:

—Tatu tyicuan caa tahán chi coo rayii chihin ñasihi ra, vaha taxin ca ma tandaha yo.

¹¹Ta ra Jesús catyí ra chi ra:

—Soco ña tandihi ñáyivi cuví cutuñi iñi ñu tuhun ihya. Soco ñu cha chaha Nyoo cha cutuñi iñi, ican ñu cua cutuñi iñi. ¹²Cha ña tandaha ñáyivi, cuaha ri cuenda cuví. Yihí ñu ña quichi cuví iñi ñu tandaha ñu vatyí iin caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyivi ñii ñu. Ta yihí ñu ña tandaha ñu cha cuenda cha cuñí ñu sacuvi ñu tyiño nuu Nyoo, na

nducuaaha añima cha nyacá ñaha Nyoo. Tandihí ñu cuví sacuvi tyehe caa, na sacuvi ñu —catyí ra Jesús.

Nu nasocó ra Jesús chi ra cuatyaa

(Mr. 10.13-16; Lc. 18.15-17)

¹³Tyicuan ta quichí nyaca ñu suhva ra cuatyaa chi ra Jesús tacuhva na tyiso ra ndaha ra siqui ndotyin, ta cacan tahvi ra chaha ndotyin. Soco ra cachicá noo chihin ra quichahá cacahan ra chi ñu quichí nyaca chi ndotyin. ¹⁴Soco ra Jesús catyí ra:

—Saña ndo chi ra cuatyaa, na quichi maa ndotyin nu nyaí. Ta ma casi ndo. Vatyí ñu nyacá ñaha Nyoo añima, cuví ñu tari ra cuatyaa ihya —catyí ra.

¹⁵Tyicuan ta tyiso ra ndaha ra siqui ndotyin. Yaha cuan ta cuahan ra.

Nu cahán noo ra tyivaa tyayii chihin ra Jesús

(Mr. 10.17-31; Lc. 18.18-30)

¹⁶Noo ra tyivaa chahan ra chindacá tuhun ra chi ra Jesús ta catyí ra:

—Maestro vaha xaun. ¿Ñáá cha vaha tahán chi sacuvi ta ñihi ñayiví cha ma naa ca maa coi?

¹⁷Ta ra Jesús catyí ra chi ra:

—¿Ñáá tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, nacotón tyi Nyoo cuví.] Soco tatu cuñún quihvun ñayiví cha ma naa ca maa, sacuvun tandihí tuhun cha tachí Nyoo tyi sacuvi yo —catyí ra chi ra.

¹⁸Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñáyiví. Ma coo inga ñusihí chuun. Ma suhun cha chii ñáyiví. Ma cahun cuendu siqui ñu. ¹⁹Saha ñáyiví chi sutun ta chi sihun. Ta cuñun chi ñáyiví, tari cha cuñún chi maun.

²⁰Ta ra tyivaa cuan, catyí ra chi ra:

—Tandihí tuhun ihya ta quichahí nyata luhli ta nya vityin. ¿Ñáá ca cha cumañí chii?

²¹Ta ra Jesús catyí ra chi ra:

—Tatu cuñún cuvun noo ra cuiñi nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii. Tyicuan ta coo cha tyayii chuun nya gloria —catyí ra.

²²Soco cuhva cha chiñí ra tyivaa cuan cha cahan ra Jesús tyehe caa, cuihya xaan cuanuhu ra vatyí tyayii xaan ra.

²³Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí yii xaan cuhva ra tyayii cha cunyaca ñaha Nyoo añima ra.

²⁴Catyí chi ndo inga chaha, vatyí numi ca yaha noo camellu xiyu noo yiquí ticu, ta ñima ca noo ra tyayii ta cuhva ra chi ra cha cunyaca ñaha Nyoo —catyí ra Jesús.

²⁵Cha cachihí ra cachicá noo chihin ra tuhun ihya, iyo xaan cacuñí ra, ta quichahá candaca tuhun ra chi ra tahan ra, ta cacatyí ra:

—Tu tyicuan caa, iyóo cha cuví cacu vii?

²⁶Tyicuan ta nanyehé ra Jesús nu nyicú ra ta catyí ra:

—Ñáyiví ma cuví sacuvi ñu tyehe caa, soco Nyoo cuví sacuvi ra tandihí.

²⁷Tyicuan ta quichaha catyí ra Pedro chi ra:

—Sutu Mañi yuhu, nyuhu tandihi maa cha iyó chi ndi sandoq ndi ta nyicón ndi chuun. ¿Ñáá cha cuñihi ndi? —catyí ra chi ra.

²⁸Ta nacahan ra Jesús ta catyí ra:

—Cha ndicha catyí chi ndo, vatyí quivi cha cunduchaa tandihi, yucuan quivi yuhu Rayii cha quichi nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaqui. Ta cunyaca ñaha ndo chi ndi uchi uvi tahan ityi ñáyivi Israel. ²⁹Ta tandihi ndo cha sandoq ndo vehe ndo, o yañi ndo, o cuhva ndo, o sutu ndo, o sihi ndo, o ñasihí ndo o sehe ndo, o ñuhú ndo cha catyí yuhu, cunañihi ndo noo cientu ca chaha siqui cuan, ta cunañihi tucu ndo ñayivi cha ma naa ca maa coo ndo. ³⁰Cuaha xaan ñu cuahan ityi nuu vityin, ican ñu cuan, cuhun nya nu ndihi. Ta cuaha xaan ñu cuahan nu ndihi vityin, ican ñu cuhun ñu ityi nuu.

Nu sañahá ra Jesús noo cuhva cuenda ra casahá tyiño

20 'Cha nyacá ñaha Nyoo ñanima ñáyivi, cuví chi tari noo chitoho chacu yoho tichaha ndivi. Ta chitoho chacu cuan ñaha cuiri quitá ra cuanducu ra cuaha ri musu cusaha tyiño nu tyiño saha ra. ²Ta sandaa ra tyiño chihin musu cuan vatyí cutiyahvi ra yahvi cha tahán chi chi ra cha noo quivi, ta tachí ra chi ra cusaha tyiño ra nu iyó tyiño sahá ra. ³Yahá cuan ta quitá tucu ra cuhva cha caa iin cha ñaha ri. Ta nanyehé ra chi suhva ca ra canyicú

ri maa nuyahvi cuan. ⁴Ta catyí ra chi ra: “Cuahan tucu nyoho cua saha tyiño ndo nu iyó tyiño sahi, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan. ⁵Tyicuan ta chitoho chacu cuan quitá tucu ra inga chaha cuhva cha ora. Yucuan ta quitá tucu ra cuhva cha caa uñi cha cha iñi. ⁶Ta yahá cuan ta quitá tucu ra cuhva cha caa ohon cha cha iñi ta nanyehé ra canyicú ri maa suhva ca ra nuyahvi cuan. Ta catyí ra chi ra: “¿Ñáá tuhun cha canyicú ri maa nyoho ndiyaca ihya, ta ña sahá tyiño ndo?” ⁷Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahi. Ta tyiyahvi mai chi ndo yoso cuhva cha tahán chi chi ndo”, catyí ra. ⁸Ta cuhva cha cuaa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvi nu ndihi, ta nu ndihi ta tyiyahvun chi ra cha caquihvi cha xihna ri”, catyí ra. ⁹Tyicuan ta chaá coyo ra cha caquihvi cuhva cha caa ohon cha cha iñi cuan. Ta tahan tahan ra quehen ra yahvi nani noo quivi. ¹⁰Yahá cuan, ta cuhva cha tahán chi chi ra cha caquihvi coyo cha xihna ri cuan, cacuñí maa ra vatyí cuaha ca cutiyahvi ra chi ra. Soco suri iin ri yahvi noo quivi caquehen ra. ¹¹Ta cuhva cha caquehen ra, quichaha cacahan ra chi chitoho tyiño cuan. ¹²Ta catyí ra: “Ra cha cachaa coyo nu ndihi ihya, noo tuhun hora casahá tyiño ra. Ta iin ri cuhva tyiyahvun chi ra chihin nyuhu

cha saha tyiño ndi nu cahñi ndiyaca”, cacatyí ra. ¹³Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuví chuhun. ¿Atu ñima yahvi cha noo quivi catyí vatyí tyiyahvi chuun? ¹⁴Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihvi nu ndihi iin ri cuhva cha tyiyahvi chi yoho? ¹⁵¿Atu ñahri ityi iyó chii cha sacuvi cha cuñí mai chihin xuhin? ¿Atu quiñi cuñún tyi vaha ñáyivi cuví chihin inga ra cuan?” catyí ra. ¹⁶Ta tyicuan caa ñu quihvi nu ndihi, cuhun ñu ityi nuu. Ta ñu cuahan ityi nuu, nya nu ndihi cuhun ñu. Vatyí cuaha xaan ñu nacaná Nyoo chi. Soco chiin xaan ri ñu nacachí ra.

Inga chaha sacotó ra Jesús yoso caa cucahñi ñáyivi chi ra

(Mr. 10.32-34; Lc. 18.31-34)

¹⁷Cuhva cha cuñí cuhun ra Jesús nya Jerusalén, cana siin ra chi ndi uchi uvi ra cachicá noo chihin ra ta catyí ra chi ra:

¹⁸—Ta cha nyehe maa ndo vatyí cuahan yo Jerusalén vityin. Ta yucuan cucuhva cuenda ñu chi yuhu Rayi cha quichi nya gloria chi ra cacuví nuu chi tata sutu, ta chi ra casacuaha ley vehe ñuhu, ta cucatyí ra tyi tahán chi cúvi. ¹⁹Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahñi ra chii nu cruzi. Soco nu cu uñi quivi cunandote —catyí ra Jesús chi ra.

Nu chicán sihi ra Jacobo ta ra Juan noo tumañi iñi chi ra Jesús

(Mr. 10.35-45)

²⁰Tyicuan ta sihi ra Jacobo ta ra Juan sehe ra Zebedeo tuhva ña nu

nyaá ra Jesús chihin ninduvi sehe ña. Ta chicuiñi chiti ña nuu ra vatyí cacan ña noo tumañi iñi chi ra.

²¹Ta quichaha ndaca tuhun ra Jesús chi ña:

—¿Ñáá cha cuñún?

Ta catyí ña:

—Quivi cha cunyaun nu nyacá ñahun nya andivi, cuhva cha cunyaa ninduvi sehe xiun. Na cunyaa noo ra chiyo vahun, ta inga ra cunyaa ra chiyo satyun.

²²Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cunyehe yuhu? ¿Atu cuví cuhun ndo tuhun chihi tari cuhva cuhun yuhu? —catyí ra.

Ta canacahan ra ta catyí ra:

—Cuví chi ndi.

²³Ta catyí ra Jesús chi ra:

—Cha ndicha vatyí cunyehe ndo tindoho, ta cuhun ndo tuhun chihi tari cuhun yuhu tuhun chihi. Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

²⁴Ta cha cachiñi uchi ca ra cachicá noo chihin ra Jesús tuhun cuan cacuxaan ra chihin ninduvi ra cuan. ²⁵Soco cana ra Jesús chi ra ta catyí ra chi ra:

—Cha chitó maa ndo, vatyí ra nyacá ñaha chi ñáyivi iyó siqui ñuhu ñáyivi ihya, ñihi xaan nyacá ñaha ra chi ñu tari nyaca ñaha ra musu ra. ²⁶Soco ñima tyicuan caa tahán chi sacuvi nyoho. Vatyí ra cha cuñí cucahnu ca nu Nyoo, cuñí chi cuví ra musu tandihi ca ndo. ²⁷Ta nya nyoho

cha cuñi ndo cuví ndo nuu, cuñi chi cuví ndo musu tandíhi ca ñu. ²⁸Tari yuhu Rayii cha quichi nya gloria, ña vachi vatyí sacuvi ndo tyiño nui, soco vachi sacuvi tyiño nuu ndo, ta cuhve ñáyivi. Vatyí chihin cuan ta cuvi sacaqui cuaha ñáyivi.

Nu sanduvahá ra Jesús chi uvi ra cuaa

(Mr. 10.46-52; Lc. 18.35-43)

²⁹Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús. ³⁰Ta yuhu ityi cuan canyicú uvi tahan ra cuaa. Ta cuhva cha cachiñi ra vatyí cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

³¹Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

³²Tyicuan ta chicuiñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Náa cha cuñi ndo cha sacuvi chihin ndo?

³³Ta canacahan ra ta catyí ra:

—Sutu Mañi yuhu, cuñi ndi nyehe ndi.

³⁴Tyicuan ta cundahvi cuñi ra Jesús nyehe ra chi ra, ta tiñ ra chiti nuu ra. Ta caa cuhva ri cuan cananyeha ra, ta cananyicon ra chi ra Jesús.

Nu quihvi ra Jesús Jerusalén

(Mr. 11.1-11; Lc. 19.28-40; Jn. 12.12-19)

21 Cuhva cha cua cha coyo ra ñuu Jerusalén, ta cacha

ra ñuu Betfagé, yatyin ri nu cuví yucu yutun Olivo. Tyicuan ta tachi ra Jesús tyiño chi uvi ra chicá noo chihin ra. ²Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi noo burru sihi, nuhñi ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii. ³Ta tatu yóo cha catyí náa cha catyí chi ndo, catyí ndo chi ñu: “Vatyí chiñuhú ti chi maa ra nyacá ñaha, soco numi ri quichi nanyaca ndi chi ti”, catyí ndo chi ñu —catyí ra.

⁴Tyehe caa cuví tacuhva na chino cava tuhun cha catyí ra profeta nu tyaa ra tyehe caa:

⁵Catyí ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quití cha tuhvá nyisó carga”, catyí ra profeta.

⁶Tyicuan ta cuahan coyo ra cacticá noo chihin ra, ta casacuvi ra tari cuhva catyí ra Jesús chi ra.

⁷Caquichi nyaca ra chi ti chihin sihi ti. Ta catyiso ra sahma ra siqui ti, ta ndaa ra Jesús chi ti.

⁸Ta cuaha xaan ñáyivi candica ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi.

⁹Ta ñáyivi cha cuahan ityi nuu ta ityi chata, quichaha cana chaa ñu ta catyí ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andivi! —catyí ñu.

¹⁰Cuhva cha chaa ra Jesús ñuu Jerusalén cuan, tandíhi maa ñáyivi

ñuu naquiqui, ta cuaha xaan ñu candacá tuhun ñu chi tahan ñu, ta catyí ñu:

—¿Yóó ra cuví ra ihya?

¹¹Ta ñáyivi catyí ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyí ñu.

Nu tavá ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹²Yahá cuan ta quihvi ra Jesús chichi vehe ñuhu cahnu Nyoo. Ta tavá ñehe ra chi tandihi ra casatá ta ra caxicó yucuan. Ta sanduvá ra mesa ra canasamá xuhun chi ñáyivi yucuan. Ta sanduvá ra tyayu ra caxicó paloma. ¹³Ta catyí ra:

—Nu tutu Nyoo catyí chi tyehe caa: “Vehi, vehe nu chicán tahvi ñáyivi chii cuví, ta tyicuan caa cucunañi chi. Soco nyoho cha nasahá ndo vehe nu nyicú ra suhu” —catyí ra.

¹⁴Chichi vehe ñuhu cuan catuhva suhva ra cuaa ta ra coxo chi ra Jesús. Ta maa ra sanduvahá ra chi ra. ¹⁵Soco canyehé ra cacuví nuu chi tata sutu ta ra casacuahá ley vehe ñuhu cuan vatyí savahá ra Jesús milagru, ta canachahá ra cuatyaa chichi vehe ñuhu, ta catyí ndotyin:

—iCahnu xaan cuví ra vachi tata rey David! —catyí ndotyin.

Tyicuan ta cacuxaan tata sutu ta inga ra cuan cha canyehé ra ta cha cachiñi ra. ¹⁶Ta cacatyí ra chi ra Jesús tyehe caa:

—¿Atu chiñún cha cahán ndotyin?

Ta nacahan ra Jesús ta catyí ra:

—Chiñí. Soco ¿atu ta sacuahaca ndo nu tutu Nyoo nu catyí chi tyehe caa?

Sutu Mañi yuhu, sacuvun vatyí ra cuatyaa nyihi cata ndotyin.

Ta ra cuatyaa lee cha chaxín sacahnú ndotyin chuun, catyí chi, —catyí ra Jesús.

¹⁷Tyicuan ta sandoq ra chi ra, ta quita ra ñuu cuan ta cuahan ra ñuu Betania. Ta yucuan ndoq ra cha cuaa cuan.

Nu tyanahá ra Jesús chi tu higo vatyí ñahri higo iñi nuu tun

(Mr. 11.12-14, 20-26)

¹⁸Tuvi inga quivi. Ta cha ñaha ri, cua ndichi ra Jesús nya Jerusalén, ta chaq soco chi ra. ¹⁹Ta nanyehé ra noo tu higo yatyin ri yuhu ityi cuan. Ta tuhva ra nu nanyaá tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyí ra chi tun tyehe caa:

—iNi nonga chaha ma cuhva con chiti!

Ta caa cuhva ri cuan ta na ityi tun. ²⁰Ta cha nyehe ra cachicá noo chihin ra cha sacuvi ra, iyo cacuñi ra, ta ndacá tuhun ra chi ra ta catyí ra:

—¿Ñáá tuhun cha numi xaan na ityi tu higo cuan?

²¹Ta nacahan ra Jesús ta catyí ra:

—Cha ndicha catyí chi ndo, vatyí tatu chinó iñi ndo ta ma nacaca uvi iñi ndo, ñima ihya ri cha sacuvi chi tu higo ihya cuví sacuvi ndo, soco cuví catyí ndo chi yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi. ²²Ta tandihi cha cacan ndo nu chicán tahvi ndo, tatu chinó iñi ndo tyi cucuhva Nyoo, cuñihi ndo —catyí ra Jesús.

**Nu sañahá chi yóo ra chahá tyiño
chi ra Jesús**

(Mr. 11.27-33; Lc. 20.1-8)

²³Yahá cuan ta quihví ra Jesús chichi vehe ñuhu cahnu, ta cha ni ri ca cha sañahá ra yucuan, tuhva ra cacuví nuu chi tata sutu chi ra, ta ra cacuví mandoñi ñu ñuu Israel, ta candacá tuhun ra chi ra:

—¿Yóo cha tyaa tyiño vatyí sacuvun tyehe caa, ta yóo cha chahá tyiño cuan chuun?

²⁴⁻²⁵Ta nacahan ra Jesús ta catyí ra:

—Yuhu tucu cua ndaca tuhin noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, cucatyí tucu yuhu chi ndo yóo cha tyaa tyiño ihya chii —catyí ra Jesús chi ra.

Tyicuan ta quichahá cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachí chi ra, cucatyí ra chi yo: “Tu tyicuan caa, ¿ñáá tuhun ña chinó iñi ndo chi ra?” ²⁶Ta tatu catyí yo tyi ñáyivi, ñáyivi cuví nacanda ñu síqui yo, vatyí tandíhi ñu chinó iñi ñu tyi ra Juan, cuenda Nyoo cahán ra —catyí ra chi ra tahan ra.

²⁷Tyicuan ta quichahá cacatyí ra chi ra Jesús tyehe caa:

—Ña chitó ndi.

Tyicuan ta ra Jesús catyí ra chi ra:

—Ni yuhu, ta ma catyí chi ndo yóo cha tyaa tyiño ihya chii.

**Nu cahán ra Jesús noo cuhva
cuenda uvi tahan sehe noo ra**

²⁸Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo sehe ra: “Cuahan cua saha tyiño nu iyó tyiño sahí.” ²⁹Ta nacahan sehe ra ta catyí ra: “iMa cuhin!” Soco yahá cuan ta nasama cuhva chicá xiñi ra ta chahan ra chisaha tyiño ra. ³⁰Yahá cuan ta sutu ra chahan ra nu nyaá inga sehe ra. Ta catyí tucu ra chi ra na cahun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra. ³¹Chichi cha ninduvi tahan ra, ¿nya ra sacuví ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha cahán ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho. ³²Vatyí ra Juan ra sacondutya quichí ra, quichi sañaha ra chi ndo yoso caa tahan chi coo ndo, soco nyoho ña chinq iñi ndo chi ra, soco ra catavá xuhun ta ñu cata iñi cachingo iñi ñu chi ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chi ra.

**Nu catyí ra Jesús vatyí ra cacahñi
chi ra cuví ra tari ra sahá tyiño ña
vaha**

(Mr. 12.1-12; Lc. 20.9-19)

³³Tyasoho ndo inga cuhva ihya: Chiyó noo chitoho noo ñuhú, ta tachí ra yoho tichaha ndivi, ta tyihí ra noo chacu. Ta savahá ra noo nu

cuhñi ra tichaha ndivi cuan ta tava ra ndutya chi. Ta savaha tucu ra noo vehe sucun tacuhva vatyí cuvi saha ra cuenda tandihi.

Yaha cuan ta chaha noo ra ñuhú cuan chi suhva ra casahá tyiño, ta cuahan ra inga ñuu. ³⁴Ta cha chaá quivi cha iyó tichaha ndivi cuan, tachí ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahán chi chi ra. ³⁵Soco ra casaha tyiño cuan, catiín ra chi musu cuan, ta cacañi ra chi noo ra. Ta chi inga ra cachahñi ra, ta catuchí ra yuu chi inga ra. ³⁶Tyicuan ta cha inga chaha, cuaha ca musu tachí chitoho chacu cuan ta ñima ca cha xihna ri. Soco tari casacuví ra chi ra cha xihna ri, sacuví tucu ra chi ra ihya.

³⁷Nu ndihi tachí ra chi maa maa sehe ra, vatyí cuñí maa ra vatyí cusaha ra ñáyivi chi sehe ra. ³⁸Soco cuhva cha cananyehé ra casahá tyiño cuan chi sehe ra, catyí ra chi ra tahan ra tyehe caa: “Ican ra ihya cundoo chihin tandihi ihya. Na cahñi yo chi ra tacuhva ndoo maa yo chihin”, cacatyí ra. ³⁹Tyicuan ta catiín ra chi ra, ta catava ra chi ra ityi chata chacu, ta cachahñi ra chi ra —catyí ra Jesús.

⁴⁰Tyicuan ta ndaca tuhun ra Jesús chi ñu:

—Quivi quichi chitoho ñuhú cuan, ñáá cha cusacuvi ra chihin ra casahá tyiño quiñi iyó cuan?

⁴¹Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chi inga ra casahá tyiño. Ta quivi coo tichaha ndivi,

cunacuhva cuenda ra chi chitoho chacu cuan cha tahán chi chi ra.

⁴²Tyicuan ta quichaha catyí ra Jesús chi ñu:

—¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cuñi ra casavahá vehe cotyiño ra,

ican cuan cuví yuu cha ñiñi ca.

Ican ihya cuví cha sacuví Sutu yo Nyoo.

Ta tyaqui xaan tuhun cuan cha cuenda chi yo, catyí chi.

⁴³Yucuan chaha catyí chi ndo vatyí ma cuhva ca Nyoo cuhun ndo nu nyacá ñaha ra, ta cucuhva ra chi ñu cha ndicha nyacá ñaha ra ñima. Vatyí maa ñu cunacuhva cuenda ñu cha vaha cha tahán chi chi ra. ⁴⁴Ta cha cuenda yuu cuan, yóo ñu cha nduva siqui chi, yiquín maa cucuvi ñu. Ta tatu yuu cuan ta canacava siqui yóo ñu, cutaxin nyihi maa ñu —catyí ra Jesús.

⁴⁵Cuhva cha catuví iñi ra cacuví nuu chi tata sutu cuan ta ra fariseo vatyí cuenda ra cahán ra Jesús cuhva ihya, ⁴⁶cacuñi ra catiín ra chi ra, soco cayuhvi ra chi ñáyivi vatyí ñáyivi, chitó ñu vatyí ra Jesús cuenda Nyoo cahán ra.

Nu chahá ra Jesús noo cuhva cuenda vico tandaha

(Lc. 14.15-24)

22 Quichaha cahan tucu ra Jesús chihin ñu inga chaha chihin cuhva, ta catyí ra:

²—Cha nyacá ñaha Nyoo ñima ñáyivi cuví chi tari noo rey cha savaha noo vico cha cuenda cha cua tandaha sehe ra. ³Ta tachí ra chi musu ra na cuhun ra cucana

ra chi ñu cha nacatyí tuhun ra, soco ñu cuan, ña cacuñí ñu quichi coyo ñu. ⁴Tachí ra inga chaha chi inga musu, ta catyí ra chi ra tyehe caa: “Catyí ndo chi ñu cha nacatyí tuhin, vatyí cha yaha chahñi sindiqui sane, ta inga quiti cha xahan ñandihí, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyí ra. ⁵Soco ñu nacatyí tuhun ra, ña caquichahá ñu chi ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu. ⁶Ta inga ñu tiñ ñu chi musu rey cuan ta cañi vavaha ñu chi ra nyacua chahñi ñu chi ra. ⁷Tyicuan ta rey cuan cuxaan vavaha ra, ta tachí ra chi sindaro ra, cucahñi ra chi ra cachahñi cuan, ta cahmi ra ñuu ra. ⁸Tyicuan ta quichahá catyí ra chi musu ra: “Tandihí ta cha iyó vaha cha cuenda vico tandaha, soco ñu nacatyí tuhin cuan, ña tahán chi cha quichi coyo ñu. ⁹Cuahan ndo tandihí calle ta nacatyí tuhun ndo chi tandihí ri ñu cha nañihí ndo na quichi coyo ñu vico tandaha”, catyí rey cuan. ¹⁰Musu cuan cuahan coyo ra tandihí calle, ta casandu iñ ri ra chi tandihí ñu canañihí ra: ñu quiñi iyó, ta ñu vaha. Ta tyicuan caa chitu chichi vehe ra chihin ñáyivi.

¹¹Tyicuan ta quihví rey cuan cua nyehe ra chi ñáyivi cha canacatyí tuhun musu cuan. Ta nanyehé ra chi noo ra ñohó yucuan, soco ñahri sahma vico tandaha ñihnó ra. ¹²Ta catyí rey chi ra: “Amigo, ¿yoso caa cha quihvun ihya ta ñahri sahma vico tandaha ñihnón?” Soco ra cuan ña na cahān maa ra. ¹³Tyicuan ta catyí rey cuan chi ra catyihí

mesa cuan: “Cuhñi ndo chaha ra ta ndaha ra, ta tuchi ndo chi ra nu ñaa iñi ityi chata vehe, ta yucuan cucuacu ra, ta cusacahñi ra noho ra”, catyí ra. ¹⁴Vatyí cuaha xaan ñu nacana Nyoo chii, soco chiin xaan ñu nacachi ra —catyí ra Jesús.

Nu candacá tuhun ra cuenda xuhun cha tavá gobiernu

(Mr. 12.13-17; Lc. 20.20-26)

¹⁵Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chi, vatyí tyicuan caa ta coo cuatyí catyaa ra siqui ra. ¹⁶Ta tachí ra chi suhva ra cuenda ra, iñ ri chihin suhva ra cuenda ra Herodes. Ta cacatyí ra chi ra Jesús tyehe caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tiñ cuendon cuhva caá ri ñu.

¹⁷Catyí chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chi yo, o ma tyiyahvi yo?

¹⁸Soco tuví iñi ra Jesús vatyí ña vaha cuhva cachicá xiñi ra, ta catyí ra chi ra:

—Nyoho sahá ndo tyi vaha ndo, soco ña ndicha ndo. ¿Ñáá tuhun cha nducu nyehe ndo chii? ¹⁹Sañaha ndo xuhun cha tuhva ndo tyiyahvi ndo chi gobiernu —catyí ra.

Ta caquichí nyaca ra noo xuhun cha nañí denariu chi ra. ²⁰Ta cuhva cha nanyehé ra Jesús, ta quichahá ndaca tuhun ra chi ra:

—¿Yóó chi nuu ta yóó chi sivi nyaá ihya?

²¹Ta nacahan ra ta cacatyí ra:
—Chi ra nyacá ñaha.

Tyicuan ta catyí ra Jesús chi ra:
—Cuhva ndo chi ra nyaca ñaha
cha tahán chi chi ra, ta cuhva tucu
ndo chi Nyoo cha tahán chi chi
Nyoo —catyí ra.

²²Cuhva cha cachiñi ra cha cahan
ra Jesús, iyo xaan cacuñi ra. Ta
cuahan coyo ra.

**Nu canducü tuhun ra saduceo siqui
tuhun cha nandotó ndiyi**

(Mr. 12.18-27; Lc. 20.27-40)

²³Suri quivi cuan suhva ra
saduceo chahan coyo ra nu nyaá
ra Jesús. Ta ra saduceo cuan ña
cachino iñi ra cha cunandoto ndiyi
quivi cu naa ñayivi. Yucuan chaha
candacá tuhun ra chi ra Jesús, ta
catyí ra:

²⁴—Maestro, ra Moisés catyi ra
vatyi tatu noo ra tandaha ta chihí
ra ta ña chiyo sehe ra, tahán chi
cha tandaha yañi ra chihin ñaha
chihí yii cuan. Tyicuan ta coo sehe
ra chihin ña cha cuenda yañi ra
cha chihí. ²⁵Vaha. Vityin tyehe caa
cuví chi noo ra chiyo ucha tahan
ra chihin yañi ra. Ra cha xihna ri
tandaha ra. Yahá cuan ta chihí ra.
Soco vatyi ña chiyo sehe ra, ndoo
ñasihi ra chi yañi cu uvi ra. ²⁶Ta
suri tyicuan caa cuví chi yañi ra
ra cu uvi. Ta yahá cuan, ta ra cu
uñi quehen ra chí ña, ta suri chihí
tucu ra. Ta tyicuan caa cuví chi
ndí ucha ra. ²⁷Ta cha yahá cuan
nu ndihi tuhun chihí ndihi maa ña
cuan. ²⁸Ta cha tyicuan caa, quivi
cunandoto ñu, chichi cha ucha
ra chihin yañi ra, ¿nya ra cucuvi
ñasihi chi ñaha cuan? ¿Vatyi

tandihí ra tandaha ra chihin ña? —
cacatyí ra.

²⁹Nacahan ra Jesús ta catyí ra:
—Nyoho, cahán tondo ri maa ndo,
cha cuenda vatyi ña chitó ndo cha
nyaá nu tutu Nyoo, ni tunyee iñi
Nyoo, ta ña chitó ndo. ³⁰Vatyi quivi
cunandoto ndiyi, ni ma tandaha ñu,
ta ni ma cuhva ñu sehe ñu tandaha,
vatyi tari ángel Nyoo ra nyaá
andivi cucuvi ñu. ³¹Soco tuhun cha
nandotó ñu ndiyi, ¿atu ta sacuaha
ca ndo tuhun cha catyi maa Nyoo
chi ndo? Catyí ra tyehe caa:

³²“Yuhu cuví Nyoo cuenda ra
Abraham, ta ra Isaac ta ra
Jacob.”

Ihya nyehé yo vatyi canyito añima
ra cuan, vasi cha naha chihí ra
vatyi Nyoo ñima Nyoo cuenda ñu
ndiyi cuví ra, soco Nyoo cuenda ñu
nyitó cuví ra —catyí ra.

³³Iyo cuñí ñáyivi cha chiñi ñu
tuhun sañahá ra Jesús.

Ley cha niñi ca cha chahá Nyoo

(Mr. 12.28-34)

³⁴Cha cachito ra fariseo vatyi
ra Jesús chasi ra yuhu ra saduceo,
candu iñ ri ra. ³⁵Ta noo ra cha
cuví ra sacuahá ley vehe ñuhu, cuñi
ra nducu nyehé ra chi ra Jesús. Ta
quichaha ndaca tuhun ra chi ra, ta
catyí ra:

³⁶—Maestro, ¿nya mandamiento
cha nyaa nu ley cuví cha niñi ca?

³⁷Ta catyí ra Jesús chi ra:
—“Cuñun chi Sutu Mañi yo Nyoo
chihin cha nii iñun ta chihin cha
tandihí añimon, ta chihin cha
tandihí cha chiñi tuñi xiñun.”

³⁸Ican ihya mandamiento cha niñi
ca, ta cha xihna ri ñandihí. ³⁹Ta

cha cu uvi cha yatyin ri tyicuan caa, ta catyí chi: “Cũñun chi ñáyivi tahun tari cuñún chi maun.” ⁴⁰Ican uvi tahan mandamiento ihya cuví cha nyisó chi ley cha chahá Nyoo chi ra Moisés ta tandíhi tuhun cha casañaha ra profeta Nyoo ta cha naha.

Ra Cristo quichí ra tata ra David, ta suri cuví ra Sehe Nyoo

(Mr. 12.35-37; Lc. 20.41-44)

⁴¹Cha ni ri ca cha canyicú iin ri ca ra fariseo, ⁴²ra Jesús ndaca tuhun ra chi ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóo chi tata vachi ra cuñí maa ndo?

Ta canacahan ra ta catyí ra:

—Tata ra David cuví chi ra.

⁴³Tyicuan ta ra Jesús catyí ra chi ra:

—¿Ta yoso caa cha vatyí ra David cuan, maa Tatyí Ii Nyoo chotyíño chi ra? ta catyí ra vatyí ra cuví Cristo, ra nyacá ñaha chi ra cuví ra, vatyí catyí ra tyehe caa:

⁴⁴Cahan Suti Nyoo chihin Suti ra Cristo, ta catyí ra chi ra:

“Cũnyaa chiyo vahi nyacua nya quivi cuhve chi ra xaan iñi chuun vatyí cuaca chahun siqui ra” tyaá ra David.

⁴⁵¿Yoso caa cha ra vachi tata ra David cuví chi ra Cristo, tatu suri maa ra David catyí ra vatyí ra Cristo Sutu ra cuví chi ra? —catyí ra Jesús.

⁴⁶Ta yori maa cuví nacahan ni noo tuhun. Ta nya ndaha quivi cuan, yori ca maa cañá iñi candaca tuhun ñáá ca cha candaca tuhun chi ra.

Nu cahán ra Jesús chi ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

23 Tyicuan ta ra Jesús catyí ra chi ñáyivi, ta chi ra cacticá noo chihin ra tyehe caa:

²—Ra sacuahá ley ta ra fariseo nyicú ra tyiño cha sañahá ra ley cha tyaá ra Moisés. ³Ta cha tyicuan caa, quichaha ndo cha cahán ra ta sacuvi ndo tandíhi cha cacatyí ra chi ndo. Soco ma quehen ndo cuhva iyó ra, vatyí maa ra, siin cha sañaha ra, ta siin cha sacuví ra.

⁴Vatyí yori ndoyo carga cha tyaá ra siqui ñáyivi. Ta saniñi ra chi ñu na cuiso ñu, ta maa ra ni chiin nundaha ra ña nañi chata carga cuan. ⁵Tandíhi cha casacuví ra, cha cuñi ra na nyehe ñáyivi. Vatyí tahán iñi ra catyaa ra tuhun Nyoo tyaan ra ta soco ra chihin letra nahnu. Ta tahán iñi ra cacuihno ra sahma chihin adorno nañi. ⁶Ta nu vaha ca, cuñí ra cunyicu ra vico, ta cachi ra. Ta nu vaha ca cuñí ra cunyicu ra chichi vehe ñuhu. ⁷Ta nu chicá noo ra cacuñí ra vatyí cuhva ñáyivi nocumi chi ra chihin cha sahá xaan ñu ñáyivi chi ra. Ta cuñí tucu ra cha catyí ñu chi ra vatyí chito xaan ra. ⁸Soco nyoho, ma cuhva ndo ityi cha catyí ñáyivi vatyí chitó xaan ndo. Vatyí tandíhi nyoho, yañi ndo cuví. Ta noo ri ra chitó iyó, ta ican ra cuví Cristo. ⁹Ta ma catyí ndo Sutu ndo chi ninoo ra ñuhu ñáyivi ihya, vatyí iyó noo Sutu ndo, ta nyaá ra andívi. ¹⁰Ta ma catyí ndo vatyí ra cuví nuu cuví ndo, vatyí noo ri maa ra Cristo cuví nuu. ¹¹Ra cha sacuví tyiño nuu

tandihí ca ra, ican ra cuan cuví ra cahnu ca nu nyicú ndo. ¹²Vatyi ra cahnu sahá chii, cunocuee ra. Ta ra ña cahnu sahá chii cucucahnu ra.

¹³iNdahvi nyoho ra sacuahá ley vehe ñuhu, ta ra fariseo! iNdahvi nyoho cha sahá ndo tyi vaha ndo! Vatyi chasí ndo yuvehe nu nyacá ñaha Nyoo, tacuhva ma cuví quihvi ñáyivi. Ta ni ri maa ndo ña quihvi ndo ta ni ña chahá ndo cha quihvi ñáyivi, ñu cuñí quihvi.

¹⁴iNdahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyi tinyaá ndo vehe ñu chihí yíi, tyi ña cuví tyiyahvi ñu ñáá xuhun tavá ndo siqui ñu. Ta yahá cuan, ta naha chicán tahvi ndo nu tuvi vatyi sahá ndo tyi vaha ndo. Ta cuenda cha sacuví ndo tyehe caa, cahnu ca tindoho cunyehe ndo.

¹⁵Ndahvi nyoho ra sacuahá ley vehe ñuhu, ta ra fariseo. iSahá ndo tyi vaha ndo, soco ña ndicha ndo! Vatyi nducú xaan ndo cuhva na cunyicon ñáyivi chi ndo. Ta tatu cha nandihvi ñu cuenda ndo, quiñi caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihi ca sacuhún ndo chí ñu anyaya cha nuu maa ndo.

¹⁶iNdahvi nyoho ra ndahvi! Vatyi cuñí ndo saquehen ityi ndo chí ñáyivi, isoco cuaa ndo! Vatyi catyí ndo tatu noo ñu catyí ñu cha cusacuví ñu noo cha cusacuví ñu, ta tyanaha ñu chihin sivi vehe ñuhu, yucuan ña niñi cha sacuví ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñí chi cha sacuví ñu, catyí ndo. ¹⁷iTondo xaan ndo ta

cuaa ndo! ¿Nya cha niñi ca? ¿Atu niñi ca xuhun cuaan cuan, o vehe ñuhu cha sacu ii chi xuhun cuaan cuan? ¹⁸Ta suri catyí tucu ndo: “Tatu yihí ñu catyí ñu cha cusacuví ñu cha cusacuví ñu, ta tyanaha ñu cuenda arta cha yoso cha chahá cuenda ñu chi Nyoo, ña niñi cha sacuví ñu. Soco tatu tyanaha ñu cuenda ofrenda cha yosó siqui arta cuan, yucuan ndicha niñi cuñí chi sacuví ñu, catyí ndo.” ¹⁹iTondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan? ²⁰Vatyi ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihí cha yosó nuu ñandihí. ²¹Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyi iyó ra yucuan. ²²Ta tyicuan caa tucu ñu tyanahá cuenda andivi, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

²³iNdahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyi chahá ndo diesmo chí Nyoo cha cuví menta, ta añii, ta comino. Soco ña quichahá ndo tuhun cha niñi ca cha nyaá nu ley cha tahán chí sacuví yo. Ta cuñun, cha sacuví yo cha vaha chihin tandihí ñáyivi, cha cundahvi cuñi yo chí ñu, cha chinó iñi yo chí Nyoo ta ma sandoo yo chí ra. Ican ihya cuñí chí sacuví ndo, ta ma sandihí ndo cha cuhva ndo diesmo cuan ñandihí. ²⁴Nyoho cuñí ndo casaquehen ityi ndo chí ñáyivi,

soco cuaa ndo. Vatyí sacuita ndo noo tiyucun luhlu, soco coco ndo noo camellu. Cuatyí luhlu ri nyehe ndo ta ña sahá ndo cuenda cuatyí cahnu cuví cuan.

²⁵iNdahvi nyoho ra sacuahá ley vehe ñuhu ta ra fariseo, ra casaha tyí vaha! Vatyí ityi chata ri vasu ta ityi chata ri coho sanduvií ndo, soco ityi chichi ña sanduvií ndo. Vatyí chichi añima ndo tyitu ñohó cha quiñi caa. Chicá xiñi ndo cha ñihi ndo nu cusuhu ndo, ta ña cuví chasaha ndo cha quiñi caa cha quichi cuvi xaan iñi ndo. ²⁶iRa fariseo cuaa cuví ndo! Sanduvii xihna ndo ityi chichi vasu ta coho, tyicuan ta cuvii tucu ityi chata.

²⁷iNdahvi nyoho ra sacuahá ley vehe ñuhu ta ra fariseo, ra casavaha chii! Vatyí cuví ndo tari noo ñaña ndiyi cha nacahyu, vatyí ityi chata chi tyaqui xaan, soco ityi chichi tyitu ñohó yiqui ndiyi, ta tandihi nuu cha quiñi caa. ²⁸Tyicuan caa cuví nyoho. Vatyí ityi chata tari maa tyi vaha xaan ndo nuu ñáyivi, soco ityi chichi, tyitú ñohó cha cuendu ndo, ta cha quiñi caa.

²⁹iNdahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyivi vaha ñu chiyo ta cha naha. ³⁰Ta yucuan ta catyí ndo! “Tyehe ta chiyo ndi quivi chiyo ñáyivi chahnu ndi, ma tyinyee ndi chi ra chahñi chi ra profeta Nyoo”, catyí ndo. ³¹iMa chihin yucuan ri! Suri maa ndo nacotó ndo vatyí vachi ndo tata ñu cachahñi chi profeta Nyoo.

³²iVaha vityin, chaha chi cuhva savaha ndihi ndo cha quiñi caa cha quichaha savaha sutu chahnu ndo!

³³iNyoho ñu quiñi iyó, ñu vachi tata cool! ¿Yoso caa cucacu nyoho tacuhva ma chun ndo anyaya? Ma cuvi. ³⁴Yucuan chaha cutachi chi ra profeta Nyoo nu nyicú ndo, cutachi tiqui chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cuchañi ndo chi ra chichi vehe ñuhu. Ta cacanyicon ndo chi ra tahan tahan ñuu. ³⁵Yucuan chaha, siqui ndo cucunyaa cuatyí cha cuenda cha cachihñi tandihi ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichi vehe ñuhu yatyin nu nyaá arta cha yosó cha chahá cuenda yo chi Nyoo. ³⁶Cha ndicha catyí chi ndo, vatyí tandihi cuatyí ihya cucoso siqui ñáyivi cha iyó vityin —catyí ra Jesús chi ra.

Nu nducuihya iñi ra Jesús nyehe ra chi ñuu Jerusalén ta chacu ra

(Lc. 13.34-35)

³⁷iJerusalén, Jerusalén! iNdahvi nyoho ñu iyó ñuu chiña! Vatyí chahñi ndo chi ra profeta Nyoo. Ta tuchñi ndo yuu chi tandihi ra cha saquichñi Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti chi sehe ti, ta naquehén ndahvi ti chi ti chichi ndichin ti, soco ña cuñi ndo. ³⁸Nyehe ndo vityin, vatyí cha sandoo ndahvi chi ndo. ³⁹Vatyí catyí chi ndo, vatyí ma nyehe ca ndo chii nyacua nya chaa chi quivi

cucatyí ndo tyehe caa: “Cahnu xaan ra cuví ra vachi chihin tunyee iñi sivi Sutu yo Nyoo”, cucatyí ndo — catyí ra Jesús.

Nu catyí ra Jesús vatyí cutani vehe ñuhu cahnu

(Mr. 13.1-2; Lc. 21.5-6)

24 Quita ra Jesús chichi vehe ñuhu cahnu cuan, ta cha cuñí cahun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra. ²Soco nacahan ra Jesús ta catyí ra:

—¿Atu nyehé ndo tandihi ihya? Cha ndicha catyí chi ndo, vatyí ihya ni noo yuu ta ma ndoo coso nyitahan. Tandihi ta cutani —catyí ra.

Nu catyí ra Jesús ñáá ndihi seña cucuvi cha ni cumañi ca naa ñayivi

(Mr. 13.3-23; Lc. 21.7-24; 17.22-24)

³Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichi coyo ra ta catyí xehe ra chi ra tyehe caa:

—Cuñí ndi cha çatyun chi ndi, ama cucuvi tuhun cuan. ¿Ñáá seña cucuvi cha cuquichun inga chaha ta cha cunaa ñayivi?

⁴Tyicuan ta nacahan ra Jesús: —Saha ndo cuenda chi ndo coto yóo cha sandahvi ñaha chi ndo.

⁵Vatyí cuaha xaan ra cuquichi, ta cotyíño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra. ⁶Nyoho cuñihi ndo tuhun tyí iyó cuatyí ta cañi tahan ñáyivi ityi cuan ityi ihya.

Soco ma nayuhvi ndo, vatyí tyicuan caa tahn maa chi cuvi. Soco ta chaa ca quivi cunaa ñayivi. ⁷Vatyí ñáyivi noo ñuu cahnu, cucañi tahan ñu chihin ñáyivi inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi. ⁸Tandihí ihya ta nu cua quichaha ñáyivi nyehe ñu tindoho cuví.

⁹Tyicuan ta cucuhva cuenda ñu chi nyoho vatyí sanyehe ra tindoho chi ndo. Ta cacahñi ra chi ndo. Ta tandihí ñu iyó siqui ñuhu ñayivi cutasi cuñi nyehe ñu chi ndo cha cuenda yuhu. ¹⁰Quivi cuan cuaha xaan ñu cusandihí ñu cha chino iñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chi tahan ñu. ¹¹Cuaha xaan ra cuendu cunatuvi, ta cucatyí ra vatyí cuenda Nyoo cacahan ra. Ta cuaha xaan ñáyivi cucasandavi ñaha ra. ¹²Ta cuaha xaan cha quiñi caa cucoo. Yucuan chaha cuaha xaan ñu cusandihí ñu cha cuñi ñu chi tahan ñu. ¹³Soco ñu cha ña ndu uvi iñi chino iñi chii nyacua nya nu ndihí, cucacu ñanima ñu. ¹⁴Ta cucutya nicahnu ñayivi tuhun vaha cha nyacá ñaha Nyoo ñanima ndo, tacuhva coto tandihí ñáyivi iyó siqui ñuhu ñayivi, tyicuan ta cunaa ñayivi.

¹⁵Tandihí nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaa ra tuhun noo cha sacuquiñi caa, noo cha sativí. Ta quivi nyehe ndo vatyí chaa ihya Nu Ii, ¹⁶tyicuan ta ñu ñohó Judea, cuñi chi cono ñu ityi yucu. ¹⁷Ta

ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan. ¹⁸Ta ñu ñohó nu chiqui, ni ma cunuhu ca ñu cunaquehen ñu ni sahma ñu. ¹⁹iNdahvi ñusihi cha cañohó sehe quivi cuan! O tatu iyó sehe ñu cha chaxín, indahvi ñu cuan! ²⁰Caçan ndo chi Nyoo tacuhva cha ma tahan chi caca cono ndo quivi vichin, ni quivi nyitatu yo. ²¹Vatyí cuaha xaan tindocho cucoo quivi cuan, noo tindocho cha ta coo ca maa nyata chinq ñuhu ñayivi, ta ni ma coo ca cha yaha tuhun cuan. ²²Soco tatu Nyoo, ta ma sanducuiti ra quivi cuan, yori maa cacu. Soco cusanducuiti ra cha cuenda cha cuñi ra chi ñu nacachi maa ra.

²³Ta tatu yóo cha catyí chi nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino iñi ndo. ²⁴Vatyí cuquichi coyo ra casandavi ñaha ta cucatyí ra vatyí ra Cristo cacuví ra. Ta cucatyí ra vatyí ra profeta Nyoo cacuví ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachi maa Nyoo ta cusandavi ñaha ra tatu cuví chi ra. ²⁵Saha ndo cuenda vatyí cha yaha catyí chi nyoho cha ni cumañi ca cuvi. ²⁶Yucuan chaha tatu catyí ñu chi ndo tyehe caa: “Nyehe ndo, ma ra Cristo nyaá nu chiqui ndi cuan”, catyí ñu chi ndo, ma cuhun ndo. O tatu catyí ñu chi ndo: “Nyehe ndo, ma ra nyaá chichi cuarto ihya”, ma chino iñi ndo. ²⁷Vatyí tari noo cha quihvi tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quivi

quichi yuhu Rayii cha quichi nya gloria. ²⁸Nu caá coño chihí, yucuan cuchaa coyo chii.

Yoso caa cuquichi ra Cristo inga chaha

(Mr. 13.24-37; Lc. 21.25-33; 17.26-30, 34-36)

²⁹Ta cha yahá ri cha nyehé ñu tindocho, ta cunduñaa ñanyii, ta yoo ma sacundichin ca chi. Ta tiñoo cucanacocho ti andivi, ta nyacua nya cha iyó andivi cunacanda. ³⁰Tyicuan ta cuquetuvi noo seña ityi andivi nu vachi yuhu Rayii cha quichi nya gloria. Cuquichi nu vico ityi andivi chihin tunyee iñi cahnu ta chihin cha cahnu cuví Nyoo. Ta tandihi ñayivi iyó siqui ñuhu ñayivi, cucuacu chaa xaan ñu cha nanyehe ñu chii. ³¹Ta cutachi ángel cuende tacuhva vatyí chihin cha ñihi tivi ra cutu ra ta cusandu iñi ri ra chi ñu nacachi maa Nyoo chi, cuquita ñu nicacahnu nu ñuhu ñayivi, nyacua nya nu ndihi ñuhu ñayivi ta nyacua nya nu ndihi andivi.

³²Cutuñi iñi ndo noo cuhva yutun cha nañi higo: Tatu cha yutya soco tun, ta caña ndaha tun, nyoho cha chitó ndo vatyí cha vachi vico savi. ³³Ta suri tyicuan caa, tatu cha nyehé ndo tandihi maa cha cucuvi ihya, cocho ndo vatyí cha cuyatyn quichi. Cha nyañai yuvehe cuví chi cuan. ³⁴Cha ndicha catyí chi ndo vatyí tandihi tuhun ihya, cucuvi cha ni ri ca cha iyó ñayivi. ³⁵Andivi ta ñuhu ñayivi cundihi chi, soco tuhun cahán yuhu, ma ndihi chi. Ta cuchino cava tandihi tuhun cahin chihin ndo ihya.

³⁶Soco quivi ta cuhva cha cucuvi cuan, yori chitó, ni ángel andivi

ta ña chitó ra. Ni yuhu Rayii cha quichí nya gloria ta ña chité. Noo tuhun ri maa Nyoo Suti chító ra.

³⁷Tari cuví quiví chiyo ra Noé, tyicuan caa cucuvi quiví quichi tucu yuhu Rayii cha quichi nya gloria. ³⁸Quiví ta ni cumañi ca coon savi xaan, ñáyivi cuan, chachí ñu, ta chihí ñu, tandahá ñu, ta chahá ñu chi sehe ñu tandaha nyacua nya quiví quihví ra Noé chichi barcu cuan. ³⁹Ta sana iñi ñu ta chaḡ savi ta tyañi tandihí ñu. Ta tyicuan caa cucuvi tucu quiví quichi tucu yuhu Rayii cha quichí nya gloria. ⁴⁰Quiví cuan, tu uvi ra ñohó ra nu chiqui. Noo ra cunaquehin, ta noo ra ndoo ra. ⁴¹Tu uvi ñusihí nyicó ñu molinu. Noo ña cunaquehin, ta noo ña ndoo ña. ⁴²Cuḡtu tuhva vaha ndo vatyí ña chitó ndo ñáá cuhva cuquichi ra nyacá ñaha chi ndo. ⁴³Soco coto ndo tuhun ihya vatyí tatu noo chitoho vehe ta chitó ra ñáá cuhva cuquihví ra suhu chichi vehe ra, cuatu tuhva vaha ra ta ma cuhva ra cha quihví ra suhu cuan. ⁴⁴Yucuan chaha nyoho, cuḡtu tuhva ndo. Vatyí sana ri iñi ndo, ta cuquichi yuhu Rayii cha quichi nya gloria.

Ñu cha nyatú tuhva na ndichi ra Cristo, ican ñu cuví musu vaha ra

(Lc. 12.41-48)

⁴⁵Noo musu cha tyasohó tuhun cahán chitoho, ta tyicuan ri sacuví ra tyiño tyaa ra chi ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva. ⁴⁶Ta sii xaan cuví chi musu cuan tatu cuhva cha sahá tyiño ra ta

nachaa chitoho ra. Vatyí quichahá ra tandihí cha tahán chi sacuvi ra. ⁴⁷Ta cha ndicha catyí chi ndo, vatyí chitoho ra cunatyaa ra tandihí cha cumí ra ndaha ra, vatyí vaha quichahá ra chihin tyiño sahá ra. ⁴⁸Soco tatu noo musu quiñi iyó ta chicá xiñi ra vatyí naha cuahan chitoho ra, ⁴⁹ta quichaha nyacuvi ra cha ña vaha chihin inga musu cuan, ta quichaha chachi ra ta chihi ra ndixi chihin ra chiñi, ⁵⁰tyicuan ta sana iñi ra ta ndichi chitoho ra quiví cha ña nyatú ra chi ra. ⁵¹Tyicuan ta chitoho ra ñihi xaan cutachi tuñi ra chi ra chihin ñáyivi quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

Nu chahá ra Jesús noo cuhva cuenda uchi tahan ñu tyivaa

25 'Cha nyacá ñaha Nyoo añima ñáyivi cuví chi tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chi ra cha cua tandaha. ²Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu. ³Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyí natyihí ñu chichi lampara ñu tatu ndihí. ⁴Soco ñu cachi ñohó iñi cuan, canyisó siin ñu yutyí acetye chihin lámpara ñu. ⁵Ta vatyí cucuee ca cha ra cha cua tandaha cuan, catiñ ñumahna chi tandihí ñu, ta caquixí ñu. ⁶Tyicuan ta ñáá cuhva ñuu, ta chiñi ñu noo ndusu cha catyí tyehe caa: "iCha vachi ra cha cua tandaha! iQuita

ndo, quehen cuenda ndo chi ra!”
 catyí ndusu cuan. ⁷Tandihí ñu
 tyivaa cuan canducuitā coyo ñu ta
 quichaha casanduvaha ñu lámpara
 ñu. ⁸Tyicuan ta quichaha catyí
 ohon ñu tondo ñohó iñi cuan chi
 inga ohon ñu cuan: “Cuhva ndo
 suhva acetye ndo chi ndi, vatyí
 cuñí ndahva lámpara ndi”, catyí ñu.
⁹Soco ñu tyivaa cha cachi ñohó iñi
 cuan nacahan ñu tyehe caa: “Ma
 cuhva ndi vatyí coto ma ñihi, ni cha
 cuenda maa ndi ta ni cha cuenda
 maa ndo. Cuahan taxi ndo nya
 nu quiyahví chi, ta sata ndo cha
 cuenda ndo.” ¹⁰Soco cha ni ri ca
 cha cuahan coyo ndi ohon ñu cha
 tondo ñohó iñi cuan, cua sata ñu
 acetye, ta chaā ra cha cua tandahá
 cuan. Ta ñu tyivaa cha nyatú tuhva
 cuan, quihví coyo ñu chihin ra
 chichi vehe nu cuacoo vico tandaha
 cuan. Ta nicunyasí ri yuvehe. ¹¹Yaha
 cuan ta cachaa coyo tucu ñu chisata
 acetye cuan, ta catyí ñu: “iTata!
 iTata! iNuña yuvehe naquihví ndi!”
¹²Soco maa ra nacahan ra, ta catyí
 ra: “Cha ndicha vatyí ña ñohó nui
 chi nyoho.”

¹³Tyicuan ta quichaha catyí ra
 Jesús:

—Cuātu tuhva ri nyoho, vatyí ña
 chitó ndo nya quivi ta ñáá cuhva
 cuquichi yuhu Rayii cha quichi Nya
 gloria.

Noo cuhva cuenda xuhun

(Lc. 19.11-27)

¹⁴Cha nyacá ñaha Nyoo ñima
 ñáyivi cuví chi tari noo ra cha cha
 nyaá cha cua quita cuhun inga ñuu.
 Ta canā ra chi musu ra, ta chahā
 cuenda ra xuhun chi ra.

¹⁵Chi noo ra chahā ra ta cha
 ohon mil xuhun, ta chi inga ra
 chahā ra ta cha uvi mil, ta chi inga
 ra tari noo mil. Chahā ra chi noo
 noo ra yoso cuhva cha cuví saha
 tyiño ra chihin. Tyicuan ta cuahan
 ra. ¹⁶Musu cha quehen cuenda
 ohon mil xuhun cuan, saha ra lucha
 chihin xuhun cuan, ta saha ganaa
 ra nonga ohon ca mil chihin xuhun
 cuan. ¹⁷Ta suri tyicuan caa tucu ra
 cha quehen cuenda uvi mil cuan,
 saha ganaa ra uvi ca mil chihin
 xuhun cuan. ¹⁸Soco ra cha quehen
 cuenda noo ri mil cuan, chahan ra
 ta chatyā ra noo yavi chichi ñuhú
 ta tixehe ra xuhun chitoho ra.

¹⁹Cuaha quivi yaha ta nachaa
 chitoho musu cuan. Ta quichaha
 natava ra cuenda chihin noo noo ra.
²⁰Xihna ca ra cha quehen cuenda
 ohon mil xuhun cuan chaā, ta
 nacuhvā cuenda ra ohon ca mil
 siqui cuan, ta catyí ra: “Tata, ohon
 mil chahun chii, ma inga ohon mil
 ihya cha saha ganai.” ²¹Ta chitoho
 ra catyí ra chi ra: “Vaha. Noo musu
 vaha xaan cuvún. Ta sacuvún
 tandihí cha catyí. Ta vasi chiin ri
 xuhun chahí chuun soco vaha xaan
 chotyíñon chi chi. Vityin cuaha ca
 cucuhva cuende chuun. Quihví nu
 vaha ihya, ta cusii cuñun chihin.”
²²Yahā cuan ta chaā tucu musu cha
 quehen cuenda uvi mil xuhun cuan,
 ta catyí ra: “Tata, uvi mil chahun
 chii, ma uvi ca mil ihya cha saha
 ganai siqui.” ²³Ta catyí chitoho ra
 chi ra: “Vaha. Noo musu vaha xaan
 cuvún, ta sacuvún cha catyí. Vasi
 chiin ri xuhun chahí chuun soco
 vaha xaan chotyíñon chi chi. Vityin
 cuaha ca cucuhva cuende chuun.

Quihvi nu vaha ihya, ta cūsiñ cuñun chihin”, catyí ra. ²⁴Soco cuhva cha chaq musu cha quehen cuenda noo mil ri xuhun cuan, catyí ra chi chitoho ra: “Tata, yuhu chité vatyí cuvún noo ra xaan ta cuñún naquehún xuhun noo nu ña sahá tyiñon, ta cuñun naquehun cosecha noo nu ña tachun. ²⁵Yucuan chaha nayuhvi ta chahin ta tyihí xehi xuhun chichi ñuhú. Soco ma xuhun ihya cha chahun chii”, catyí ra. ²⁶Tyicuan ta nacahan chitoho ra, ta catyí ra chi ra: “Musu quiñi iyó ta musu suchan cuví yoho. Tatu chitón vatyí cuñí naquehín nu ña saha tyiñe, ta quehín cosecha noo nu ña tachí, ²⁷¿ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun siqui cha saha ganaa chi”, catyí ra. ²⁸Tyicuan ta quichaha catyí ra chi ñu nyicú cuan: “Tinyaa ndo noo mil xuhun cha nyisó ra, ta cūhva ndo chi ra cha nyisó uchi mil. ²⁹Vatyí ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndíhi chi ñu. ³⁰Ta musu cha ña chiñuhú ihya, tuchi ndo chi ra nu ñaa iñi ityi chata, ta yucuan cuacu chaa ra, ta cusacahni ra noho ra chihin cha nyehe ra tindoho.”

**Nu catyí ra Jesús vatyí
cucutuñi chi tandihí ñáyivi**

³¹Quivi cuquichi yuhu Rayii cha quichí nya gloria, cuquichi chihin cuaha ángel cuende, ta cucunyai tyayu tyaqui ta cunyaca ñahi.

³²Ñáyivi tandihí ri ñuu cundu iin ri ñu nui. Ta cusasiin chi noo noo

ñu, tari ra sahá cumi mbee tava siin ra chi mbee ta tava siin ra ndixihyu. ³³Ta cucuatyai chi mbee cuan chiyo vahi, ta chi ndixihyu cuan, chiyo satyin. ³⁴Tyicuan ta yuhu cha cuví Rey cucatyí chi ñu nyicú chiyo vahi: “Ñaha nyoho vatyí nyoho ñáyivi cha nasocó Suti cuví ndo. Quehen cuenda ndo nu cuacunyaa ndo nu nyacá ñaha Nyoo, vatyí cha cuenda maa ndo chinq ihya nyata quivi savaha Nyoo ñuhu ñáyivi. ³⁵Vatyí quivi chisoque, ta nyoho chaha ndo cha cachi. Quivi cu ityi ndutya ta chaha ndo cohi. Ta quivi chica noi tari ra inga ñuu ta nyoho chaha ndo vehe coi. ³⁶Quivi cumañi sahme, ta nyoho chaha ndo sahme. Quivi cuhvi ta nyoho chahan ndo chinyehe ndo chii. Ta quivi ñohi vehe caa, ta quichi nyehe ndo nu ñohi.” ³⁷Ta ñu cha vaha cuan cundaca tuhun ñu chii, ta catyí ñu: “Sutu Mañi yuhu, ¿ama nyehe ndi chisocon, ta chaha ndi cha cachun? ¿Ama nyehe ndi ityun ndutya ta chaha ndi cohun? ³⁸¿Ama nyehe ndi chuun chicá noun tari ra inga ñuu ta chaha ndi vehe coun? ¿Ama cumañi sahmon, ta chaha ndi chuun? ³⁹¿Ama nyehe ndi cuhvún, o ñohún vehe caa, ta chahan ndi chinyehe ndi chuun?” cucatyí ñu. ⁴⁰Ta yuhu cha cuví Rey cucatyí chi ñu: “Cha ndicha catyí chi ndo, vatyí tandihí tumañi iñi sacuvi ndo chihin ra ndahvi, ra yañi ihya, chi yuhu sacuvi ndo tumañi iñi cuan.” Tyicuan caa cucatyí yuhu chi ñu. ⁴¹Tyicuan ta yuhu cha cuví Rey cucatyí tiqui chi ñu nyicú chiyo satyin tyehe caa: “Çanyaha ndo nui, nyoho ñu tahán

chi cuhún anyaya. Cuahan ndo nu ñuhu cha ma ndahva ca maa. Vatyí yucuan cuví nu chinq cha cuenda cuihna ta cha cuenda tatyí ña vaha cuenda ra. ⁴²Vatyí chisoque, ta nyoho ña chahā ndo cha cachi. Cu ityí ndutya, ta ña chahā ndo ndutya cohi. ⁴³Chicā noi tari chicá noo ra inga ñuu, ta ña chahā ndo nu coi. Cumañi sahme ta ña chahā ndo sahma cuhne. Cuhvi ta ñohi vehe caa, soco ña chahan ndo chinyehe ndo chii nu ñohi”, cucatyí chi ñu. ⁴⁴Tyicuan ta cucatyí ñu chii tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvun, o ñohun vehe caa, ta ña tyinyee ndi chuun?” cucatyí ñu. ⁴⁵Ta yuhu cha cuví Rey cucatyí chi ñu tyehe caa: “Cha ndicha catyí chi ndo vatyí tandihi maa cha ña sacuvi ndo chi ñáyivi ndahvi ihya, suri ña sacuvi tucu ndo chi yuhu cuví cuan”, cucatyí yuhu chi ñu. ⁴⁶Tyicuan ta ñu cuan cuhun coyo ñu nu cayú ñuhu cha ma ndahva ca maa. Ta ñáyivi vaha cuan cuhun ñu cucoo ñu noo ñáyivi cha ma naa ca maa.

Nu canducu ra cuhva yoso caa catiin ra chi ra Jesús

(Mr. 14.1-2; Lc. 22.1-2; Jn. 11.45-53)

26 Cuhva cha ndihí catyí ra Jesús tuhun ihya, ta quichahā catyí ra chi ra cachicá noo chihin ra tyehe caa:

²—Nyoho chitó ndo vatyí uvi ca quivi ta sanducahnu yo vico pascua. Ta yuhu Rayii cha quichi nya gloria cucuhva cuenda ñu chii vatyí tyaa ñu chii nu cruzi —catyí ra.

³Quivi cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu iin ri ra nuquehe vehe tyiño ra Caifás, ra cuví nuu chi tata sutu. ⁴Yucuan casandaā ra tyiño yoso caa ta sandavi ñaha ra chi ra Jesús ta catiin ra chi ra ta cacahñi ra chi ra. ⁵Soco cacatyí ra: —Ma cahñi yo chi ra cha ni ri ca cha chichi vico, tacuhva cha ma naquiqui xaan ñáyivi —catyí ra.

Nu chosó noo ñaha sihi ndutya vixi chahan xiñi ra Jesús

(Mr. 14.3-9; Jn. 12.1-8)

⁶Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chi, sivi saca ra cuví cuan. ⁷Ta tuhva noo ñaha nu nyaá ra Jesús, nyisó ña noo yutyi tyitú yihí ndutya vixi chahan. Ta yahvi xaan nyaá ndutya cuan. Ta ra Jesús nyaá ra yuhu mesa ta chosó ña ndutya cuan xiñi ra. ⁸Cuhva cha cananyehe ra chicá noo chihin ra cacuxaan ra ta quichahā catyí ra: —¿Ñáá tuhun cha sativi ña ndutya vixi chahan cuan? ⁹Vaha ca tyehe ta xico ña, ta ñihi ña cuaha xuhun chihin ta tyinyee ña chi ñu ndahvi chihin xuhun cuan —catyí ra.

¹⁰Tyicuan ta chiñi ra Jesús, ta catyí ra chi ra:

—¿Ñáá tuhun cha sayangá ndo chi ñaha ihya? Vatyí cha sacuvi ña chihin, noo cha vaha cuví. ¹¹Vatyí ñu ndahvi tyicuan ri cunyaa ñu chihin ndo, soco yuhu, ñima tyicuan ri cua cunyai chihin ndo. ¹²Chosó ña ndutya vixi chahan siqui coño ñuhi, vatyí sanduvahā ña cuenda cha cohin chichi ñuhú.

¹³Cha ndicha catyí chi ndo, vatyí tandihí ri nu cahan ñu tuhun Nyoo nicahnu ñayivi, cunacatyí tucu ñu cha sacuvi ñaha ihya, tacuhva nichohon iñi ñáyivi chi ña —catyí ra Jesús.

Nu naxico tuhun ra Judas Iscariote chi ra Jesús

(Mr. 14.10-11; Lc. 22.3-6)

¹⁴Tyicuan ta noo ra chicá noo chihin ra Jesús, ra cha nañi Judas Iscariote, chahan ra chicahan ra chihin ra cacuví nuu chi tata sutu.

¹⁵Ta catyí ra chi ra:

—¿Yoso cuhva ndo chii tatu cuhva cuende chi ra Jesús chi ndo?

Tyicuan ta ra cacuví nuu cuan cacatyí ra vatyí oco uchi tahan xuhun cuichin. ¹⁶Ta nya cuhva cuan ta quichahā nducu ra Judas ñáá noo cuhva cuvi nacuhva cuenda ra chi ra Jesús chi ra cacuví nuu chi tata sutu cuan.

Nu cuxiñi ra Jesús chihin ra cachicá noo chihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Quivi xihna ri cha quichahā vico ta chachí ñu pan cha ñahri yuchan iya yihí chihin, ra cachicá noo chihin ra Jesús tuhva ra chi ra ta quichahā candaca tuhun ra chi ra:

—¿Nya cuñun cha sanduvaha ndi cha cuxiñun cuenda vico pascua ihya?

¹⁸Ta catyí ra Jesús chi ra:

—Cuahan ndo chichi ñuu ta chā ndo vehe noo ra cuan. Ta catyí ndo chi ra: “Ra Sacuaha catyí ra vatyí cha cuyatyin cua cúvi ra, ta vehun

cusanducahnu ndi vico pascua”, catyí ndo chi ra —catyí ra Jesús.

¹⁹Tyicuan ta casacuvi ra tari cuhva catyí ra Jesús chi ra. Yaha cuan ta casanduvahā ra cha cacuxiñi ra cha vico pascua cuan.

²⁰Cuhva cha cuaa, chicunyaā ra Jesús nu mesa chihin ndi uchi uvi ra chicá noo chihin ra. ²¹Ta cha ni ri ca cha cachachí ra, catyí ra Jesús chi ra:

—Cha ndicha catyí chi ndo vatyí noo nyoho cucuhva cuenda ndo chii chi ra xaan iñi chii.

²²Ta canducuihya xaan iñi ra, ta quichahā candaca tuhun iñi iñi ra chi ra ta cacatyí ra:

—Sutu Mañi yuhu, ¿atu yuhu cuví?

²³Ta nacahan ra Jesús ta catyí ra:

—Ra cha chachí iñi ri coho chihin, ican ra cuan cua na cuhva cuenda chii. ²⁴Yuhu Rayi cha quichi nya gloria, cuahin ityi cha catyí nu tutu tuhun Nyoo. Soco ndahvi ra ndahvi cha cunacuhva cuenda chii. Quitá vihi ca cuenda chi ra, tyehe ta ña cacu taxin ra —catyí ra Jesús.

²⁵Tyicuan ta nacahan ra Judas, ra cha cua cuhva cuenda chi ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

²⁶Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo, ta cha yaha tahvi sava ra, ta chahā ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

²⁷Yaha cuan ta quehen tucu ra copa, ta nacuhva ra tyahvi nyoo chi Nyoo, ta sayahā ra chi tandihí ra ta catyí ra:

—Coho tandihí ndo ihya. ²⁸Vatyí ican ihya cuví niñi. Ta chihin niñi natyihí tahan Nyoo tuhun chaa chihin ndo, vatyí cucatí niñi cha catyí cha vaha chi cuaha ñu, vatyí chihin niñi coo ticahnu iñi cuatyí ñu. ²⁹Soco catyí chi ndo, vatyí ma coho que tahan vinu tichaha ndivi ihya, nyacua nya cha cohi vinu chaa chihin ndo nya nu nyacá ñaha Suti andiví —catyí ra.

Nu catyí ra Jesús vatyí cucatí ra Pedro vatyí ña ñohó nuu ra chi ra

(Mr. 14.26-31; Lc. 22.31-34; Jn. 13.36-38)

³⁰Cha yaha cha cachita ra yaa chi Nyoo, ta cuahan coyo ra yucu yutun Olivo cuan. ³¹Tyicuan ta quichaha catyí ra Jesús chi ra: —Tandihí nyoho ta cucaca uvi iñi ndo cha nyicón ndo chii vityin cha cuaa. Vatyí nu tutu Nyoo catyí chi tyehe caa: “Cucahñi chi ra sahá cumi mbee, ta mbee cuquiti cuatyí tí”, catyí chi. ³²Soco cha yaha nandote, xihna que cuhin Galilea, ican saha nyoho.

³³Tyicuan ta nacahan ra Pedro ta catyí ra:

—Vasí tandihí ra ndu uvi iñi ra cha nyicón ra chuun, soco yuhu ma ndu uvi iñi.

³⁴Tyicuan ta quichaha catyí ra Jesús chi ra:

—Cha ndicha catyí chuun vatyí suri maa cha cuaa ihya, cha ni cumañi ca cuacu loho, yoho cucatyun uñi chaha vatyí ña ñohó nuun chii —catyí ra.

³⁵Ta ra Pedro catyí ra:

—Vasí cúvi chuhun, soco ma catyí cha ña ñohó nui chuun —catyí ra.

Ta suri tyicuan caa catyí tandihí ra chicá noo chihin ra.

Nu chicán tahvi ra Jesús chi Nyoo nu cuví Getsemaní

(Mr. 14.32-42; Lc. 22.39-46)

³⁶Tyicuan ta chaa ra Jesús chihin ra cachicá noo chihin ra noo nu nañí Getsemaní, ta catyí ra chi ra: —Cunyicu ndo ihya, cha niri ca cha cuahin yucuan, cua cacan tahvi.

³⁷Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichaha nducuihya cuñi ra, ta tyoño xaan cuñi ra. ³⁸Tyicuan ta catyí ra chi ra: —Cahnu xaan tucuihya iñi nyaá añime. Nyacua cuñi chi cahñi chi chii. Ndo ndo ihya ri ta conyito ndo chihin —catyí ra.

³⁹Tyicuan ta cuahan ra Jesús chiin ca ityi nuu ca ta chicuiñi chiti ra ta chacun ra nuu ra nu ñuhú, ta chican tahvi ra chi Nyoo ta catyí ra: —Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuvi tari cuhva cha cuñí mai, soco tari cuhva cuñí maun na cuvi —catyí ra.

⁴⁰Tyicuan ta nachaa ra nu nyicú ra cachicá noo chihin ra, ta nyehé ra vatyí caquixí ra. Ta catyí ra chi ra Pedro tyehe caa:

—¿Atu ni minoo hora ña cuví conyito ndo chihin? ⁴¹Conyito ndo, ta cacan tahvi ndo tacuhva cha ma cuvi chasaha cuhna chi ndo. Cha ndicha vatyí añima ndo, cuñí xaan chi nanducu chi Nyoo, soco coño ñuhu ndo vita cuñí chi —catyí ra Jesús chi ra.

⁴²Nu cu uvi chaha chahan ra, ta chican tahvi ra tyehe caa:

—Sutu Mañi yuhu, tatu ma cuvi cha ma nyehi tindoho ihya, tu

tyicuan caa, na cuvi maa cuhva cuñún —catyí ra.

⁴³Tyicuan ta nachaa ra inga chaha ta caquixí tucu ra cachicá noo chihin ra, vatyí nicunyasi maa chiti nuu ra chihin cha cacuñí ra cusu ra. ⁴⁴Tyicuan ta sandoo ra chi ra, ta cuahan ra cha cu uñi chaha cua cacan tahvi ra. Ta catyí ra suri maa tuhun cha yaha cahān ra cha chican tahvi ra chi Nyoo.

⁴⁵Tyicuan ta nachaa ra na canyicu ra cachicá noo chihin ra, ta catyí ra chi ra:

—Vityin ndicha, cusu ndo ta nyitatu ndo. Vatyí cha chaā cuhva cha cua nacuhva cuenda ra chii chi ra quiñi iyó, ta Rayi cha quichi nya gloria cuví. ⁴⁶Ndicuita ndo, ta coho ndo. Vatyí cha vachi ra cha cunacuhva cuenda chii —catyí ra Jesús.

Nu catiñ ra xaan iñi chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷Ni cahān ca ra Jesús tuhun ihya, ta chaā ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chi tata sutu, ta ra cacuví mandoñi ñu Israel, ican tachi chi ra. ⁴⁸Ra Judas, ra cha chahá cuenda chi ra Jesús, cha yaha chaha ra noo seña chi ra cuan, tacuhva coto ra yóo chi tiin ra. Ta catyí ra:

—Ra cha cutyayuhi chi, ican ra cuan cuví. Tiñi ndo chi ra.

⁴⁹Tyicuan ta tuhva ra chi ra Jesús ta catyí ra:

—Nocumi chuun, Maestro. Ta tyayuhu ra chi ra.

⁵⁰Tyicuan ta nacahan ra Jesús ta catyí ra chi ra:

—Amigo, sacuvi ñáá tyiño vachun.

Tyicuan ta catuhva ra ta catiñ ra chi ra Jesús.

⁵¹Tyicuan ta noo ra ndihi chihin ra Jesús, tava ra mityi ra ta chahnya ra soho noo musu ra cuví nuu chi tata sutu cuan. ⁵²Ta catyí ra Jesús chi ra:

—Natyihi mityun chichi vena.

Vatyí tandihi ñu cacañi tahan chihin mityi, suri chihin mityi cúvi ñu. ⁵³¿Atu ña chitón vatyí tatu yuhu ta cuñí, cuví caquen chi Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii? ⁵⁴Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chi tyi tahān maa chi cuvi chi yuhu tyehē caa —catyí ra.

⁵⁵Ta catyí tucu ra Jesús chi ñáyivi:

—¿Atu vachi coyo nyoho vachi tiin ndo chii chihin cha xaan ta chihin yutun? Tari cha noo ra suhu cuví yuhu sahá ndo. Ndiqivi chinyai sañahi nu nyicú ndo chichi vehe ñuhu cahnu, soco ña tiñi ndo chii cha cuhin vehe caa. ⁵⁶Vatyí tandihi cha cuví chii vityin, ta chicunyaā nu tutu Nyoo, cha catyaa ra profeta Nyoo ta cha naha.

Tyicuan ta ndii ra cachicá noo chihin ra, cachino ra. Noo tuhun ca maa ra Jesús casandoo ra.

Nu cutuñi chi ra Jesús nuu ra cacuví tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷Ta ra cha catiñ chi ra Jesús cuan, chinyaca ra chi ra nuu

ra Caifás, ra cuví nuu chi tata sutu. Suri yucuan canyicú iin ri ra sacuaaha ley vehe ñuhu ta ra cacuví mandoñi. ⁵⁸Soco ra Pedro cuahan ra chata ra, nya sava ri nya nuquehe vehe ra cuví nuu chi tata sutu cuan. Ta quihvì ra ta ndoo ra nyaá ra chihin policia cuan, vatyí nyehē ra yoso caa quita tuhun cuan.

⁵⁹Ra cacuví nuu chi tata sutu, ta ra cacuví mandoñi, ta tandihì ra cuví tyiño, canducu ra noo cuatyí catyaa ra siqui ra Jesús, vasi ña ndicha, tacuhva vatyí chihin cuatyí cuan ta cuví cahñi ra chi ra. ⁶⁰Soco ña cañihì maa ra cuatyí ra, vasi cuaha ñáyivi chahan ñu chicatyi ñu cuendu siqui ra. Soco nu ndihì tuhun, chaá coyo uvi ca testigu cuendu. ⁶¹Ta cacatyí ra:

—Ra ihya, catyí ra vatyí cuví satani ra vehe ñuhu cahnu Nyoo, ta chichi cha uñi quivi cunacananyaa ra inga chaha, na —cacatyí ra.

⁶²Tyicuan ta ra cuví nuu chi tata sutu cuan, ndicuita ra, ta catyí ra chi ra Jesús:

—¿Atu ña nacahun nu cahan ra ihya? ¿Ñáá cha cuví cha cacatyí ra ihya sicun?

⁶³Soco ra Jesús taxi ri nanyaá ra. Tyicuan ta quichaha catyí ra cuví nuu chi tata sutu cuan chi ra:

—Chihin sivi Nyoo nyitó, catyí chuun vatyí catyun cha ndicha vaha. ¿Atu ra Cristo Sehe Nyoo nyitó cuví chuun? —catyí ra.

⁶⁴Ta catyí ra Jesús chi ra:

—Ican cuví, tari cuhva catyí maun. Ta suri catyí chi ndo, vatyí cunyehe ndo chi yuhu Rayi cha quichi nya gloria, cunyai chiyo vaha Nyoo ra iyó tandihì tunyee iñi chii, ta

cunyehe ndo nu quichi tiqui nu vico ityi andivi —catyí ra.

⁶⁵Tyicuan ta ra cuví nuu chi tata sutu cuan chahnya ra sahma ra tari noo seña tyi cuñí maa ra tyi ña vaha cha cahan ra Jesús, ta catyí ra:

—Ra ihya chicoo cuatyí ra nuu Nyoo chihin tuhun cahan ra. iNyehē ndo vityin! Ña niñi cha tava yo cha ndaa. Nyoho cha chiñi ndo tuhun ña vaha cahan ra. ⁶⁶¿Ñáá catyí ndo vityin?

Ta canacahan ra ta cacatyí ra: —Iyó cuatyí ra, ta cuñi chi cha cúvi ra.

⁶⁷Tyicuan ta catyicusii ra nuu ra ta cacañi ra chi ra. Inga ra cacatu ra nuu ra chihin chiqui ra. ⁶⁸Ta cacatyí ra chi ra:

—Yoho, cha sahún Cristo chuun. iÑacoto yóo cha cañi chuun!

Nu catyí ra Pedro vatyí ña ñohó nuu ra chi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chi ra:

—Yoho tucu chica noun chihin ra Jesús, ra Galilea cuan.

⁷⁰Ta ra Pedro catyí ra vatyí ña ñohó nuu ra chi ra nuu tandihì ñu nyicú cuan, ta catyí ra:

—Ña chité ñáá tuhun cahun.

⁷¹Tyicuan ta cuahan ra Pedro ityi yuvehe, ta nyehē inga ña chi ra, ta catyí ña chi ra nyicú cuan:

—Suri chica noo tucu ra ihya chihin ra Jesús, ra ñuu Nazaret cuan —catyí ña.

⁷²Ta inga chaha tucu tixehe ra Pedro cha ñohó nuu ra chi ra ta catyí ra:

—Cha ndicha vaha tyi ña ñohó nui chi ra cuan.

⁷³Suhva ri ca cuhva cuan, ta ra canycú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyí quetuvi nyacua nya cuhva cahún.

⁷⁴Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chi ra cuan, ta nacañi Nyoo chii tatu ña ndicha cha cahún —catyí ra.

Ta suri cuhva cuan nacuacu chaa noo loho. ⁷⁵Tyicuan ta nicohon iñi ra Pedro tuhun cha catyí ra Jesús chi ra: “Cha ni cumañi ca cuacu loho, yoho cha yaha catyun uñi chaha vatyí ña ñohó nuun chii.” Tyicuan ta quitá ra Pedro yucuan, ta chacu vavaha ra cha cuihya iñi ra cha sacuví ra tyicuan caa.

Nu cachahá cuenda ra chi ra Jesús chi ra Pilato

(Mr. 15.1; Lc. 23.1-2; Jn. 18.28-32)

27 Cuhva cha cundichin, tandihi ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyí cacahñi ra chi ra Jesús. ²Ta nuhñi ra. Ta chahan coyo ra chicuhva cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

³Cha nyehe ra Judas, ra cha naxico tuhun chi ra Jesús,

vatyí cuacúvi ra, ta ndu uví iñi ra cha sacuví ra, ta nacuhva ra ndi oco uchi xuhun cuichin cuan chi ra cacuví nuu chi tata sutu cuan, ta chi ra cacuví mandoñi ñuu cuan. ⁴Ta catyí ra:

—Chicoo cuatyí yuhu, vatyí chaha cuende chi noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ñáá cuenda nyuhu? iNyehe maa yoho!

⁵Tyicuan ta tuchi ra Judas xuhun cuan chichi vehe ñuhu cahnu, ta chahan ra ta chicuhñi ra yoho sucun ra ta suri maa ra chitacaá ra chi ra. Ta chihí ra.

⁶Ra cacuví nuu chi tata sutu cuan canaquehen ra xuhun cuan ta cacatyí ra:

—Ma cuvi tyihi yo xuhun ihya chichi caja ofrenda vatyí yahvi cha chahñi ñu noo ñáyivi cuví.

⁷Tyicuan ta catyihí tahan ra tuhun, ta chihin xuhun cuan casatá ra noo ñuhú cha nañi Ñuhú Ra Savahá Quisi. Vatyí coo nu cuchi ra chi ñu inga ñuu tu chihi ñu. ⁸Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Ñáyivi. ⁹Ta tyicuan caa chinó cava cha tyaa ra Jeremías profeta Nyoo ta cha naha. Catyí chi tyehe caa: “Quehen ra ndi oco uchi xuhun cuichin, yahvi cha tyaa ñu Israel chi ra. ¹⁰Ta chihin cuan, casatá ra Ñuhú Ra Savahá Quisi, tari cuhva catyí Sutu Mañi yo chii”, catyí chi.

**Nu nyehe ra Pilato vatyí ñahri maa
cuatyí ra Jesús**

(Mr. 15.2-5; Lc. 23.3-5; Jn. 18.33-38)

¹¹Cachinyaca ra chi ra Jesús nuu gobiernu, ta ra cuan ndaca tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹²Ta cuhva cha catyaa ra cacuví nuu chi tata sutu cuan ta mandoñi cuatyí siqui ra, ra Jesús ña nacahan maa ra. ¹³Tyicuan ta quichaha catyí ra Pilato chi ra:

—¿Atu ña chiñún tandihi cha cacahán ra sicun?

¹⁴Soco ra Jesús ña nacahan ra. Ta nyacua iyo cuñí gobiernu cuan vatyí ña nacahan ra. Ta ña chitó ra ñáá cunyacuvi ra.

**Nu cutuñí chi ra Jesús ta cacatyí ñu
vatyí cucúvi ra**

(Mr. 15.6-20; Lc. 23.13-25; Jn. 18.38—19.16)

¹⁵Soco cha vico pascua cuan, iyó noo tuhun chi ñu vatyí tuhva ra gobiernu saña ra noo ra ñohó vehe caa, nya ra cachi maa ñáyivi. ¹⁶Ta quivi cuan ñohó noo ra cha nañi Barrabás vehe caa. Ta chitó tandihi ñáyivi tuhun ra. ¹⁷Ta cuhva cha canyicú iin ri ñu, ra Pilato ndaca tuhun ra chi ñu, ta catyí ra:

—¿Yóó chi cuñí nyoho cha sañe? ¿Atu chi ra Barrabás o chi ra Jesús, ra nañí Cristo? —catyí ra.

¹⁸Vatyí chitó ra vatyí cha cuenda cha tasi cuñí nyehe ñu chi ra Jesús, yucuan cuenda chaha cuenda ñu chi ra.

¹⁹Cha ni ri ca cha nyaá ra Pilato nu tyayu ra, nu cuví ra tyiño, tachi ñasihi ra noo tyiño chi ra ta catyí ña: “Ma tyihun chuun chihin ra vaha chiña. Vatyí cuñi tahin noo ñumahna cha cuenda ra. Ta quiñi xaan tahin chihin”, catyí ña.

²⁰Soco ra cacuví nuu chi sutu ta mandoñi ñuu cuan, cacuñihi ra catyiyuhu ra chi ñáyivi na cacan ñu cha saña ra Pilato chi ra Barrabás, ta na cúvi ra Jesús. ²¹Ta gobiernu cuan cahán ra chihin ñu inga chaha, ta catyí ra:

—Chichi cha ninduvi ra, ¿nya ra cuñí ndo cha sañe?

Ta maa ñu nacahan ñu, ta catyí ñu:

—Chi ra Barrabás.

²²Ta ra Pilato ndaca tuhun ra chi ñu, ta catyí ra:

—¿Ta ñáá cha cusacuvi chihin ra Jesús cha nañí Cristo ihya?

Tandihi ñu nacahan ñu ta catyí ñu:

—iNa cúvi ra nu cruzi!

²³Tyicuan ta quichaha catyí ra Pilato chi ñu:

—Soco ¿ñáá cha ña vaha sacuvi ra?

Soco maa ñu nacana chaa tucu ñu inga chaha ta catyí ñu:

—iCahñi chi ra nu cruzi!

²⁴Cuhva cha nyehe ra Pilato vatyí ñahri maa cha cuví sacuvi ra, vatyí quiñi xaan cacuví ñu, chican ra ndutya, ta nacatya ra ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo siqui maa ndo.

²⁵Ta tandihi ñáyivi canacahan ñu, ta catyí ñu:

—Na ndoo chi siquí maa ndi ta siquí sehe ndi.

²⁶Tyicuan ta ra Pilato saña ra chi ra Barrabás, ta tachi ra na ndoho ra Jesús, ta nacuhva cuenda ra chi ra na cuví ra nu cruzi.

²⁷Tyicuan ta sindaro cuenda gobiernu cuan chinyaca ra chi ra Jesús nya vehe tyiño, ta casandu ñin ri ra chi tandiñi sindaro cuan nicachico. ²⁸Tyicuan ta catava ra sahma ra ta casacuihno ra noo sahma cuaha chi ra. ²⁹Ta catyihí ra noo corona cha chino chihin iñu xiñi ra. Ta chaha ra noo yutun na quindaha ra chihin chiyo vaha ra. Tyicuan ta cachicuñi chiti ra nuu ra, ta cachacu nyaa ra chi ra ta catyí ra:

—iNocumi chuun, yoho Rey cuenda ñu Israel!

³⁰Ta catyicu sii ra chi ra ñandihí. Ta quehen ra yutun cuan ta cañi ra xiñi ra. ³¹Cha yaha cha cachacu nyaa ra chi ra ta catava ra sahma cuaha cuan chi ra ta sandihvi noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaa ra chi ra Jesús nu cruzi

(Mr. 15.21-32; Lc. 23.26-43; Jn. 19.17-27)

³²Cuhva cha caquitá coyo ra yucuan, catahan ra chi noo ra ñuu Cirene, nañi ra Simón. Ta casaniñi ra chi ra na cuiso ra cruzi ra Jesús.

³³Ta cachaa coyo ra noo nu nañi Gólgota, ta cuñi chi catyí Nu Cuví Yiqui Xiñi Ndiyí. ³⁴Ta yucuan cachaha ra vinu nasaca chihin cava uva coho ra Jesús. Soco cha yaha cha chihí ra chiin, ña cuñi ca ra coho. ³⁵Ta cha yaha cha

catyaa ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihi ra sahma cuan. Ta tyicuan caa chino cava tuhun cha tyaa noo profeta Nyoo ta cha naha nu catyí chi tyehe caa: “Casacha ra sahme chihin cha chahan ra sihva”, catyí chi. ³⁶Tyicuan ta cachicunyicu ra yucuan vatyí saha cuenda ra chi ra. ³⁷Ta ityi xiñi ra catyaa ra noo letra cha catyí ñaa tuhun cua cahñi ra chi ra. Ta catyí chi tyehe caa: “Ican ra ihya cuví ra Jesús, rey cuenda ñu ñuu Israel.”

³⁸Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra. ³⁹Ta ñu yahá coyo cuan, cacahan ñu chi ra, ta quisi xiñi ñu, ⁴⁰ta catyí ñu chi ra:

—iYoho cha catyun tyi cusanduvon vehe ñuhu cahnu, ta chichi cha uñi quivi ta nacananyaa tucun! iSacacu chuun vityin! iTatu Sehe Nyoo cuví chuun, noo nu cruzi chiña! —catyí ñu chi ra.

⁴¹Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandoñi ñuu ñandihí. Ta cacatyí ra chi tahan ra tyehe caa:

⁴²—Sacacu ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chi ra. ⁴³Itá iñi ra chi Nyoo, vityin na sacacu Nyoo chi ra, tatu ndicha cuñi ra chi ra. Vatyí catyí ra chi yo vatyí Sehe Nyoo cuví chi ra.

⁴⁴Ta nyacua nya ra suhu cha tacaá nu cruzi xiin ra ta cacahan ra chi ra ñandihí.

Nu chihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵Tyicuan ta tandíhi siquí ñuhu ñayiví nduñaá iñi, nyacua nya ora ta nyacua nya ca uñi cha cha iñi.

⁴⁶Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehé caa:

—Elí, Elí, ¿lama sabactani? —ta cuñí chi catyí: Nyoo Suti, Nyoo Suti, ¿ñáá tuhun cha sandoó ñihnon noo tuhun mai?

⁴⁷Suhva ra canyicú cuan, cachiñi ra cha cahan ra, ta cacatyí ra:

—Chi ra Elías, ra profeta Nyoo ta cha naha, ican cana chaa ra.

⁴⁸Ta caa cuhva ri cuan, cuahan vavaha noo ra cua quehen ra noo xixan, ta satyí ra chihin vinu iya, ta tyaá ra noo nu yutun, ta satuhva ra yuhu ra Jesús tacuhva na coho ra. ⁴⁹Soco inga ra cacatyí ra:

—Saña chi ra. Na nyehe yo tatu quichi sacacu ra Elías chi ra.

⁵⁰Inga tucu chaha cana chaa ñihi ra Jesús, tyicuan ta chihí ra. ⁵¹Ta caa cuhva ri cuan ndata sava sahma cha tacaá chichi vehe ñuhu cahnu cuan, nyacua nya siquí ta nyacua nya yuvi ndata. Ta taan. Ta ndata yuu. ⁵²Ta nuña yuhu ñaña. Ta nyacua canandoto cuaha ñu chinó iñi chi Nyoo, ñu cachihi. ⁵³Ta cha yaha nandoto ra Jesús caquitá coyo ñu nu ñaña ta quihvi coyo ñu chichi ñuu Jerusalén, ta cuaha ñáyivi nyehe chi ñu. ⁵⁴Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha taan. Ta cha canyehé ra inga ca cha cuví, ta cacatyí ra:

—Ndicha ndicha cuii, vatyí Sehe Nyoo cuví chi ra ihya.

⁵⁵Cuaha ñusihí cha chinyicon chi ra Jesús nya Galilea ta tyinyee ñu chi ra, nyicú ñu canyehé ñu nya sava ri yucuan. ⁵⁶Ta ican suhva ñu ihya cuví cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

Nu cua cuchí ra chí ra Jesús

(Mr. 15.42-47; Lc. 23.50-56; Jn. 19.38-42)

⁵⁷Cuhva cha cua cuaa, quichi noo ra tyayii cha nañí José. Ra ñuu Arimatea. Ta suri chinó iñi ra chí ra Jesús. ⁵⁸Ta chahan ra chinyehé ra nu nyaá ra Pilato, ta chican ra coño ñuhu ra Jesús. Tyicuan ta tyihí ra Pilato tyiño na cuhva ra coño ñuhu ra chí ra. ⁵⁹Tyicuan ta quehen ra José coño ñuhu ra, tyihí ra chichi noo sinduhu ndii. ⁶⁰Ta tyihí ra chí ra chichi noo ñaña nicaa chaa cha cuví noo yavi yuu cha tyihí ra tyiño cachatya ra. Ta cha yaha cha nacasi ra yuhu ñaña cuan chihin noo yuu cahnu, ta cuahan ra. ⁶¹Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶²Ta cha inga quivi, quivi nyitatu ñu cuví, ta ra cacuví nuu chi tata sutu, ta ra fariseo chahan coyo ra chinyehé ra nu nyaá ra Pilato. ⁶³Ta catyí ra chí ra:

—Tata, nichón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quivi cunandoto ra. ⁶⁴Yucuan chaha tyihí tyiño na casaha cumi vaha ra ñaña cuan, nya yaha cha uñi quivi, coto quichi coyo ra cachicá noo chihin

ra cha cha cuaa, ta casuhu ra coño ñuhu ra. Yaha cuan ta cucatyí ra chi ñáyivi vatyí cha nandoto ra. Ta cha tyicuan caa nu ndihí tuhun ihya, yaha ca cuhva cucuvi —catyí ra.

⁶⁵Ta ra Pilato catyí ra chi ra:

—Ma suhva sindaro chiña.

Cuahan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

⁶⁶Tyicuan ta cuahan coyo ra, ta casaha cumi vaha ra ñaña cuan, ta catyaa ra noo sellu chata yuu cha chasí cuan. Ta casandoo ra chi sindaro sahá cumi yucuan.

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

28 Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña. ²Ta quichi minoo cha taan vatyí quichi ángel Sutu Mañi yo noo ra nya ityi andivi, ta chaa ra nu ñaña cuan. Ta sacanyaha ra yuu cha nysí yuhu cuan, ta chicunyaa ra siqui. ³Ta xiño vavaha ra, tari cha quihvi tacha. Ta sahma ra cuichin vavaha. ⁴Cuhva cha cananyehē sindaro cuan chi ra, canayuhví vavaha ra nyacua nihí ra, ta nyacua coña ra chihin cha yuhví ra. ⁵Tyicuan ta quichaha catyí ángel cuan chi ñusihí cuan:

—Ma yuhvi ndo. Yuhu chité vatyí chi ra Jesús cha chihí nu cruzi nanducú ndo. ⁶Yori ca ra ñohó ihya, vatyí cha nandoto ra, tari catyí ra. Ñaha ndo ta nyehe ndo nu catuvi ra. ⁷Ta cūhun ndo numi ri, ta catyí

ndo chi ra cachicā noo chihin ra vatyí cha nandoto ra, ta cha cuahan ra Galilea, nyatú ra chi ra yucuan. Ican ihya cuví cha nyaa catyí chi ndo —catyí ángel cuan chi ñu.

⁸Tyicuan ta numi ri quitā coyo ñu nu ñaña cuan. Suhva ri yuhví ñu, ta suhva ri sii vavaha cuñí ñu. Ta chino vavaha ñu cua catyí ñu chi ra cachicā noo chihin ra Jesús. ⁹Ta cuhva cuan tuví ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuñi chiti ñu nuu ra ta casacahnu ñu chi ra, ta suri numi ñu chaha ra. ¹⁰Ta catyí ra chi ñu:

—Ma yuhvi ndo. Cuahan ndo cua sacoto ndo chi yañi vatyí na cūhun coyo ra Galilea, ta nyicuan cuñihi tahan ndi —catyí ra chi ñu.

Tuhun cha canacatyí sindaro

¹¹Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuví cuan chi ra cacuví nuu chi sutu. ¹²Tyicuan ta ra cacuví nuu cuan chahan coyo ra chicahan ra chihin ra mandoñi ñuu vatyí catyihí tahan ra tuhun yoso caa casacuvi ra. Tyicuan ta cuaha xuhun cachaha ra chi sindaro cuan. ¹³Ta cacatyí ra chi ra:

—Nyoho, catyí ndo vatyí cha cha cuaa cha ni ri ca cha quixí ndo, chahan coyo ra cachicā noo chihin ra Jesús ta chिकासuhū ra coño ñuhu ra. ¹⁴Ta tatu chito gobiernu tuhun ihya, cua nyehe maa ndi yoso caa catyí ndi chi ra, ta nyoho ma caca iñi ndo. Ñahri cucuvi chi ndo.

¹⁵Tyicuan ta caquehen sindaro cuan xuhun, ta cuahan coyo ra cua

casacuvi ra cha cacatyí ra chi ra.
Ta nya vityin ta tyicuan caa catyí
ñáyivi ñuu Israel.

**Nu tyaa ra Jesús tyiño chi ra cachicá
tyiño ra**

(Mr. 16.14-18; Lc. 24.36-49; Jn. 20.19-23)

¹⁶Ta tyicuan caa, ndi uchi iin ra
cachicá noo chihin ra, cuahan coyo
ra nya Galilea nya yucu nu catyí
maa ra Jesús chi ra vatyi cahun
coyo ra. ¹⁷Ta cuhva cha cananyehe
ra chi ra Jesús, casacahnü ra chi
ra soco suhva ra chica uvi iñi ra.
¹⁸Tyicuan ta tuhva ra Jesús chi ra
ta catyí ra chi ra:

—Nyoo chaha ra cha cunyaca
ñaha yuhu tandihi andivi ta siqui
ñuhu ñayivi. ¹⁹Yucuan chaha,
cuahan ndo tandihi nu nyicú
ñáyivi, tandihi ri ñuu, ta catyí
ndo chi ñu na nanyicon ñu chii.
Ta sacondutya ndo chi ñu chihin
sivi Sutu yo Nyoo ta chihin sivi
yuhu Sehe Nyoo, ta chihin sivi
Tatyí Ii Nyoo. ²⁰Ta sañaha ndo chi
ñu na naquichaha ñu tandihi cha
catyí yuhu tyi sacuvi ñu. Ta coto
ndo vatyi yuhu cunyai chihin ndo
tandihi quivi nyacua nya naa ñayivi
—catyí ra Jesucristo chi ra cachicá
tyiño ra.